

Hechos

Jesús tojanašebuachená chë
Uámana Espíritu jíchmuama

1 ¹Teófilo, atšbe natsana
libréšañe tcbonjuábobema
lempe ntšamo Jesús tojanmama y
tojánabuatambama, chca tojanbojatšé
orscana, ²y Bëngbe Bëtsá celoye
tbojtanatsbanantscuana. Cabá celoye
ndëta orna, chë chabe ichmonëngcá
tojanabacacá boyabásengna Jesús
tojéftsanamëndá, chë Uámana
Espíritbiajana, ndayá jamama
yojánamnana. ³Jesús cruciñe
tojanóbana y tojtanayenentsana,
ba soye chë ichmónënga
yojánëbëbuacana, chca, chënga
jinÿanÿiyama cha ndegombre
tojtanayenama. Canta bnëtsana
tentscuana cha yojánëbëbuacana y
Bëngbe Bëtsabe amëndayama chënga
yojanabuatambá.

⁴Canÿe, Jesús chabe
ichmónëngaftaca yojétsemna
ora, mëntšá tojanamëndá:
—Jerusalenentsana ndoñe
šmatjábocana. Camuentše
šmochjobátma, ntšamo atšbe
Taitá tcmónjanašebuachenacá
chaóshjanguëntscuana, ndayama atše
tcbonjúuyana. ⁵Ndegombre, Juan
entsanga béjayecca tonjanëbaye; pero
ndoñe baytesna, Bëngbe Bëtsá chë
Uámana Espíritu bochanjíchmuama,
tšëngaftangbe ainaniñe

jtsemándayama cháumashënguama
ca.

Jesús celoye tojtantsjuá

⁶Canÿe, chë ichmónënga
Jesúseftaca cánÿiñe imojtsemna
ora, chënga tmojtantjá: —¿César y
chë Romoquëngbe amëndayentsana
tašcochjatsebacá, y mora bënga,
Israeloca entsanga, canÿe Rey
quemochtsatsbomna ca?

⁷As Jesús tojanéyana:
—Tšëngaftanga ndoñe quecmátamna
chë soyëngama jtsetatšëmbuana.
Nÿe atšbe Taitá aínë; y cha, chabe
obenánaca echanjamánda mocna
ora y ndayté chca chaopasama. ⁸Chë
Uámana Espíritu tšëngaftangbe
ainaniñe jtsemándayama chaojabo
ora, tšëngaftanga obenana
šmochanjóyëngacñe. Chentsana,
ntšamo atšbiana šmotatšëmbcá, chë
tcbonjabuatambá soyënga, entsanga
šmochjúuyana Jerusalenentsë, nÿets
Judea luariñe, Samarioca y quem
luarentša nÿets luarënguenáchnaca ca.

⁹Chë soyënga tojánayanentsana y
chabe uatsjëndayënga imojtsonÿaye
ora, Bëngbe Bëtsá, Jesúsbioye
tbojtanatsbaná y canÿe jantšeteshe
chábioye ibojútsbotse y ndoñe más
tmonjanobená cha jinÿama. ¹⁰Jesús
celoye yojtsetsjuama chënga bën
imojtserreparánentscuana, nÿe
ndeolpe, uta boyabásata uafjantse

entsayaca bopormánata chéngbe juachaca tbojabántsaye, ¹¹ y chéngbioye tmojanéyana: “Galileoca entsánga, ¿ndáyeca celoye šmojtsantješana? Jesús, chë tšëngaftangaftaca enjamná celoye tontá y ntšamo mora šmonjinýcá cha celoye jtama, cachcá quem luaroye cha echanjésabo ca.”

**Júdasbe cuenta Matías
tmojanábuayana**

¹² Jesusbe ichmónënga chë Olivos tjashocana Jerusalenoye tmojtaná. Chë tjocana Jerusalenóntscóina bécoñe inamna, ndayéntscoca canýe ochnayté jama yojanlesenciana nyétsá. ¹³ Jerusalenoye tmojtánashjajna orna, chë yebnentša tsbanánoca tsoye tmojtánásëngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiná, Simón chë Celote ca uabobainá, y Judas, chë Santiagbe uaquiná. ¹⁴ Chënga sempre imojanamana jtenefjnana Bëngbe Bëtsáftaca jencuéntama básefta shembásengaftaca, María Jesusbe mamá y Jesusbe catšátangaftaca.

¹⁵ Chë tempo tmojánenefjna canýe patse y uta bnétsana Jesucristbeñe ošbuáchiyënga, y canýe, Pedro tojantsá y tojanéyana: ¹⁶ “Jesucristbeyeca atšbe catšátanga, endánëya ntšamo Bëngbe Bëtsabe uabemana palabrënguiñe iuabemancá chaohnënguama, y tempo, David chë Uámana Espíritbeyeca chiñe tojanábema ntšamo Júdaséftaca yochjanopásama; chcasna, Judas uayayënga tojanënatse Jesús chamuishachama. ¹⁷ Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuíñe jtsoservénama. ¹⁸ Tšëngaftanga šmondétatšëmbo, chë Judas bacna soye tojanmama

tmojtánabuená crocenánacna fshantse tmojánbuamema. Chentšana cha tojtsanótsatše y chabe bestšaše tséntsaca tbojtsanashtétšëna y chabe uafs bentšana nyétsca chabe chunchullëjuangá tojtsanáshana. ¹⁹ Jerusalenentše oyenënga chë soyama tmojántatšëmbona ora, chë fshantse chéngbe biyañe Acéldama ca tmojanabaye. Acéldama endayana ‘Buiñe Luare ca’. ²⁰ Salmos librëšañe, Jesucristo uayayëngbe cucuatšinë boshjuanabiamá mëntšá enduábemana: Chabe yebna éñañe chaotsemna y ndocná chentše chaondësiyena ca.

Y mëntšánaca endayana:

Chabe cuenta inýa chabe trabajo chaoma ca.

²¹ “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnéntscuana, ²² Juan Jesúsbiyoye tbonjanabaye orscana y Bëngbe Bëtsá Jesúsbiyoye bëngbentšana celoye tbontanatsbanantscuana. Y mora šontsamna canýa mënguentšá juabuáyanama, Jesús tojtánayenama entsángbiyoye bëngaftaca jábuayenama ca.”

²³ As chora útata tmojanabocacá: José, nda Barsabás ca imojánabobuatma y ínýengna Justo ca; y chentšana Matías. ²⁴ Chora Bëngbe Bëtsáftaca mëntšá tmojanencuentá: “Bëngbe Utabná, aca nyétscangbe ainana icuabuatma; chcasna, šminýanyé nda quem útatentšana cochjuábuayanana, ²⁵ canýe ichmonacá Júdasbe cuenta chaotrabajama. Judas ya ndoñe canýe ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chénga tmojánayana.

²⁶Y nda chë ichmoná yochtsemnama jtsotatsëmbuamna tshanányoye tmojanétsena y Matías tbojanobuache; as cach orscana, Jesucristbeñe ošbuáchiyënga chabiamá imojuabuabná mo canýe Jesusbe ustonacá, cachcá ntšamo chë bnétsana canýe uatsjéndayëngbiama chënga imojuabuabnacá.

**Chë Uámana Espíritu
ošbuachiyëngbeñe tojánamashëngo**

2 ¹Pentecostés ca uabaina fiesta tojanobuache ora, chë jaja sananga tmojanobuáibanama fiesta te, Jesucristbeñe ošbuáchiyënga nyetscanga cánýiñe canýe luarentše imojtsemna. ²Ndeolpe, celocana mo canýe jabuache binýiécá yojsaishauenana y chca, tša jabuache shauenanana tojanóshjango nyets yebnentše, chënga imojtsetbiámanentše. ³Y chora bichtajënga mo iñeshcá yojónýna y canýánýabeñe yojóátaye. ⁴Chca chë Uámana Espíritu tojánamashëngo chëngbe ainaniñe jtsemándayama; chora nyetscanga tmojanontsé inýetšá biyangana, chënga tempo ndmabiyañe, ntšamo chë Uámana Espíritu yojsamcá chënga inýetšá chamotsebiyama.

⁵Chë tempo Jerusalemntše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama.

⁶Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojsopasánama, er chë inýe luarocana áshjajnënga imojtsuenana chë Jesucristbeñe ošbuáchiyënga inýetšá biyangana jtsóyebuambnayana, ntšamo cada ona chënga imojuabiycá. ⁷Chë soyëngama

entšanga puerte imojenjaná y mëntšá imojtsenatsëtsnaye: “Chë chca montsóyebuambnanga Galileoquënga mondména. ⁸Chcase, ñntšámoyeca bënga imojtsobena chënga joyaunayana cach bënga mondëbiyacá ca? ⁹Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca, ¹⁰Frigioquënga, Panfilia, Egiptó y Libia, chë Cirene béconana luaroquënga. Báseftangna Romoquënga montsemna; ¹¹chéngbeñe nderado judiënga camuentše onýnánënga, pero ínýengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inýengna Cretocana y Arabiocánënaca tmojabo. iY bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

¹²Chë causa nyetscanga imojtsenjnanaye y ntšamo jtsejuabnayama ntsetatšëmbcá imojtsemna y imojtsenjnanaye: “¿Ndayá chë soye yojsayana ca?”

¹³Pero ínýengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

**Ntšamo Pedro chora
tojanoyebuambá**

¹⁴Chentšana, Pedro tojantsá chë inýe bnétsana canýe ichmónëngaftaca y jabuache tojanontsé chë entšanga jáuyanana, mëntšá: “Atšbe entšanga judiënga y nyetscanga Jerusalemntše oyenënga, tšabá šmochjouena. Ntšamo tojopasama cbochanjábuaenaye, as chacmésertama. ¹⁵Tšëngaftanga šmontsejuabná atše y atšbe enutënga

tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsoñe.

¹⁶ Pero ntšamo entsopasánamna, Bëngbe Bëtsabe juabna oyebuambnayá Joel mëntsá tojanábema:

¹⁷ Bëngbe Bëtsá mëntsá tojánayana: ‘Quem luare jopochócama te chaojtsobeco ora, chë soyënga echanjochñengo.

Atše chanjama, atšbe Espiritu nyetscangbe ainaniñe cháuamashënguama.

Chentsana, tsëngaftangbe uaqiñënga y bemianga atšbe soyëngama entsanga mochantsëtsësnaye;

tsëngaftangbe bobontsëngna, atše chanjama soyënga mochantsonyaye mo otjenayoquécá;

y tsëngaftangbe bëtsëjëmëngna atšbe soyënga mochantsotjénaye.

¹⁸ Chca ora, atše chanjama nyetsca atšbe oservëñgbiama, boyabásenga y shembásenga, chëngbe ainaniñe atšbe Espiritu cháuamashënguama, as chënga atšbe soyëngama entsanga mochantsëtsësnaye.

¹⁹ Atše chanjama bëts soyënga celoca; y quem luariñe echántsemna buiñe, ñeshe y ngona mo jantšetëshcá, atšbe obenana jinñanyiyama.

²⁰ Cabá chë puerte uámana te, chë Bëngbe Utabná bëts soyënga jamama ndobuache ora, shinye ndoñe queochátsbuashinjinñana y juashcona buanganëtema mo buiñcá echántsemna.

²¹ Y as, ndánaca Bëngbe Utabná tbojtsotšëmbuaná, cha bochanjatsbocá.’

Chca Joel tempo tojanábema ca” —Pedro tojánayana.

²² Chora Pedro tojatanéyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tmonjaninñanyé, Jesúsbioye chabe trabajo biamnayá cha tbojánbemama. Chë soye Bëngbe Bëtsá tmonjaninñanyé, Jesús chë Nazaretocáftaca cha tojanma bëts soyëngaca y ójnanana soyëngaca, Bëngbe Bëtsabe obenana jinñanyiyama. Cach tsëngaftanga chë soyëngama šmondétatšëmbo, Bëngbe Bëtsabe obenánaca chë soyënga tsëngaftangbeñe Jesús tonjánmayeca. ²³ Ndegombre tsëngaftangbe cucuatšinë Jesús tmonjánboshjona, pero cabá ndébošhona ora, Bëngbe Bëtsá tojanjuabó ntšamo jopásana vojammama; y ntšamo tsëngaftanga cháftaca šmochjanmámnaca cha inatátšëmbo. Tsëngaftangna Jesús šmonjanishache y šmonjanma cha chamóbama y chamocrucificama, bacna entsangbe cucuatšinë. ²⁴ Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

²⁵ Chora Pedro tojatanéyana: “Rey David tempo Jesusbiamma mëntsá tojéftsanabema, ntšamo cha Bëngbe Bëtsábioye tbojaniyanama:

Atšbe Utabná, aca sempre átšeftaca condbëtsemna, y sempre átšeftaca condboquedá atše juajabuáchama, chíyeca ndocná queochatobenaye atše jauátjanama.

²⁶ Chíyeca atše corente oyejuayá séntsemna, y atšbe uayášaca cbontsatschuaná. Atše masque chanjóbana, tsábá sëndétatšëmbo aca atšbe Bëtsá, atše chaitayenama cochjamama.

²⁷ Aca, Bëngbe Bëtsá, obanëngbe luarentše ndoñe quešcochátsboshjona, y ndoñe quecochatsleséncia acbe uámana oservenabe cuerpo chaotsopochocama.

²⁸ Aca chë tšabe benache šconjaninÿinÿé, ntšamo tšabe vida jtsebomnama.

Aca átšeftaca condbétsemnama, atše puerte oyejuayá šéntsemna ca —David tojéftsanabema ca.”

²⁹ Chentšana Pedro tojatanéyana:

“Baconga y batanga, šontsemna ndegombre tšëngaftanga jábuayenana tšabá chacmésertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare béconana.

³⁰ Cach David canÿe Bëngbe Bëtsabe juabna oyebuambnayá inamna. Cha tšabá inatátsëmbo Bëngbe Bëtsá bëtsá tbojanšbuáchenama, Davidbe entšanguentšana canÿa, Cristo, cach Davidcá rey jabemama. ³¹ David inatátsëmbo chë Uámana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojéftsanabema, obanëngbe luarentše Cristo ndoñe ntjéftseboshjonana y Bëngbe Bëtsá ndoñe ntjalesénciana chabe cuerpo chaotsopochocama ca. ³² Bëngbe Bëtsá tojama Jesús cháuatayenama y bënga cha fsënjinÿe. Chíyeca bënga fséntsetatšëmbo chca ndegombre bétsemnama. ³³ Bëngbe Bëtsá, Jesús celoye tbontanatsbaná chabe catšbioica jtsatsmënama jtsemándayama, y Bëngbe Bëtsá chë Uámana Espiritu Jesúsbioye tbojanëntšabuaché ntšamo chë Taitá tbojanšbuáchenacá. Ntšamo tšëngaftanga šmontsonÿá y šmotsuenancá entsemna, Jesucrístoftaca chë Uámana Espiritu

bëngbe ainaniñe cháumashënguama Bëngbe Bëtsá tojámayeca. ³⁴ David ndoñe Jesuscá celoye tonjána, pero mëntšá tojéftsanábema:

Bëngbe Bëtsá atšbe Utabná

Cristbioye tbonjaniana:

‘Atšbe catšbioica cochtsetbemana, ³⁵ acbe uayayënga acbe cucuatšinë chamoquedama atšbe

obenánaca chjamëntscuana ca.’ ”

³⁶ Chora Pedro tojatanéyana:

“Tšëngaftanga nÿets Israeloquënga šmochtsetátšëmbo, atše ndegombre cach Jesusbiana sentsóyebauambnama. Cha tšëngaftanga šmonjancrucificá, pero Bëngbe Bëtsá chábioye tbonjábema Bëngbe Utabná y chabe Uámana Uabuayaná, chë Cristo ca.”

³⁷ Chë soyënga tmojanuena ora, entšanga cochtsetšenanënga imojtsemna, y Pedro y chë inÿe ichmónëngbioye tmojanéyana: —Baconga, ¿ndayá mora jamama šojtsamna ca?

³⁸ As Pedro tojanéjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espiritu tšëngaftangbe ainaniñe jtsemándayama cháumashënguama.

³⁹ Bëngbe Bëtsá chë soyënga tcmonjanašebuachená tšëngaftangbiana, tšëngaftangbe básengbiana y nÿets chë bën luarënguenache imomna entšangbiana, nÿetscanga chë Bëngbe Utabná Bëngbe Bëtsá chábioye jabama chaojubuáyanënga ca.

⁴⁰ Inÿe palabrëngnaca Pedro tojatanéyana y bëtsá tojanabuayaná

mëntšá: “iBëngbe Bëtsá chë Israeloca bacna entsanga echanjácastigaye. Chašmótsbocamna, chéngbentsana šmochtsojuánañe ca!”

⁴¹Ba entsanga imojtsanošbuaché ntšamo Pedro tojanéyanama y tmojánenabaye. Cach te mo unga uaranga entsanga nyëtšá tmojanoboté, Jesucristbeñe ošbuáchiyënga jtsemnama. ⁴²Chënga corente imojtseboše jtsamama chë Jesusbe ichmónënga imojtsabatambá soyënga. Tšabá yojsacochebiona nyëtscanga cánýiñe jtsemnama y imojanamana mo chë Jesucristbeñe ošbuachiyëngcá cánýiñe jtsesayana y cánýiñe Bëngbe Bëtsáftaca jtsencuëntayana.

Ntšamo chë natsana Crístbeñe ošbuáchiyënga vida imnabomna

⁴³Nyëtscanga imojtsenjnanaye, chë ichmónënga bëts soyënga y inýe soyënga chabe obenana jimýanýiyama chamomama Bëngbe Bëtsá tojánmayeca. ⁴⁴Nyëtscá chë Jesucristbeñe ošbuáchiyënga sempre cánýiñe mo canýacá imojtsemna y nyëtscá chëngbe bomna soyënga nyëtscangbiana yojtsemna. ⁴⁵Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë ínýenga tojtsëjbotcá. ⁴⁶Cada te imojanamana Bëngbe Bëtsabe bëts yebnentše jénefnana cha jëtschuyama, y yebnënguenache cánýiñe imojtsesaye oyejuayënga y ndoñe ojëndayënga. ⁴⁷Chënga imojanamana Bëngbe Bëtsá jtsatschuanayana, y nyëtscá entsanga imojtsejuabnaye chë Jesucristbeñe ošbuáchiyëngbiana tšabe entsanga imojamna ca. Y cada te Bëngbe Bëtsá yojtsama más ošbuáchiyënga chamóbotema, chë ndëmuanýënga cha yojtsatsebacayënga.

Pedro canýe coshétbioye tbojanshná

3 ¹Canýe te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entsanga imojanamana Bëngbe Bëtsáftaca jtsencuëntayana. ²Bëngbe Bëtsabe bëts yebnentše canýe cosheto yojtsemna; tojanonýná orscana chca šocá inamna. Entšanga imojanamana cada te cha juanatsana canýe luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachnějuanënga lemošna chaótejañama. ³Pedro y Juan Bëngbe Bëtsabe bëts yebnoye jamashënguama chë cosheto tojánanyë ora, canýe lemošna chátbioye yojótejañe. ⁴Chatna chë šocá imojtsonýaye, y Pedro tbojaniyana: “Šcochtsënýaye ca.”

⁵As cha yojtsënýaye y yojtsejuabnaye ndayá chjójyëngacñe ca. ⁶Chora Pedro tbojaniyana: “Quetsátsbomna ni crocénana, ni castellano aca jatšetayama, pero atše chanjama Jesucristbe obenánaca ndayá acbiana jamama atše stsobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

⁷Pedro chca tbojaniyana ora, tbojanábuacueshache catsbióicatše y tbojtanatsbaná, y cachora chë cosheto shecuatšiče y shëmiabeñe añemo yojtsatsbomna. ⁸As chë cosheto, canýe jontsënjëse tšabá tojtantsá y tojanontšë tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojtsayontsënjnaye y Bëngbe Bëtsá ibojtsatschuanaye, tbojanshnama. ⁹Chë Bëngbe Bëtsabe bëts yebnentše imojëtsemnënga nyëtscanga cha tmojáninýe tšabá jtsanana y Bëngbe Bëtsá jtsatschuanayana. ¹⁰Chënga

imnatátsëmbo cha chë cosheto
yojamnama, chë nda yojanamana
Bëngbe Bëtsabe bëts yebnoca, chë
Botamana Amashjuanentse jótbemana,
entsanga lemošna jotejañama. Cha
tšabá yojsatsmënamna entsanga
ojnanánënga imojtsemna.

**Ntšamo Pedro tojanoyebuambá
Salomonbe Amashjuana
ca uabáinentše**

¹¹Chë cosheto ya shnaná ora, ndoñe
yontseboše Juan y Pédrëbentšana
joluárana. As, nyetsca entsanga
ojnanánënga tmojanótjajo chë
amashjuana otsbojebniñe, Salomonbe
Amashjuana ca uabáinoye, chë
Juan, Pedro y chë cosheto shnaná
imojtsemnoye. ¹²Pedro chë entsanga
tojánanyë ora, tojanéyana: “Taitanga
y mamanga, Israeloquënga, ¿ndáyeca
chë soyëngama ojanánënga
šmojtsemna? ¿Ndáyeca nyë
šcojtsëbuútja? ¿Šmojtsejuabná nyë
bëndatbe obenánaca quem boyabása
tifjashná ca? ¿O šmojtsejuabná
quem boyabása tifjashná bëndata
Bëngbe Bëtsá puerte tšabá
ftsadoránayeca? ¹³Bëngbe Bëtsá,
ndábeñe Abraham, Isaac y Jacob
imojanošbuaché y ndábeñe bëngbe
bëts taitanga imojanošbuaché, cha
tonjinýanyé chabe oservená Jesús
chë más uamaná yomnama. Cha
tšëngaftanga chë mándayëngbe
cucuatšiñe šmonjánboshjona
chamóbama. Pilato enjëtseboše Jesús
jëtšboshjonama, pero tšëngaftanga
Pilatbe delante šmonjánayana chca
ndoñe šmontsanboše ca, y chíyeca
Pilato ndoñe tbonanboshjona.
¹⁴Jesús uamaná y nyetsca
soyënguñe tšabá amá enjamna, pero
tšëngaftangna cha šmontsanaboté
y Pilato šmonjanimpadá chabe

cuenta canye boyabása, entšá
obanayá, chabuatsboshjonama. ¹⁵Y
chca, chë ndegombre tšabe vida
chašmotsebofnama amábioye
tšëngaftanga šmonjanóba. Pero Bëngbe
Bëtsá tojanma cha cháuatayenama y
bënga chë soye fsënjáninyë y chama
fsëndétatšëmbo. ¹⁶Jesús puerte obená
endmënayeca, quem cosheto añémoca
entsatsmëna. Ntšamo šmonjinýe
y šmonjatatšëmboncá ndegombre
tonjopasá Jesúsbeñe betsošbuáchema.
Chë Jesúsbeñe jtsošbuáchiyana
tonjama cha tšabá tšëngaftangbeñe
chaotsatsmënama.

¹⁷“Taitanga y mamanga, atše
sëndétatšëmbo tšëngaftangbe causa
y tšëngaftangbe améndayëngbe
causa Jesús tojanóbanama. Pero
tšëngaftanga chca šmojanma, ndayá
šmojétsamama ntsetatšëmbo.

¹⁸Tempo, Bëngbe Bëtsá chë chabe
juabna oyebuambayënga tojanamëndá
entsanga jábuayenama, chë Bëngbe
Bëtsabe Uámana Uabuayaná puerte
ngmënana yochtsanbomnama.
Morna, ntšamo Bëngbe Bëtsá
tojanayancá ya tonjochnëngo.

¹⁹Chcasna, ngmënaca menójuabonga
bacna soyënga šmojtsamama, chca
amana šmochtsajbaná y Bëngbe
Bëtsabe benache šmochtishache,
chca, tšëngaftangbe bacna soyënga
cha chacmabuajuánama. Chca
chašmojamëse, Bëngbe Bëtsá
echanjama tšëngaftangbe ainaniñe
oyeuayana chašmotsóbofnama, ²⁰y
tšëngaftangbioye bochanjíchmuá Jesús,
chë tempo chabe Uámana Uabuayaná
Bëngbe Bëtsá tbojanbemá. ²¹Canye
te echanjóshjango, Bëngbe Bëtsá
lempe tsmëmacá jëtšbemama. Chë
tentscuana Jesús bontsemna celoca
joquédana. Chca echanjochnëngo
ntšamo Bëngbe Bëtsá chabe juabna

oyebuambnayëngbiajana entsanga tojanabuayenacá. ²² Moisés bëngbe bëts taitanga tojanabuayená: ‘Chë Utabná Bëngbe Bëtsá canye chabe juabna oyebuambnayá ntšamo atše sëndmëncá, cmochanjayentšíchmuá. Cha tšëngaftangbentšana echanjábocna y tšëngaftanga cmontsamna ntšamo chacmojtšëtsësnacá cha jtseyeunanana. ²³ Ndánaca chábioye ndoñe chabonjoyeuná, cha bontsemna chë Bëngbe Bëtsabe entsángbentšana luaroca jtsemnana y chamotsepochochocama ca’ —cha tojánayana.

²⁴ “Y nyetsca chë Bëngbe Bëtsabe juabna oyebuambnayéngnaca Samuel orscana, entsanga tmojanabuayená ndayá quem tempo yochjanchnënguama, ntšamo mora montsonyáca. ²⁵ Chabe juabna oyebuambnayéngaftaca Bëngbe Bëtsá tojanašebuachená bëts soyënga tšëngaftangbiama, y tšëngaftangbe bëts taitángaftaca canye trato tojánbema; chë soyënga cabá tšëngaftangbiama entsemna. Bëngbe Bëtsá Abrahámioye mëntšá tbojanianyana: ‘Chë ácbentšana entsángbeyeca tšabe bendicionënga chanjama nyetsca quem luarentša entsangbiama ca.’ ²⁶ Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnana ca” —Pedro tojánayana.

Pedro y Juan Jerusalenentša mandadëngbe delante

4 ¹ Pedro y Juan cabá entsanga imojtsëtsësnaye; chorna chë chata ibojtsemnoye tmojánashajjna

judiëngbe bachnanga, Bëngbe Bëtsabe bëts yebntšá soldadëngbe amëndayá y saduceo ca uabaina judiëngbe amëndayënga. ² Chatna entsángbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashajjna amëndayënga tojánétëna. ³ As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana. ⁴ Masque chca, banga entsanguentšana, ntšamo Pedro y Juan tbojanayancá tmojanuenënga, añe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nye boyabásenga jacuéntase.

⁵ Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna. ⁶ Chéntšnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nyetsca pamíllangnaca. ⁷ Chora chënga tmojanmandá Pedro y Juan junatsama, y chëngbe tsëntsaca tojanatsá y mëntšá tmojanatjá: —¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

⁸ As Pedro, chë Uámana Espiritu chabe ainaniñe corente jtsemándayëse, mëntšá tojanéjua: —Israeloca mándayënga y bëtsëjemënga, ⁹ mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama.

¹⁰ Chcasna, ntšamo tojopasama cbochanjabuayená, chca, tšëngaftanga y nyetsca Israeloca entsanga chë

soyënga chašmotsetatsëmbuama. Quem boyabása, chë tšëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tšëngaftanga šmonjancrucificá y ndabiana Bëngbe Bëtsá tojanma cháuatayenama.

¹¹ Jesusbiana Bëngbe Bëtsabe uabemana palabrënguine mëntšá endayana: “Chë yebna jebuanënga tmonsanaboté ndëtšbé, mora chë más bëts uashacuanëšentše entsejájona ca”. Tšëngaftanga šmondmëna mo chë yebna jebuanëngcá, er Jesúsbiye šmonsanaboté y mora cha chë más uamaná entsemna.

¹² Nye cha yobena tšëngaftanga játsebacama. Bëngbe Bëtsá ndocna inye entšábiye tbonjatšetá chabe obenana chca jamama; chíyeca quem luarentše ndocná más quenátobena bënga játsebacama. Nye Jesucristbe obenánaca aíne ca —Pedro tojánayana.

¹³ Chënga imojenjaná Pedro y Juan tša añémoca ibojtsóyebuambnama tmojáninye ora, y chata tempo nduatsjínjenata y librëša nduabuatmata bëtsemnama tmojántatšëmbona ora. Chca chë mándayënga tmojántatšëmbona chata Jesúseftaca bayté ibojamnama.

¹⁴ Y entšanga imojtsonyaye chë tmojanshná cha chentše cháaftaca yojtsemnama; chë causa, chënga ndocá más tmonjanobená chatbe contra jatichámuaana. ¹⁵ As chora tmojanamëndá chentšana chábuaisebocnama y chentše tmojanoquedangna chë soyama imojtsenatsësnaye. ¹⁶ Chënga imojtsentjanaye: “¿Ndayá cháaftaca mochjama ca? Jerusalemëntše oyenënga montsetátšëmbo chata chë bëts soye Bëngbe Bëtsabe

obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca.

¹⁷ Pero entšanga chama ndoñe más chamondëtsencuëntamna, chata mochjáuyana: ‘Ndoñe más entšángbeñe Jesús šmattsebáyana; y ndoñe chašmonjouenëse, jabuache castigo šochántsebomna ca.’ ”

¹⁸ As chë mándayënga cachiñe chata tmojánachembo y tmojanamëndá ndoñe más Jesús jtsebáyanana, ni chabiana entšángbeñe jtsabuátambayana. ¹⁹ Pero Pedro y Juan tbojánayana: “¿Ntšamo tšëngaftanga šmatjayana ntšamo fchanjayanama ca? Ndegombre, Bëngbe Bëtsabe bominiñe ndoñe tšabá quenátsmëna tšëngaftangbiye aíne joyaunayana y chábiye ndoñe.

²⁰ Er bënga queftsátobena jtsajbanana oyeuambnayana chë tifjinye y tifjouena soyëngama ca.”

²¹ Chë mandayëngna chátbiye tojtsanautatjá, pero chentšana tmojtanabáshejuana. Nyetasca entšanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinjenana ntšamo chata jácastigama. ²² Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

**Jesucristbeñe ošbuáchiyënga
Bëngbe Bëtsá tmojanimpadá
más añemo chauatšatama**

²³ Pedro y Juan ya tmojtanabáshejuana ora, tbojánata chë inye ošbuáchiyëngaftaca jateninjenama y lempe ntšamo chë bachnangbe amëndayënga y bëtsëjemëngcá mándayënga chátbiye tmojanëyancá, chëngbiye tmojanacuntá. ²⁴ Chënga

chca tmojanuენტšana, n̄yetscanga cányiñe tmojanontšé Běngbe Bětsáftaca mēntšá jencuéntama: “Běngbe Utabná, aca chē nda tojama celoca, fshantse, n̄yetsca bėjayēnga y lempe ntšamo chenache yomncá, ²⁵ chē Uámana Espíritbiajana tcojánayana y acbe oservená David, ntšamo tcojanayancá tojanábema, mēntšá:

¿Ndáyeca entšanga yapa imojtsetšátjaye ca?

¿Ndáyeca imojtsejuabná n̄ye bonamentiama soyēnga jamana?

²⁶ Quem luarentša reyēnga y amēndayēnga imoprontánēnga, n̄yetscanga tmojenoyeuná Běngbe Bětsá y chabe Uámana Uabuayaná chē Cristbe contra jtsemnama ca —cha tojanábema.

²⁷ “Ndegombre chca tonjopasá. Rey Herodes y Poncio Pilato, quem bēts pueblentše, ndoñe judiēngaftaca y israelitēngaftaca tmonjánenefjna, jenóyeunayama ntšamo jamana, Jesús chē acbe uámana oservená y chē Uámana Uabuayaná tcojabemábioye jóbama. ²⁸ Tempo, Běngbe Bětsá, acbe obenánaca y ntšamo icnaboščá tcojanmandá ntšamo mora chaotsemnama, y chēnga chca Jesúseftaca tmonjama. ²⁹ Morna Běngbe Bětsá, mouena ntšamo chēnga montsichamo, bēnga jasúfriama cašojsamna ca; chcasna, cochjama bēnga fchayobená Jesusbe tšabe noticiēnga bēts añémoca entšángbeñe jtsóyebuambnayama, ³⁰ y cochjama acbe obenánaca šoquēnga tšabá chamotsatsmēnama y cochjama bēnga fchayobená bēts soyēnga jamama, Jesús chē uámana oservenabe obenánaca y cha jótšēmbonēse ca” —chēnga tmojánayana.

³¹ Běngbe Bětsáftaca jencuéntama tmojanpochocá orna, chē

tmojánenefjntše tojanangmémama; y n̄yetscangbe ainaniñe chē Uámana Espiritu tojanontšé más jtsemándayana, y chēnga tmojanontšé más añémoca Běngbe Bětsabe soyēngama entšanga jábuayenama.

N̄yetsca bomna soyēnga n̄yetscangbiama yojtsemna

³² Jesucrístbeñe ošbuáchiyēnga, n̄yetscanga can̄ye juabna imojtsebomna y ainaniñe cach can̄ye ebionana.

Ndocná ntjatichamuana chabe soyēnga n̄ye chabiama yojtsemna ca, pero añe imojtsichamo, “atše séndbomna soyēnga n̄yetscangbiama entsemna ca”.

³³ Chē Jesusbe ichmónēngna puerte obenánaca mēntšá imojtsichamo: “Fsēnjinye y fsēntsetatšēmbo Běngbe Utabná Jesús obanēnguentsana tojtayenama ca.” Y Běngbe Bětsá yojtsama chē ichmónēnga bētsá tšabe bendicionēnga chamotsebomnama.

³⁴ Jesucrístbeñe ošbuachiýēngbeñe ndocná yonjamna ndayánaca uajabotá, er n̄yetscanga fshantse o yebna bomnēnga imoanamana jtsatobuíyana, y chē crocénana ³⁵ chē ichmónēngbioye jayentšbuáchiyana, ntšamo tojtsējabotcá n̄yetscanga jujátayama. ³⁶ Chca tojanma can̄ya Běngbe Bětsabe bēts yebnoca trabajayá, José ca uabainá; cha chē ichmónēnga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. ³⁷ Chana, fshantse yojtsatobuiye, y chē crocénana Jesusbe ichmónēngbioye yojáyentšbuachiye, chē uajabótēngbiama chaoservema.

Ntšamo Ananías y Safíraftaca tojanopasá

5 ¹ Inamna can̄ye bacó, Ananías ca uabainá, y chabe shemna, Safira

ca. Chatna canÿe fshantse tbojániye.
² Ananías y Safirna tbojanenóyeunata; chcasna, batśá crocénana cachatbiamia tbojanobuajó y chë tojanójama crocénana ichmónëngbioye Ananías tojanamba, pero tojanéyana chana canjamna nyets crocénana ntsachetśá chë fshantsama tbojanosháchiñe ca. ³ As Pedro tbojaniyana: “Ananías, ðndáyeca tcojalesenciá Satanás acbe ainaniñe bacna juabnënga chacmócochënguama, Uámana Espíritu chë crocénánama jabuambayama ca? Acna chë fshantsama tcmojtabuená crocénántśana cach acbiamia batśá tcontábojama. ⁴ Cabá ntsatobuiye ora, chë fshantse ácbeshe endánmëna y tcojtsatobuíyentśana chë crocénana acbiana y chánaca condánobena ntśamo tcojtseboścá jamama. ðNdáyeca acbe ainaniñe tcojajuabó chë crocénánama chca jobostérama? Chca jamëse, ndoñe nyë entśángbioye quecatabuambná, sinó Bëngbe Bëtsánaca ca” —Pedro tbojaniyana.
⁵ Ananías chë palabrénga tojanuena ora, obaná tojánshajaye. Y nyetscanga chama tmojántatśëmbonënga corente imojtsauatja. ⁶ Chentśana, básefta bobontśënga tmojánashajana y Ananíasbe cuerpo entśëjuaca tmojanandmaná y jauátbontśama tmojanamba.
⁷ Mo unga horëntscose, Ananíasbe shema Safira tojánashjango, pero ndoñe yontsetátśëmbo ntśamo chabe boyáftaca tojanopasama. ⁸ Chora Pedro tbojantjá: —Ndegombre śmëyana, ðchë śmonjayana nyetśnama chë fshantse śmojiye ca?
 As chë shema tbojanjuá: —Añe, nyetśnama fsënjiye ca.
⁹ Pedro tbojaniyana: —ðNdáyeca tsëndata šojenoyeuná Bëngbe Utabnabe Espíritu jabuambayama, y

cabá castigo jtsebomnama ndoñe šontsobatmana ca? Acbe boyá jauátbontśama tmonjuambënga muentśe bëšoca montsemna y mora ácnaca cmochanjuamba ca.

¹⁰ Cachora Safira Pédrëbe shecuatśentśe obaná tojánshajaye. Chë bobontśënga tmojtanamáshjna ora, obaná Safira tmojáninyëna; asna, chentśana tmojanamba y cachabe boyabe juachaca tmojanatbontśá. ¹¹ Y nyetsca Jesucristbeñe ošbuáchiyënga chentśe imojtsemnënga y nyetscanga chë soye tmojántatśëmbonënga, corente imojtsauatja.

**Ba bëts soyënga chë ichmónënga
tmojanma, Bëngbe Bëtsabe
obenana jinÿanÿiyama**

¹² Chë Jesucristbe ichmónëngaftaca ba bëts soyënga entśángbeñe yojtsebinÿna Bëngbe Bëtsabe obenana jinÿanÿiyama; y nyetsca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebntśe. ¹³ Chë ínÿënga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtsenutana; pero entśangna chë ošbuáchiyëngbiamia tśabá imojtsencuëntaye. ¹⁴ Bëngbe Utabnábeñe ošbuáchiyënga más imojtsóbotena, bëtscá boyabásënga y shembásëngnaca. ¹⁵ Tśa bëts soyënga chë ichmónëngaftaca yojtsebinÿna; chíyëca entśanga imojanamana jutsnëshangañe y tjuashënguñe tsáshenoye šoquënga jubuacnana, chca, Pedro chëjana tojtsachnëjuana ora, nyë mo chabe sómbrenaca chëngbe cuerpëjana chaochnënguama, shnánënga jtsatsmënama. ¹⁶ Jerusalén chábuañe pueblënguëntśana ba entśanga imojanamana jabana, y

šoquënga y bacna bayëjbe juabna uambayënga imojtsëyabó; y nyetscanga shnánënga imojtsatsmëna.

Bëngbe Bëtsá tojanma Pedro y chë inye ichmónënga cárcelocana natjëmbana chámuaisebocnama

¹⁷Chë ichmónënga tša tsábá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna. ¹⁸As chë ichmónëngbiye tmojánishëche y chë bëts pueblentša cárceloye tojtsanëtame. ¹⁹Pero ibetna, Bëngbe Utabná canyë ángel tbojanichmó y chë utámenentša bësašangá cha tojánatëfjo, chënga tojtanëbuacna y mëntšá tojanéyana: ²⁰“Motsajna, Bëngbe Bëtsabe bëts yebnentše šmochjámashjna, y entsanga šmochjabuayená ntšamo cuanjama chë nyetsca tescama yomna tsabe vida jtsebomnama, Jesucristoftaca cányiñe mo canyáca jtsemnëse ca.” ²¹Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontsé entsanga jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtsëjemëngcá mándayënga y inye chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatšama. ²²Pero chë soldadënga chë utámenoye tmojánashjajna ora, chënga chentše ndoñe tmonjánanýena. Chcasna, chënga tmojtaná chë mándayënga chca jaúnayama. ²³Y tmojánayana: “Chë utámenoca fsënjínýena lempe tsábá endëtsëtámeñe y soldadëngna nyetsca bësašangá monduabojanyanga; pero fsënjatëfjo y tsoye fsënjámashjna orna ndocná chibiátinýena ca.”

²⁴Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsëtëmnana y imojtsentjanaye ndayá chentšana yochjanopásama. ²⁵Chorna, chënga imojtsemnentše canyë boyabása tojánashjango y mëntšá tojanéyana: “Chë šmojutámiënga mora Bëngbe Bëtsabe bëts yebnoca montsemna, entsanga montsabuatambá ca.”

²⁶Chë soldadëngbe amëndayá tojána soldadëngaca, chë Jesube ichmónënga junatsama; pero nye tsábá tmojanënatse, er chënga entsangbiama imojtsauatja, nderado cachëngbiye ndëtsbéngaca muantsëbaye.

²⁷Chëngbioca tmojánëshejajna ora, mandayëngbiye tmojanënatse; chora chë bachnangbe más uámana amëndayá mëntšá tojanéyana:

²⁸—Bënga jabuachana tcbontsëuyaná y tcbonjáuyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tsëngaftanga nyetsca chë Jerusalemntša oyenënga chabe soyëngama šmojtsabuatambá y šmojtseboše, cha tojanóbanama castigo bëngbeñe chaotsemnama ca.

²⁹Chorna, Pedro y chë inye ichmónënga tmojánayana: —Bënga šontsamna natsana Bëngbe Bëtsá joyeunayana y chentšana entsángbiye.

³⁰Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tsëngaftanga šmonjanóba canyë cruciñe juajabonjëse. ³¹Bëngbe Bëtsá tbojatsbaná y chabe catšbioica tbojétsbema, jtsamëndayama, y tbojábema entsangbe Unachayá y Atsebacayá, chca, Israeloca entsanga ngmënaca chamuenójuaboma

bacna soyënga imojtsamama y chca amana chamotsajbanama, y chëngbe bacna soyëngama perdonänënga chamotsemnana. ³²Bënga fséntsichamo ndayá bënga ndegombre tifjinÿe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtsama chë Uámana Espíritu cháumashëngo chë tmojtseyeunanëngbe ainaniñe jtsemándayama ca —chënga tmojánayana.

³³Chë mándayënga chca tmojanuena ora, puerte tmojanotjayaná y tmojánbošena chë ichmónënga jtsëbáyama. ³⁴Pero chë mándayënguentše yojtsemna canÿe fariseo, Gamaliel ca uabainá. Chana canÿe ley abuatambayá inamna y entšanga puerte imnarrespectana. As cha tojantsá y tojanmandá chë ichmónënga ratotema chentšana jubuacnama. ³⁵Chentšana chë inÿe mándayënga tojanëyana: “Israeloca taitanga, puerte cuedado šmochtsebomna ntšamo quem boyabëngaftaca šmochjamama.

³⁶Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canÿe uámana entšá canjamna ca, y mo canta patse entšanga cha tmojanasto. Pero chora ínÿenga cha tmontsanóba y chabe ústonënga tmontsanáshana, y chca lempe tontsanopochocá. ³⁷Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca ínÿenga tmontsanóba y nyetsca chabe ústonënga tmontsanáshana.

³⁸Chíyeca atše cbëyana, quem boyabásenga matabáshejuana y

ndocá mataborlánana. Ntšamo chënga montsamancá, nÿe entšangbe juabna y nÿe chëngbe trabajo tojtsemnëse, betesco echanjopochóca. ³⁹Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyënjanama. Cuedado šmochtsebomna, nderado mo Bëngbe Bëtsabe uayayënga šmuatjanenobiama ca” —cha tojanëyana.

Y as chënga Gamaliel tmojanoyeuná. ⁴⁰Chcasna, chë ichmónëngbiocyte tmojánachembo, tmojtsanachebuánganja y tmojanëyana Jesusbe uabáinaca entšangbeñe ndoñe chamondëtsoyebuambná ca; y chentšana tmojtanabáshejuana.

⁴¹Chora chë ichmónënga chë amëndayëngbentsana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiamá oservënënga bëtsemnayeca. ⁴²Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnana entšangbiocyte imojanabuayiyiná, Bëngbe Bëtsabe bëtš yebnentše y yebnënguenáchnaca.

Chë ichmónëngbiamá ujabuáchanënga tmojanëbuáyana

6 ¹Chë tempo, Jesucristbeñe ošbuáchiyënga betesco imojtsóbotena. Chora chë Jesucristbeñe ošbuáchiyëngbentše, chë judiënga griego biyanga batsá imojtsetšátjaye y chë judiënga hebreo biyangbiamá mëntšá tmojánayana: “Chë griego biyange viudángbiocyte ndoñe cachcá quemnatëjabuáchana ntšamo chë hebreo biyange viudángbiocyte cada te montsëjabuachancá ca.”

²Asna, chë bnëtsana uta ichmónënga nyetsca chë

Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nÿe chë viudanga jtsanÿenama chë tojtsëjajoboto soyënguiñe. ³ Chcasna, baconga y batanga, tšëngaftanguentšana canÿsëftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espiritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye. ⁴ Y bëngna šontsamna nÿets tempo Bëngbe Bëtsáftaca jtsencuéntayana y Bëngbe Bëtsabe palabra entšanga jtsabuayiyayana ca” —chënga tmojánayana.

⁵ Nÿetscanga tojanogusetá ntšamo chë ichmónënga tmojanayancá; as, Esteban tmojanábuayana; canÿe boyabása puerte ošbuachiyá cha inamna y chë Uámana Espiritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entšá, Antioquía bëts pueblócá, y cha yojanamana Bëngbe Bëtsá jtsadoránana mo cach judiëngcá). ⁶ Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguiñe chë ubuáyanënga chaújabuachama, chëngbe cucuatšënga chëngbe bestšaëntšë jajájuase.

⁷ Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalemëntšë más ošbuáchiyënga betscó imojtsóbotena. Y ba judiëngbe bachnángnaca tmojanontšë

Jesucristbeñe jtsošbuáchiyana, ntšamo chë ínÿenga imojtsanošbuachecá.

Esteban tmojánishache

⁸ Esteban, Bëngbe Bëtsabe obenana y chábentšana tšabe bendicionënga yojtsebomnëse, entšángbeñe bëts soyënga yojtsama. ⁹ Báseftanga “Ya Cachcá Atabashejuana Oservënënga ca” uabainëngna tmojanontšë Estébanoftaca enatsëtsnayana. Chënga imojamna judiënga Cirenoquënga, Alejandriokuënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservënëngbe Yebna ca”. ¹⁰ Pero chë Uámana Espiritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntšamo cha jojuana. ¹¹ As chënga báseftanga tmojanëbuénaye Estébanbe contra podesca soye chamuayanama, mëntšá: “Cha fsënjoyeuná Moisesbiana y Bëngbe Bëtsabiana ndoñe tšabá jtsóyebuambnayana, mo cuafjoyanguangcá ca.” ¹² Chcace chënga tmojanma entšanga, bëtsëjemëngcá mándayënga y ley abuátambayënga Estébanbe contra chamóntša enbouenanana; y as, Esteban tmojanotbá y chë mándayënga imojtsemnoye imojuíchëmo. ¹³ Y tmojanënatse básefta entšanga, uayátsenaye soyënga y podesca soyënga Estébanbe contra chamuayanama; as chënga mëntšá tmojánayana: “Mua bacna soyënga entsichamo chë Bëngbe Bëtsá jtsadoránama bëts yebnama y Moisesbe leyëngama. ¹⁴ Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtsepochóca y caochjama bënga nÿe chabe mandéngaca

mandánēnga chamotsiyenama y ndoñe ntšamo Moisés bēngbe bēts taitanga tojēftsanabuatambacá ca.”

¹⁵Chē mándayēnga y nyetscanga chentše imojétsetbiamanēnga Esteban tmojanonjinyé ora, tmojáninye chabe jubíá yojtsebuashinjinjyana mo canye ángelbe jubiacá.

Ntšamo Esteban tojanenēuyaná

7 ¹Chora chē bachnangbe más uámana amēndayá, Estébanbioye tbojantjá: —¿Ntšamo acbiana montsichamcá ndegombre yojtsemna ca?

²As Esteban tojanéjua: —Taitanga y baconga, mouenēnga. Bēngbe Bētsá, chē corente uamaná endmēná, Abrahámbioye tbojánēbēbocna, cha Mesopotamioca yojaniyena ora; tbojánēbēbocna, Harán bēts puebloca joyénanama cabá nda ora, ³y Bēngbe Bētsá tbojaniyana: “Metseboshjona acbe fshantse y acbe pamíllanga y cbochanjinjinjyie luaroye cochjá ca.” ⁴As Abraham chabe luare Caldea tojēftsanboshjona y tojána Haránoca joyénanama. Chabe taitá tojanóbanentšana, Bēngbe Bētsá Abrahámbioye chē luaroye tbojanánatse, chē mora tšēngaftanga šmontsiyenentše. ⁵Pero quem luariñe ni mo base fshantse ndoñe tbonjēftsanatsetá, ni mo ndayentše jtsiyenama. Pero añe Abrahámbioye tbojanšbuachená chē fshantse jatšetayama, chabíama y chabe básengbíama, Abraham tojóbanentšana. Chca tbojanšbuachená ora, Abraham ni canye šešona bonjánbomna. ⁶Y Bēngbe Bētsá mēntšá tbojaniana: “Chē ácbentšana entšanga, injyengbe luaroca áshjajnēnga mochántsemna, y choca oyenēnga chēngbe oservénēnga chēngbioye mochanjábíama

y canta patse uatēntscuana jabuache mochanjasufrina ca.” ⁷Y mēntšánaca tbojanianyana: “Pero atše chanjácastigaye chca oservénēnga chacmojábíama luarentša entšanga; y as, chentšana chē ácbentšana entšanga mochanjésebocana y mora bontsemna luaroye mochanjésabo y muentše atše šmochántsadorana ca.” ⁸Bēngbe Bētsá Abrahámbioye tbojanšbuachená nye cha y chabe básengbe Taitá cha jtsemnama y jamama tšabe bendicionēnga chēngbeñe chaotsemnama, y chama, chaotsinjnamna tbojanmandá chabe šešona, boyabásetema tojonjyá ora, base bobachtema chē más delicadentše jatētsana. Chíyeca, chabe uaquiñá Isaac tojanonjyá ora, posufta tianoye Abraham base bobachtema chē más delicadentše tbojantētše. Isaac cachcá tojanma chabe uaquiñá Jacóboftaca y Jacob cachcá tojanma chē chabe bnētsana uta uaquiñēngaftaca. Chēnga monjamna chē Israeloca bnētsana uta bēts pamíllangbe taitanga.

⁹“Quem uaquiñēnga bēngbe bēts taitanga monjamna. Chēngna, chēngbe uabentsá Josébioye envidia imnabomna y tmojtsatanobuiye, Egiptoey canye oservenacá chamotsánatseñama. Pero Bēngbe Bētsá Josébioye nyets tempo ibnauájabuachana, ¹⁰chíyeca nyetsca chabe ngmenēnguentšana tbojanatsbocá y Bēngbe Bētsá tojanma cha chaotsetatšēmbuama tšabá jóyebuambayama chē Egiptoca réybentše, Faraón ca uabainá. Bēngbe Bētsá tojanma chē Faraón chaoyejuá ntšamo José yojamnama; chíyeca Faraón Josébioye tbojánbema Egiptoca mandado y chabe yeñnguentše oyenēngbíamnaca.

¹¹“Chē tempo, Egiptó y Canaán luariñe bēts shēntsana tojanóshjango

y puerte ngménana yojtsemna y bēngbe bēts taitanga ndoñe imontsobena saná jónyēnama. ¹² Pero Jacob tojántatšēmbona Egiptoca saná yojtsemnama; asna, chabe uaquiñēnga, chē bēngbe bēts taitanga choye tojanichamó. Chora yojamna chē natsanama chēnga Egiptoye jama. ¹³ Uta soyama chēnga tmojtesaná ora, José chabe catšátanga tojanéyana: ‘Atse José sēndmēna, tšēngaftangbe uabentsá ca.’ Chca chē Faraón Josebe pamíllangbiana tojántatšēmbona. ¹⁴ Chentšana, José tojanmandá chabe taitá Jacob y nyetsca pamíllanga Egiptoye chamotsama. Canyēsēfta bnētsana shachnēnga imojamna chē Egiptoye tmojánanga. ¹⁵ Chcasna, Jacob Egiptoye tojána choca joyénanama. Choca cha tojanóbana y chē inye bēngbe bēts taitángnaca. ¹⁶ Jacob y chabe básenga, ntšamo imojtsobancá, chēngbe cuerpo Siquem bēts puebløye imojtsatambaye y tmojanētebuantsá, Abraham tojēftsanbuamé cuevēshēnguiñe. Abraham canyē crocénánama Hamorbe uaquiñēngbiøye, chēshēnga yojtēyentšbuamiñe Siquem puebloca. ¹⁷ “Ntšamo Bēngbe Bētsá Abrahámbyøye tbojanšbuachenacá jamama yojtsobeco ora, Egiptoca corente tmojanoboté Israeloca entšanga y banga chēnga imojtsemna. ¹⁸ Cabana, Egiptoca inye rey tojanoyayé y cha Josébyøye ndoñe tbonjanabuátmana. ¹⁹ Chē reyna, bēngbe entšanga, chē bēngbe bēts taitángbyøye tojanaingñe y tojanma chēnga puerte chamosufrima; tojanaméndá, chē tmojtsónyina šešonatēmēnga cachcá jtsēnyayana chamatóbanama. ²⁰ Chē tempo canyē básetema tojanonýná y cha Moisés ca tmojanabaye. Bēngbe Bētsá Moisesbiana oyejuayá yojtsemna

y chabe bētsétsata cach yebnentše tmojanboché unga ishinýentscuana. ²¹ Cachcá jonýayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché. ²² Chca, chē Egiptoquēnga imnatátšēmbø soyēnga Moisés tmojanbuatēmbá y canyē uámana entšá tojánbocna jóyebuambayama y ndayánaca jamama.

²³ “Canta bnētsana uata tojánashjache ora, tojanenojuabó jama jtsetatšēmbuama ntšamo chē Israeloquēnga, chabe entšanga imojtsemnama. ²⁴ Canyē, Moisés tojáninýe canyē Egiptocá canyē Israelocábbyøye ibojtsejantšetaye ora; as Moisés tbojanoboguiyaná y chē Egiptocábbyøye tbojtsanóba. ²⁵ Moisés yojtsanjuabnaye chē Israeloquēnga yojtsósertana, Bēngbe Bētsá yochjanma cach Moisesbe obenánaca chē Egiptoca mandentšana chēngbyøye játsebacama ca. Pero chē Israeloquēnga ndoñe yontsésertana. ²⁶ Yēfsana, Moisés tojánanýena útata, cach Israelocata, ibojtsentsjanaye; chora cha betso tojána jetséuyanama y tojanéyana: ‘Tsēndata catšata šondmēna, ¿ndáyeca šojtsentsjanata ca?’ ²⁷ As, chē ínýabyøye ibojtsetsjanayá Moisésbyøye tbojtsanajuatsēntše y tbojanianyana: ‘¿Nda bēngbeñe tcmēnjajayé mandado y chē tšabá o ndoñe tšabá ftsamama chacuayanama ca?’ ²⁸ ¿Cojtseboše átšnaca jóbama, ntšamo tonjopasá yēfse chē Egiptocábbyøye tconjobacá ca?’ ²⁹ Moisés chca tojanuena ora, Madián luaroye tojtsanachá y choca yoyoyena inye luarocana ashjanganocá. Chentše uta uaquiñata yojēftsabamna. ³⁰ “Chentšana canta bnētsana uatēse, entšanga ndoyena luariñe, Sinaí tjañe béconana, canyē ángel tbojánēbēbocna zarzēsha

yojtsángbototjuanentše. ³¹ Moisés yojenjaná ndayá yojtsonyama y tšabá jinŷama tojanobeconá ora, tojanuena Bëngbe Bëtsá mëntšá ibojtsatsëtsnaye: ³² ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontsebomna choye jontješiyama. ³³ As Bëngbe Utabná tbojaniyana: ‘Motsenóshecbotsca, er aca contsemnentše nŷe atšbiana luare endmëna, er átšnaca chentše séntsemna. ³⁴ Ndegombre sënjinŷe ntšamo atšbe entšanga Egiptoca montsesufrina y sënjouena chëngbe oyabouyayana, y atše sënjabo chënga jabátsebacama. Chcasna, mabouena, Egiptoye cbochanjíchmuca ca’ —Bëngbe Bëtsá tbojaniyana.”

³⁵ Chentšana Esteban tojanéyana: “Quem Moisés entšanga tmojtsanaboté y tmojaniyana: ‘¿Nda béngbeñe tcmënjajayé mandado y chë tšabá o ndoñe tšabá ftsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëštë tojanobinŷná ángeloftaca. ³⁶ As Moisés, bëngbe bëts taitanga Egiptocana tojésanébuacna y bëts soyënga tojanma, y inŷe soyënga Bëngbe Bëtsabe obenana jinŷanŷiyama Egiptentše, chë Buángana ca uabaina mar béjayentše y entšanga ndoyena luarentše, canta bnëtsana uatëntscuana. ³⁷ Cach Moisés Israeloca entšanga mëntšá tojanéyana: ‘Bëngbe Bëtsá tšëngaftanguentsana canŷa bochanjábema atšcá Bëngbe Bëtsabe juabna oyebuambnayá ca.’ ³⁸ Moisés Israeloca entšangaftaca yojéftsemna chë entšanga ndoyena luaroca. Choca chë entšanga tmojánenefjna Sinaí tjañe béconana. Chentšna canŷe ángel

Moisésoftaca tojanoyebuambá, bëngbe bëts taitángbioye chë buayenana soye Moisés chaóyebuambama, chë entšanga tšabe vida jónyënama palabrënga; y Moisés chca tojanma, béngnaca chë palabrënga joudenama jobenayama.

³⁹ “Pero bëngbe bëts taitanga ndoñe tmonjánbošena joyeunayama, masna nŷe tmojtsanaboté y Egiptoye jeshéconama imojtsaiseboše. ⁴⁰ Moisés cabá chë tja tsjuanoca chë ángeloftaca yojtsemna ora, chëngbe bachnangbe más uamana amëndayá Aarónbioye mëntšá tmojaniyana: ‘Bëngbe Bëtsabe cuenta šmayentšpormá canŷe buashinŷinŷana soye jadórama, bënga chašúnatsama. Er bënga quemátstatšëmbo ndayá yojtsopasana Moisés, chë Egiptocana šonjëftsëbuacnáftaca ca.’ ⁴¹ As tmojanma canŷe buashinŷinŷana soye mo canŷe uacnabecá y cha jadórama ba bayënga tmojanëbaye, y tmojanóboyejuanga cachënga chë soye tmojanpormáyeca. ⁴² Chë causa, Bëngbe Bëtsá chëngbentsana tojtsanojuánañe y cachcá tojesanëñyaye chëngbe bacna soyënga causa, estrellatëmënga chamotsadoránama. Chca jochnënguama, Bëngbe Bëtsabe juabna oyebuambayëngbe librëšañe mëntšá endayana, ntšamo Bëngbe Bëtsá tojanayancá:

Israeloca entšanga,
¿Atše jëtschuayama bayënga
chešmëñjanëbaye y chë soyënga
chešmëñjanátšëmbona,
chë canta bnëtsana uata entšanga
ndoyena luarentše tšëngaftanga
šmonjëftsemna ora?

⁴³ Atše jadóra cuentna, chë
Molocbiana jebna soye
šmonjanacutsá y cha
šmonjánadorana,

y chë Refánbe estréllacnaca
cachá šmonjánama.
Chë soyënga mo Bëngbe Bëtsá
cuenta šmonjånobomna y cach
tšëngaftanga šmonjanobopormá
jadórama.
Mora chë causa atše chanjama,
Babilonientsana más chcoye
tšëngaftanga chacmotsénatsama
ca” —chiñe endayana.

⁴⁴ “Bëngbe tempsca bëts taitanga
entsanga ndoyena luaroca, chë
jatsjacama opodena yebna
imnabomna; chë yebnentše Bëngbe
Bëtsá chëngaftaca tojanoyebuambá.
Inajebna ntšamo Bëngbe Bëtsá
Moisésbioye tbojanmandacá, y cha
tojanma ntšamo chaojebuama Bëngbe
Bëtsá tbojaninjinýecá. ⁴⁵ Bëngbe bëts
taitangna chëngbe taitángbentsana chë
jatsjacama opodena yebna chëngbiana
tmojanóyëngacñe, y chënga chë
Canaán luaroye Josuéftaca, chë inye
luaroquëngaftaca jéntsajama tmojána
ora, chë jebna soye tmojanamba y
chocna, Bëngbe Bëtsábeyeca chentša
entsángbioye Israeloquëngbentsana
tmojanëbuacna; y chë jebna soyna chë
tmojanayëñjaná luarentše tojanoquedá,
rey David vojéftsienëntscuana.

⁴⁶ David tsábá mandbomná inamna,
chýyeca Bëngbe Bëtsá cháftaca puerta
yotsóyejuaye. David chábioye lesencia
tbojanotjañe jajebuama, Bëngbe Bëtsá
chë Jacob tbojanadorá cha, chentše
chaotsiyenama. ⁴⁷ Pero Salomón
inamna nda chë Bëngbe Bëtsabe
bëts yebna tojanjebuá. ⁴⁸ Masque chë
celoca Bëngbe Bëtsá, entsangbe jebna
yebniñe ndoñe quenatiyena. Ntšamo
Bëngbe Bëtsabe juabna oyebuambnayá
tojanabemcá, ndayá Bëngbe Bëtsá
tojanayancá:

⁴⁹ ‘Celoca endmëna chë luare
ndayentsana atše tsmánda,

y quem luare endmëna nýe mo
canýe tšenëtemcá ndayentše
atšbe shecuatšënga chjacajaye.
As, ¿ntšamo atšbiana jebna yebna
šmochjajebo ca?’ —chë Utabná
jayanana—;
‘o ¿ndaye yebnentše atše jóchnama
chjobenaye,

⁵⁰ ndegombre cach atše nyetsca chë
soyënga tijamëse ca?’ ”

⁵¹ Esteban mëntsánaca tojanéyana:
“Tšëngaftanga nyets tempo josértama
ndëbošënga šmondmëna; šmondbomna
ainana mo chë Bëngbe Bëtsábeñe
ndošbuáchiyëngbe ainancá, y Bëngbe
Bëtsabe soyëngama nduauenanënga
šmondmëna. Tšëngaftanga ndocna te
quešmátsboše chë Uámana Espiritu
joyeunayana. Ntšamo tšëngaftangbe bëts
taitanga monjaninyencá, tšëngaftángnaca
cachá. ⁵² ¿Bëngbe Bëtsabe juabna
oyebuambnayënguentšana, ndábioye
tšëngaftangbe bëts taitanga ndoñe
monjanacmena? Chë Bëngbe Bëtsá
tojanichamó entsanga chënga
tmojtsanëbaye, y mëngna entsángbioye
imojanabuayinná Cristo, chë ntšamo
Bëngbe Bëtsá yobošcá amá yochjánabama.
Pero morna, uayayëngbe cucuatšñe cha
šmojáboshjona y šmojóba. ⁵³ Bëngbe
Bëtsabe mandënga angelëngaftaca
tšëngaftanga šmonjanóyëngacñe, pero
chë soyënga ndoñe quešmátsyeunana ca’ ”
—cha tojanéyana.

Esteban ndëtšbëngaca tmojanóba

⁵⁴ Chentša mándayënga
chca tmojanuena ora,
Estébanoftaca tmojanotjayaná y
tmojanenaftëšbonzentsé, rábiaca
imojtsemnama. ⁵⁵ Pero chë Uámana
Espiritu Estébanbe ainaniñe corente
yojtsemándaye. Celoye yojontješiye
y Bëngbe Bëtsabe buashinjinýanana
yojinýe, y Jesús, Bëngbe Bëtsabe

catšbioica vojtsatsana. ⁵⁶ As, Esteban tojánayana: “iMouenënga, sèntsonyá celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

⁵⁷ Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontsënja.

⁵⁸ Chentšana, chënga chë pueblentšana tmojtsanáocna y ndëtšbëngaca tmojtsanatëchënganja. Chë Estébanbioye mal tmojanquedangna entšayangá tmojtsanenátsejca y canyë bobontse, Saulo ca uabainá, tmojesanábonyïñe chaotsinýenama.

⁵⁹ Ndëtšbëngaca imojtsénanantscuana, Esteban Bëngbe Bëtsáftaca ibojtsencuéntaye y mëntšá tojánayana: “Bëngbe Utabná Jesús, atšbe espíritu šmóyëngaca ca.”

⁶⁰ Chentšana Esteban tojanoshamentšë y jabuache tojánayana: “iBëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

8 ¹ Saulo chentše vojtsemma y tšabá imojtsama ca vojtsjuabnaye, Esteban tmojanóbama.

Saulo yojánama chë Crístbeñe ošbuáchiyënga chamotsesufrínama

Cach te, ínýenga tmojanontšë Jesucrístbeñe ošbuáchiyënga Jerusalentšë ucamenana y jtsamana puerte chamotsesufrínama; chcasna, chënga tmojtsanacheta y Samarioye y Judeoye tmojanáshana. Nýe chë Jesucristbe ichmónënga ndócnoye tmonjánacheta. ² Básefta boyabásenga, Bëngbe Bëtsá adórayëngna, Esteban tmojanamba jauátbontsama y chabiamana puerte tmojánenobošachna. ³ Chëntscuana, Saulo vojtsentšëna

Jesucrístbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámiamana.

Felipe Samaria luaroca tšabe noticiëngama yojanabuayiyná

⁴ Y Jesucrístbeñe ošbuáchiyënga tmojanáshañëngna nyetsquénache imojánabuayiyñaye Jesusbe tšabe noticiënga. ⁵ Chca, Felipe Samarioye tojána y tojanontšë chë Bëngbe Bëtsabe Uámana Uabuayaná, Cristbiamana, chentšá entšanga jábuayenama. ⁶ Entšanga imojánenefjuana Felipe joyeunayama y tmojáninýe bëts soyënga cha jtsamana, Bëngbe Bëtsabe obenana jinýanýiyama. Chënga nyetscanga ntšamo Felipe vojtsichamcá tšabá imojtseyunana. ⁷ Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisebocana; y banga jama ndobenënga y coshetënga tšabá imojtsatsmëna. ⁸ Chë soyama chë pueblentšana oyenënga corente imojtsóyejuaye.

⁹ Pero canyë pueblentšë Samarioca inamna canyë boyabása, Simón ca uabainá; cha tempo inamna canyë bocjuaná y chë Samarioca entšanga chabe soyëngama imojánenjanayana. Cha yojánichamo cha canyë uámana entšá canjamna ca. ¹⁰ Y chábioye corente imnayeunana nyetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inýanýnayá ca.”

¹¹ Y ndegombre chënga corente imnayeunana, er cha chë bocjuanana soyëngaca bayté chë entšanga ingñëngna y ojnánanënga

yojtsabamna. ¹² Pero chë luarentša entsangna, Felipe tmojanoyeuná chë cha yojtsëtsësná tšabe noticiënga Bëngbe Bëtsabe amëndayama y chë Jesucristbiana tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabaye. ¹³ Y cach Simónënaca Jesucristbeñe yojtsošbuáchiye y tojanenábaye, y chentšana cada te Felípeftaca cha yojtsanmëna. Cha tojáninÿe Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

¹⁴ Chë Jerusalenoca imojtsemna ichmónënga tmojántatšëmbona Samarioca entsanga Bëngbe Bëtsabe palabra tmojanóyeunama; as, chora Pedro y Juan choye tmojanichamó. ¹⁵ Pedro y Juan Samarioye tbojánashjango ora, chentše Jesucristbeñe ošbuáchiyëngbiana Bëngbe Bëtsá tmojanimpadá, as chë Uámana Espiritu chëngbeñe cháumashënguama jtsemándayama. ¹⁶ Er cabá ni mo cánÿabeñe chë Uámana Espiritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga jtsemnama imojtsebošeyeca. ¹⁷ As Pedro y Juan chëngbe bestšašinë cucuatšënga tbojancjá, y chca, chë Uámana Espiritu tojánamashëngo chëngbe ainaniñe jtsemándayama.

¹⁸ Simón tojáninÿe, chë ichmónënga entsángbeñe cucuatšënga tmojacjá ora, chë Uámana Espiritu chëngbeñe jamashënguana. As chora Simón chë ichmónënga tojanéyana: —Quem crocénana mosháchiñe, ¹⁹ y átšnacá chë obenana šmatšetá, y ndábeñnaca cucuatšënga chajajajó ora, chábeñnaca chë Uámana Espiritu cháumashëngo ca.

²⁰ As Pedro tbojanianya: —iAcbe crocénana infiernoye chaotsá y áncaca, chë Bëngbe Bëtsabe tšetana soye crocénánaca jobuámiñama yopodena ca tcojajuabó causa! ²¹ Ndegombre, aca béngaftaca ndoñe quecátsmëna, ni bëngbe trabajo acbiana quenátsmëna, Bëngbe Bëtsabe delante acbe ainaniñe tšabe juabnënga ndoñe quecátbomna causa. ²² Ngmënaca cochjenójuaboje quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádoše cmatjaperdóna. ²³ Atšë séntsetatšëmbo, acbe ainaniñe tša bacna juabnënga ínÿëngbiana yojtsemnama; y bacna soyënga amana jtsajbanama ndoñe quecátobena causa, aca mo canÿe ntsacjuanacá contsemna ca —Pedro tbojanianya.

²⁴ As chora Simón tojanéyana: —Bëngbe Utabná atšbiana šochjaimpáda, ntšamo šmonjauyancá ndoñe chandëpasama ca.

²⁵ Pedro y Juan, ntšamo Bëngbe Utabná Jesucristbiana tbojaninÿcá y ibnatatšëmbcá entsanga imojtsëtsësnaye. Chentšana, Jerusalenoye tbojésanata y tbojánachnëngo ba Samarioca publënguëjana, tšabe noticiënga entsanga abuayinÿe.

Felipe y chë Etiopía luaroca reinabe uajabuachaná

²⁶ Chentšana, Bëngbe Utabnabe canÿe ángel Felípbioye tbojanianya: “Moprontá y tsmána luarëngoye motsa, Jerusalenentšana Gaza ca uabaina bëts puebloye benachëjana ca.” Chë benachna entsanga ndoyena luarëjana yojanachnëngona. ²⁷ As Felipe yojëftsëtsbaná y tojána. Benachiñe tbojáneninÿena canÿa Etiopía luarocáftaca. Etiopía luaroca canÿe

reiná inamna y chë boyabásana chabe uajabuachaná y chabe cocrocénana bojanýá inamna. Chana Jerusalenoye tojánabo Bëngbe Bëtsá jadórana.

²⁸ Chora Etiopía luaroye yojsataye, chabe cochéshañe inayésenotbemañe, y chë Bëngbe Bëtsabe juabna oyebuambnayá Isaiásbe uabemana libréša yojsaiualíaye.

²⁹ Chora chë Uámana Espíritu Felípbioye tbojaníyana: “Mobeconá y chë cochésha juachaca cochtsaye ca.”

³⁰ As Felipe betesco yojobeconá. Chora yojouena chë Etiopía luarocá, Isaiásbe uabemana libréša yojsaiualíaye; as tbojantjá: —¿Chë contsalía soye quecmojtsosertana ca?

³¹ Y chë Etiopía luarocá tbojanjuá: —¿Ntšamo šochjosérta, ndocná šonjabuayenase ca?

Y Felípbioye tbojaníyana: —Diosmanda, atšbe cochéshoye másëngo y atšbe juachaca mabótbema ca.

³² Isaiásbe uabemana libréšañe mëntšá yojsalíaye:

Cha tmojanánatse mo canýe oveshá jóbama cuafjuanatscá; y chë mo canýe oveshá tmojtsëtsbotjné ora, cha iyteca jtsemnana, chánaca cachcá, chacá tondaye chenátanayana.

³³ Entšanga tmonjanma cha puerta chaosufrima, mo cha canýe nduamaná cuaftsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiana jacuéntana, quem luarentša chabe vida tmontsanbojuaná causa ca.

³⁴ Chora chë Etiopía luaroca uajabuachaná Felípbioye tbojaníyana:

—Diosmanda, šmobuayená, ¿ndabiamna Bëngbe Bëtsabe juabna oyebuambnayá chca yojsichamo, cachabiamna o inýabiamna ca?

³⁵ As Felipe tojanontšé, chë Isaiásbe libréšañe yojsayana sóyeca, Jesusbe tšabe noticiënga jábuayenama.

³⁶ Chentša bënëse, canýe béjaye obëjniñe juachañe ibojsachñējuana. Chora chë uajabuachaná tojánayana: —Muentše béjaye entsemna. ¿Ndayeca ndoñe nanjopódia atše muentše uabainá jtsemnana ca? Diosmanda, šmabaye ca.

³⁷ As Felipe tbojaníyana: —Jesucristbeñe nýets acbe ainánaca tcojtsošbuáchese, añe echanjopódia juabáyama ca.

Y chë boyabása tbojanjuá: —Añe, sëntsošbuaché Jesucristo Bëngbe Bëtsabe Uaquiñá yomnana ca.

³⁸ As chë Etiopiacá tojanmandá chë cochésha chauátotonama. Chentšana, nýets útata chë béjayoye tbojanashëbëbuástjango y Felipe, chë Etiopioca uajabuachanábioye tbojanabaye.

³⁹ Chë béjayentšana tbojtanbocna ora, chë Uámana Espíritu Felipe ibojsánatseñe y chë uajabuachaná ya ndoñe más Felípbioye ibontsonýaye, pero corente oyejuayá yojsatoñe. ⁴⁰ Felipe tojántatšëmbona Azoto bëts puebloca yojtsemnana, y chentšana tojána nýetsca pueblënguenache chë tšabe noticiënga abuayíynaye, Cesarea puebloye jashjanguëntscuana.

Ntšamo Saulo Crístbeñe ošbuachiyá tojanóbema

(Hechos 22.6-16; 26.12-18)

9 ¹ Saulo chëntscuana cabá Bëngbe Utabnábeñe ošbuachiyënga

yojanautatjná jtsëbáyama. Chama cha tojána chë bachnangbe más uámana amëndayábioye, ² uabemana tsbuanachangá jauátjañama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninÿanyé Benache ustoniñe, boyabásenga o shembásenga tojánÿenëse, jótabayama y Jerusalenoye junatsama. Y chca jamama tojánbocna. ³ Pero ya Damasco béconana vojtsaye orna, ñye ndeolpe chabe juachañe celocana canÿe bëts tcuinÿe tojanbuashinÿinÿena. ⁴ Chora Saulo fshantsoye tojánshajaye y canÿe oyebuambnayana tojanuena, mëntsá: —Saulo, Saulo, ¿ndáyeca chca šcojtsacmena ca?

⁵ As Saulo tbojantjá: —¿Nda comna, Bëngbe Utabná ca?

Y chë oyebuambnayana tbojanjuá: —Atše sëndmëna Jesús y aca condama atšbe entšanga chamotsesufrínama.

⁶ Pero matëtsbaná y Damascoye mamáshëngo; chentše canÿa cmochanjabuayená ndayá jamama cmojtsemnama ca.

⁷ Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana; er ñye chë oyebuambnayana tmojanuena, pero ndocná tmonjánínÿe. ⁸ As Saulo fshantsentšana tojtantsbaná y tojtanobuchatéfjona ora, tondaye yontsobena jinÿana. Chcasna, chë inÿenga tmojëftsanobuacuetëntsé y chca, Damascoye tmojanánatse. ⁹ Chentše yojëftsemna unga te, jinÿama ntšobencá, ni ntjascá y tondaye ntjofšiyá.

¹⁰ Damascoca Jesucristbeñe canÿe ošbuachiyá inoyena, Ananías ca uabainá. Cha Bëngbe Utabnábioye mo

otjenayoquécá tbojáninÿe y Bëngbe Bëtsá tbojaniyana: —Ananías ca.

As cha tbojanjuá: —Bëngbe Utabná, ¿ndayá chjama ca?

¹¹ Y Bëngbe Utabná tbojaniyana: —Moprontá y motsa chë “Ndericho tsáshenañe ca” uabáinoye, y Júdasbe yebnentše cochjanotícia canÿe boyabásabiama, Saulo ca uabainábiamna, Tarso pueblócá; cha mora Bëngbe Bëtsáftaca bentsencuénta. ¹² Saulo ya tonjinÿe mo otjenayoquécá, canÿe entšá Ananías ca uabainá entsamashjuana y chabe cucuatšënga chabe bestšašañe entsejájua, chca, cha chabuatabínÿnama ca.

¹³ Ananías chca tojanuena ora, tojánayana: —Bëngbe Utabná, banga ba soyënga chabiamna šmonjaceutá; Jerusalenoca tša bacá acbe entšanga imomnënga tojáborye. ¹⁴ Y mora entsebmoma mando chë bachnangbe amëndayëngbentsána, muentše aca otšëmbuanënga jótabayama ca.

¹⁵ As Bëngbe Utabná tbojaniyana: —Motsa, er atše cha sënjuábuayana atšbiamna chaotrabajama; chaóyebuambama ndoñe judiëngbeñe, reyëngbeñe y Israeloca entšángbeñnaca, y chca, chënga atšbiamna chamotatšëmbonama.

¹⁶ Atše cha chanjinÿinÿiye ntsachetšá ibojtsemna átšbeyeca jasúfriama ca.

¹⁷ As Ananías tojána Saulo vojtsanmëna yebnoye. Tojánamashëngo ora, Saulëbe bestšašañe chabe cucuatšënga tojanjájó y tbojaniyana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabínÿnama y chë Uámana Espiritu acbe ainaniñe jtsemándayama cháumashënguama ca.”

¹⁸ Cachora, Sáulëbe bominÿentšana mo beonbe bobachëshëngcá

tojanquécjana, y chca, ibojtsatabinýna; chora tojantsbaná y tojanenábaye.

¹⁹Chentsána, Saulo tojanse y añemora yojtsatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

Damasco puebloca Saulo entšanga yojanabuayiná

²⁰Saulo cachorscana tojanontšë jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama.

²¹Chë imojtsuenanënga nýetscanga imojtsenjanaye y mëntšá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascocoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšinë jabáshejuanama.”

²²Pero Saulo cada ora más añémoca yojtsóyebuambnaye y puerte tšabá yojaninýanýná Jesús Bëngbe Bëtsabe Uámana Uabuayaná bëtsemnama. Chýeca chë Damascoca judiënga ndoñe imontsobena ntšamo cha jojuana.

Ntšamo Saulo judiëngbentšana tojtsanachá

²³Bayté tojanochnëngo ora, judiënga tmojanenoyeuná ntšamo jamëse Saulo jóbama, ²⁴pero Saulo chë soye tojántatšëmbona. Bnëtë y ibeta, chë bëtš pueblentša bëššanguenache chënga chabiana imojananyá, jtsóbama; ²⁵pero chë Jesucristbeñe ošbuáchiyënga, ibeta, cha canýe bëtš sbarëcuiñe tmojtsanatsamá, y chë pueblentša shéconana tapišëjana tmojtsanëštjango. Chca cha tojanotsbocá.

Saulo Jerusalenoca

²⁶Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nýetscanga imojtsebiauatja y ndoñe imontsošbuaché Saulo Jesucristbe ustoná yojtsemnama. ²⁷Chcasna, Bernabé Sálulëbioye tbojéftsantbetšë y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninýama, ntšamo Bëngbe Utabná tbojanianama y ntšamo cha Damascoca tša añémoca Jesusbiana entšanga tojánabuayenama. ²⁸As Saulo Jerusalenentšë tojanototona y chë Jesucristbe ichmónëngaftaca yojánana. Bëngbe Utabnabiana bëtš añémoca entšanga yojanabuayiná y ²⁹yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama.

³⁰Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentsána Tarso puebloye tmojanichmó.

³¹Y chca, Jesucristbeñe ošbuáchiyënga Judeoca, Galilea y Samaria luarentšë chora ya ndoñe más montsansufrina y natjëmbana imojtsemna, y nýetscanga más ošbuáchiyana imojtsebomna. Ntšamo Bëngbe Bëtšá yojanbošcá, imojtsaniyena cha jtsatschuanayëse; y chë Uámana Espiritbe uajabuáchenanaca, Jesucristbeñe ošbuáchiyënga más tmojanoboté.

Pedro Enéasbioye tbojanshná

³²Pedro yojánabuache nýetsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámna tojána.

³³Lida pueblentšë canýa tbojáninýena,

Eneas ca uabainá. Cha jama ndobená inamna y posufta uata jutsnéshañe chca inajájona. ³⁴Pedro tbojanianyana: “Eneas, Jesucristo tcomnjashná. Matëtsbaná y acbe tjuashe motsejacadá ca.” Y cachora chë jama ndobená tojtantsbaná.

³⁵Nyetscanga chë Lida pueblentše y Saronoca oyenënga chë entsá shnaná tmojáninýe. Y as, chënga bacna soyënga amana tmojtsanajbaná y cach orscana tmojanontšë Bëngbe Utabnábeñe ošbuáchiyana.

Pedro tojanma Dorcas cháuatayenama

³⁶Chë tempo, Jope pueblota yojaniyena canýe shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nyets tempo tšabe soyënga yojánama y yojanamana chë tojtšëjabetënga jujabuáchana. ³⁷Pero chora, šocana tbojanshache y tojtsanóbana. Tmojtsanbebé chentšana, canýe tsoye tsbanana tsañoca chabe cuerpo tmojtanaajó. ³⁸Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojántatšëmbona Pedro choca yojtsemnana. Asna, uta boyabásata tmojanichamó Pedro jauyanama: “Diosmanda, betscó Jope pueblote mabo ca.”

³⁹As Pedro tojëftsantsbaná y chë uta boyabásaftaca tojána. Choye tmojánashjajna ora, tmojanánatse chë Dórcasbe cuerpo yojtsemnoye, tsbanánoca; chorna, nyetsca viudanga šachénaca Pédrëbioye tmojanóbobuashcona y imojtsinýinýnaye chë Dorcas yojuajonaná entsayangá y cmešëjuangá, cabá chëngaftaca yojëftsemna ora.

⁴⁰Pedro tojanmandá nyetscanga chentšana chamotsebocanama; chora Pedro yojoshëntsamentšiyë y Bëngbe Bëtsáftaca ibojencuentá. Chentšana, Pedro chë obanábioye tbojanonýinýe y tbojanianyana: “Tabita, matëtsbaná ca.”

As Dorcas tojtanobuchatëfjona y Pédrëbioye tbojáninýe ora, tojanótbema. ⁴¹Chora Pedro tbojanábuacueshache y tbojtanatsbaná. As Pedro tojánachembo nyetsca chë Jesucristbeñe ošbuáchiyënga, chë viudanga y chë ínýenga, y Dorcas ainá tojtaniñyanýe. ⁴²Chë soye nyets Jope pueblentše tojanótatšëmbona y banga Bëngbe Utabnábeñe imojtsošbuáchiye. ⁴³Y Pedro bayté Jope pueblentše tojanoquedá, Simón chë bobáchëshiñe trabajayabe yebnentše.

Pedro y Cornelio

10 ¹Cesarea pueblentše inamna canýe boyabása Cornelio ca uabainá; cha inamna chë Italiano ca uabaina soldadëngbe amëndayá. ²Cornelio Bëngbe Bëtsábioye ibnarrespetana y nyetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcnaye chë judiënga ndbomnjëmënga jujabuáchama y sempre Bëngbe Bëtsáftaca ibnëncuentaye.

³Canýe te, mo bëts mošenana ora, cha botamana tojáninýe mo otjenayoquécá, mëntšá: Bëngbe Bëtsabe canýe ángel Cornelio yojtsemnoye yojtsamashjuana y tbojanianyana: —iCornelio ca!

⁴Cornelio chë ángelbioye ibojtsonýaye y auatjananá tbojanianyana: —Taita, ¿ndayá yojtsemna ca?

Y chë ángel tbojanianyana: —Bëngbe Bëtsá condbëtseimpadanama y chë ujabótënga condbëtšëjabuachanama, Bëngbe Bëtsá ácaftaca entsoyëjuá y

lempe cmochanjóyeunaye. ⁵ Chcasna, mora básefta boyabásenga Jope bêts puebloye michamó y Simón, chë Pedro ca monduabobuatmá, moye chamuánatse. ⁶ Cha posada entsebmoma inye Simónbentse, chë bobácheshiñe trabajayabe yebnentse. Chabe yebna mar bėjaye tsachañe endmëna. Cha cmochanjauyana ndayá jamama cmojtsemna ca.

⁷ Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentsana útata tojánachembo y canye soldádnaca, chabe uajabuachaná, Bëngbe Bëtsá adorayá; ⁸ lempe ntšamo yojopasacá chënga tojanacuntá y chentšana Jope puebloye tojanichamó.

⁹ Yëfsana mo njetsto ora, chënga benachiñe Jope béconana imojtsajnëntscuana, Pedro yebnentša tsbanánoye tojánašëngo, Bëngbe Bëtsáftaca jencuéntama. ¹⁰ Becá tbojánishëntsena y jasama yojtseboše; pero imojtsebopróntantscuana, Pedro mo otjenayoquécá mëntšá tojáninye: ¹¹ Celoca yojtsatëfjna y mo canye bêts entsayëjuacá yojtsabá y njets canta sibientsana yojtsëjonyana. ¹² Chë entsayëjuañe imojtsemna njetscna bayënga, ósjojnaye bayënga y njetscna shloftšëngnaca. ¹³ Y tojanuena canye oyebuambnayana mëntšá: —Motsbaná, Pedro; mobaye y quem bayënga mose ca.

¹⁴ Chora Pedro tojánayana: —Ndoñe, atšbe Utabná. Atšbe ndocna te chiyáisesse Moisesbe leyiñe ndoñe yondëlesenciana jasama bayënga y chë jasama ndoñe tsábá imomna bayënga ca.

¹⁵ Y cachiñe tojtétanuena chë oyebuambnayana mëntšá: —Bëngbe Bëtsá tojalesenciá y canye bayá tsábá jasama yomna ca tojayanëse, aca

ndoñe matsjuabnana chë bayá jasama ndoñe tsábá yontsemna ca.

¹⁶ Chë soye unga soyama chca tojanopasá chentšana, chë entsayëjua celoye tojtanátsjua. ¹⁷ Pero Pedro ndoñe yontsetátšëmbo ntšamo tojaninýca ndayá chabiama yojtsayanama. Chëntscuana, chë Cornéliëbe ichmónënga noticiánana Simónbe yebnoca tmojánashhajna y shjoca bëshoca imojtsobátmana. ¹⁸ Tmojanchembo ora, tmojanënoticiá Simón, chë Pedro ca uabobainá, chentse taibojatanama.

¹⁹ Pedro, ndayá tojáninyama chabosertama yojtsenójuabnantscuana, chë Uámama Espiritu tbojaninyana: “Mouena, muentse mora unga boyabásenga cmontsenguá.

²⁰ Motsbaná, mocana matastjango y yapa ntjatenójuabnaycá chëngaftaca cochjá, er atše chënga sënjichamó ca”.

²¹ As Pedro tojtanastjango y chë tmojánashhajñenga tojanéyana: —Atše sëndmëna chë šmontsenguá cha. ¿Ndáyeca moye šmojabo ca?

²² Chora chënga tmojanjúá: —Cornelio šonjichamó. Cha endmëna chë soldadëngbe amëndayá, canye tsábá mándbmoma entšá y Bëngbe Bëtsábioye adorayá, y njetasca judiënga chabiama tsábá mondbëtsoyebuambnaye. Bëngbe Bëtsabe canye ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebmncá cha jouenama ca.

²³ As chënga tojanémashengo y posada tojanéyentsame. Yëfsana Pedro chë unga boyabásengaftaca tojána. Básefta Josucrístbeñe ošbuáchiyënga Jope pueblentsënga Pedro tmojantjëmbambá.

²⁴ Chë inye yëfsana Cesarea puebloye tmojánashhajna. Chentse Cornelio

Pédrêbîama yojtsobatmana, y Cornelio tojanébuaja pamíllanga y tsábe amiguégnaca chentšê imojtsemna.

²⁵ Pedro tojánashjango ora, Cornelio tojánbocna jajébenguama y chabe shecuatšentšê yojoshéntsamentšiyê cha jadórâma. ²⁶ Pero Pédrêna tbojtânatsbaná y mēntšá tbojanîyana: —Matētsbaná, atšê cach aquēcá nÿe canÿe entšá sēndmēna ca.

²⁷ Pedro Cornélioftaca encuéntaye chē yebnentšê tojánamashēngo y ba entšanga tojánanÿena, chentšê tmojanótotēnga. ²⁸ Chora Pedro tojanéyana: —Cach tšēngaftanga šmondétatšēmbo chē judiēngbe leyēnguiñe endayana ndoñe yondopodena canÿe judío ndoñe judío entšāngaftaca jenútanama y ni mo chēngbe yebnēnguenache jábuachama ca. Pero Bēngbe Bētsá šonjinÿinÿé atšê ndocna te šondmēna ínÿabîama jatsjuabnayana cháftaca jenútanama ndoñe tsábá yondmēna ca. ²⁹ Chíyeca, šmonjobetšê ora, ndocá ntjatichamcá nÿe sēnjabo ca.

Chora tojanatjá: —¿Ndáyeca šmojobetšê ca?

³⁰ As Cornelio tojánayana: —Canta te entsemna, camēntša ora, muentšê sēndánmēna Bēngbe Bētsáftaca encuéntaye y ndeolpe sēnjînÿe atšbe delante canÿe boyabása uabuashinÿinÿana entšayaca bopormaná. ³¹ Cha šonjauyana: “Cornelio, Bēngbe Bētsá condbétseimpadanama y chē ujabótēnga condbétsējabuachanama, Bēngbe Bētsá ácaftaca entsoyejuá y lempe cmochanjóyeunaye ca. ³² Básefta boyabásenga Jope bēts puebloye michamó y Simón chē Pedro ca monduabobuatmá moye chamuánatse ca. Cha posada entsebmoma inÿe Simónbentšê, chē bobáchēshiñe

trabajayabe yebnentšê, y chabe yebna mar bējaye tsachañe endmēna. Cha cmochanjauyana ndayá jamama cmojtsemna ca.” ³³ Chcasna, cachora sēnjichamó aca jobetšama, y aslêpaye jabama tcojóyaunama. Y as morna, nÿetscanga Bēngbe Utabnabe delante fsēntseprontana jouenama lempe ntšamo Bēngbe Bētsá tmojamandacá ca —cha tojánayana.

Ntšamo Pedro tojanoyebuambá Cornéliêbe yebnentšê

³⁴ Pedro chora tojanontšé mēntšá jóyebuambayama: —Mora atšê šontsosertana, ndegombre Bēngbe Bētsabîama nÿetscanga cachcá uámanēnga imomnama. ³⁵ Nÿets luarēnguenache Bēngbe Bētsá júbuajana cha tmojtsatschuaná y tsábe soyēnga tmojtsamēnga. ³⁶ Tšēngaftanga šmondétatšēmbo, Bēngbe Bētsá Israeloca entšanga tojánabuayenama, tsábe noticiēnga jtsóyebuambnayēse, chēnga nÿetscanga ainaniñe tsábe ebionana chamotsebmoma, Jesucristbeyeca; y cha endmēna nÿetsca entšangbe Utabná. ³⁷ Tšēngaftanga šmondétatšēmbo ntšamo nÿets Judeoca tonjanopasama. Chē soye Galilea luaroca tojanobojobatšé, Juan entšanga yojanabuayiná orscana, chēnga bacna soyēnga amana chamotsajbanama y chamuenábayama. ³⁸ Šmondétatšēmbo ntšamo Bēngbe Bētsá, Jesús Nazaretocábioye tbojanábuayanama y tojanma chē Uámana Espíritu chabe ainaniñe cháumashēnguama, y tojanma Jesús corente obená chaotsemnoma; y šmondétatšēmbo ntšamo Jesús enjánana entšangbîama tsábe soyēnga amiñe y nÿetscanga chē Satanás yojánama chamosufrimēnga áshnaye, er Bēngbe Bētsá cháftaca yojtsemna.

³⁹“Bënga fsënjaninÿe y fsëndétatšëmbo lempe ntšamo Jesús tojanmcá Jerusalenoca y nÿets Judea luariñe; y cha tmonjanóba, canÿe cruciñe jacrucificase. ⁴⁰Pero Bëngbe Bëtsá tonjanma unga tianoye cha cháuatayenama y bëngbeñe chaonÿnama. ⁴¹Cha nÿetsca entšangbe delante ndoñe chenátanbocna, pero aíñe bëngbeñe, chë tempo Bëngbe Bëtsá šojanëbuáyanënga, Jesús tojtananenama chamuinÿama. Y tojtananenentšana bënga cháftaca fsënjanse y fsënjanofsé. ⁴²Cha šonjichamó ntšanga jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiama y ainëngbiama yochjayana tšabá o ndoñe tšabá tmonjamama. ⁴³Bëngbe Bëtsabe juabna oyebuambnayënga nÿetscanga cach Jesusbiama tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

**Ndoñe judiënga chë Uámana
Espíritu tmojanóyëngacñe**

⁴⁴Pedro chë palabrenga cabá yojtsoyebuambnantscuana, chë Uámana Espiritu tojánamashëngo nÿetsca chë imojtsuenanëngbe ainaniñe jtsemándayama. ⁴⁵Chë judiënga Jesucristbeñe ošbuáchiyënga Pédroftaca tmojánabënga imojenjnaná, chë Uámana Espiritu ndoñe judiëngbeñnaca cháuamashënguama Bëngbe Bëtsá tojanmama. ⁴⁶Chënga imojtsuenana chënga inÿetšá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

⁴⁷Chora Pedro tojánayana: “Pero mëngna chë Uámana Espiritu

tmonjóyëngacñe ntšamo bënga tmonjóyëngacñecá. Chcasna, ndocná queochatobenaye jamana chënga uabáinënga ndoñe chamondétsemnama ca.” ⁴⁸As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

Ntšamo Pedro chë

**Jerusalenoca imojánenëfjuana
ošbuáchiyëngbioye tojanëyana**

11 ¹Jesucristbe ichmónënga y chë Judeoca Jesucristbeñe ošbuáchiyënga tmojátatšëmbona, chë ndoñe judiëngnaca Bëngbe Bëtsabe palabriñe imojtsošbuáchema. ²Pero Pedro Jerusalenoye tojesaná ora, báseftanga chabiama ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentše base bobachtema tétšënënga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. ³As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

⁴Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanëyana: ⁵—Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninÿe celocana mo canÿe bëts entšëjuacá átšbioye enjétsabeconaye y nÿets canta sibiocana enjétsëjonÿana. ⁶Y botamana sënjanrepará ndayá chë tsoye bëtsemnama y sënjáninÿe choye monjëtsemna uamna y tjoca bayënga, ósojnyaye bayënga y nÿetscna shloftšëngnaca. ⁷Y sënjanuena canÿe

oyebuambnayana mēntšá: “Motsbaná, Pedro; mobaye y quem bayēnga mose ca.”⁸ Chora atše sēnjánayana:

“Bēngbe Utabná, ndoñe; atše ndocna te chiyáisesē chē Moisesbe leyīñe ndoñe yondēlesenciana jasama bayēnga y jasama ndoñe tšabá imomnēnga ca.”

⁹Chentšana cachiñe sēntētānuena chē celocana oyebuambnayana mēntšá: “Bēngbe Bētsá tojalesenciá y canye bayá tšabá jasama yomna ca tojayanēse, ndoñe matsjuabnana chē bayá jasama ndoñe tšabá yontsemna ca.”¹⁰ Chē soye unga soyama chca tonjanopasá y chentšana chē entšējua celoye tontanátsjua.¹¹ Y cachora unga boyabásenga Cesarea pueblócana ichmónēnga, chē posada sēndbomnentše tmojanashjajna, atše janguanguama.

¹² Y chē Uámana Espírītu šonjanmandá atše yapa ntjatenojabuabnycá chēngaftaca jama; y quem chnēnguana Jesucristbeñe ošbuachiyēngnaca átseftaca tmojáná. Nyētscanga canye entšá Cornelio ca uabainabe yebnoye fsēnjánamashjna; ¹³ y chana bēnga šonjanacuntá ntšamo tojáninye, cachabe yebnentše canye ángel ibojtsebiatsana y mēntšá tbojanianana: “Básefta boyabásenga Jope bēts pueblōye michamó y moye chamuánatse Simón, chē Pedro ca monduabobuatmá,¹⁴ y cha cmochanjabuayená ntšamo aca y acbe yebnentša oyenēnga šmochjotsbocá ca.”¹⁵ As, atše jóyebuambayama sēnjanbojatsé orna, chē Uámana Espírītu tonjánamashēngo chēngbe ainaniñe jtsemándayama, ntšamo bēngbeñe natsana tonjanamashēngcá.

¹⁶ “Chora sēnjanenojuabó ntšamo Bēngbe Utabná tonjánayanama: ‘Ndegombre, Juan entšanga bėjayeca tonjanēbaye; pero Bēngbe Bētsá chē Uámana Espírītu bochanjíchmuá, tšēngaftangbe ainaniñe

jtsemándayama cháumashēnguama ca.’¹⁷ Chcasna, chēngnaca Bēngbe Bētsá chē Uámana Espírītu tonjatsatá, ntšamo bēnga, chē Utabná Jesucristbeñe ošbuachiyēnga, šonjanatsatacá. Y chca, atše ndoñe quetsátsmēna canye tša uamaná, Bēngbe Bētsá jauyanama ntšamo cha yobošcá ndoñe chaondētsemna ca.”

¹⁸ Jerusalenoca Jesucristbeñe ošbuachiyēnga chē soyēnga tmojanuena ora, ndocá más tmojanantjá y Bēngbe Bētsá tmojtanchuá, mēntšá: —iAsna, Bēngbe Bētsá chē ndoñe judiēngnaca tojalesenciá chēngbe bacna soyēngama ngmēnaca chamuatenójuaboma y chca amana chamotsajbanama, chē nyētsca tescama yomna tšabe vida chamotsebomnama ca!

**Ntšamo Antioquía pueblōca
tojanobojatsé, entšanga
Jesucristbeñe ošbuachiyana**

¹⁹ Esteban tmojanóba chentšana, tmojanontsé chē Jesucristbeñe inye ošbuachiyēngnaca jatēcamiyama. As chentšana báseftanga yojtsamna bēn luarēngoye jtsachetēngana Fenicioye, Chipre y Antioquía luarēngoye, y chenache chēnga Jesucristbeñe soyēngama imojanoyebuambná, pero nye judiēngbiama.²⁰ Pero báseftanga imojamna Chipre y Cirene luaroquēnga, y chēnga Antioquía bēts pueblōye tmojánashjajna orna, chē ndoñe judiēngbeñnaca tmojanoyebuambá, Jesús, chē Utabnabe soyēngama jabuayenase.²¹ Bēngbe Utabnabe obenana chēngaftaca yojtsemna, y chca, ba entšanga tmojanajbaná bacna soyēnga amana y tmojanontsé Bēngbe Utabnábeñe jtsošbuachiyana.

²² Jerusalenoca Jesucristbeñe ošbuachiyēnga chē soye

tmojántatšëmbona ora, Antioquía luaroye Bernabé tmojanichmó.

²³ Bernabé choye tojánashjango orna, tojáninýe ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nýetscanga tojanabuayená chamotsiyena nýets ainánaca Bëngbe Utabnábeñe jtsošbuáchiyëse. ²⁴ Bernabé inamna canýe entšá tšabe soyënga amá, chë Uámana Espíritu chabe ainaniñe yojtsemándaye y bëtscá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

²⁵ Chentšana, Bernabé Tarso puebloye tojána Saulo janguanguama, ²⁶ y tbojáninýena ora, Antioquía luaroye tbojéftsanbetše. Antioquía luarentšna canýe uata nýetsá Jesucristbeñe ošbuáchiyëngaftaca cánýiñe ibojéftsemna y ba entšanga tmojanabatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

²⁷ Chë tempo, básefta Bëngbe Bëtsabe juabna oyebuambnayënga Jerusalenocana Antioquía luaroye tmojána. ²⁸ Chënguentšana canýa Agabo ca uabainá tojantsá y chë Uámana Espíritbeyeca tojánayana, mëntšá: “Nýets luariñe entšanga oyeñiñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora. ²⁹ Chcasna, chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocénanënaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama. ³⁰ Chca tmojanma, y Bernabé y Sáuloftaca chë crocénana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbiyoe.

**Santiago tmojanóba;
Pedro tmojanëtame**

12 ¹ Chë tempo, rey Herodes básefta Jesucristbeñe ošbuáchiyënga tojánishëche jutámiamia y játsetšenama. ² Tojanmandá espadéjaca chamóbama Santiago, Juanbe catšata; ³ y Herodes tojántatšëmbona judiënga chë soye tojanogúsetama; as, cha tojanmandá Pédrënaca chamutámiamia. Chca tojanopasá chë levadúraca ndëpormana tandëše sayté, Bashco fiesta ora. ⁴ Pedro tmojánishache orna, Herodes tojanmandá chamutámiamia, y chë cárceloca soldadënga cantátanga tmojanenajatá cántentše cha chamotsebojanýama. Herodes yojëtsejuabnaye, Bashco fiesta tojochnëngo ora Pedro juabocnama, entšangbe delante jayanama cha chaóbanama. ⁵ Chcasna, Pedro yojtsëtámema y chë soldadënga corente imojtsebojanýá. Pero Jesucristbeñe ošbuáchiyëngna bëtscá Bëngbe Bëtsá imojtseimpadana Pédrëbiamia.

**Bëngbe Bëtsá tojanma Pedro
natjëmbana cárcelocana
cháuissebocnama**

⁶ Canýe te yojtsájamna Herodes entšangbe delante Pedro juabocnama. Chë te ibetna, Pedro yojtsomañe y cátaoica canýe soldado yojtsemna; uta cadenëjuaca yojtsabatsëcna y inýe soldadëngna bëšócana chë utámëniñe imojtsebojanýá. ⁷ Ndeolpe, Bëngbe Utabnabe canýe ángel tojánbocna, y lempe chë utámëniñe yojtsebuashinýinýana. Chora chë ángel tëchañe Pédrëbiyoe tbojánbojajo, tbojanfšená y tbojanianyana: “Betsco motsbaná ca.” Y

cachora chë cadenëjuangá Pédrëbe buacuatšënguentshana tojanatquécjana, ⁸y chë ángel tbojaniana: “Matichëtjo y matóshecohëtjo ca.” Pedro tojanma ntšamo chë ángel tbojanianácá, y chora chë ángel tbojátaniyana: “Mataquëfsayé y šmasto ca.”

⁹Pedro utámenocana chë ángel ibojtsëstona, pero ndoñe yontsetátšëmbo aíñe ndegombre o ndoñe bentsemna chë ángel yojtsama cha chocana cháuaisebocnama; masna, ibojtsinýana mo canýe otjénayoca cuaftsemncá ca. ¹⁰Y útentše chë soldadënga imojtsebojanýajana chata tbojánachnëngo y yeréša bëshásoye tbojánashjango, chë ndayéša yojanamna tsáshenoye jabocnama; y chë bëshásana nýe cachabe ponto yojotëfjo. Chentshana tbojëftsanbocna ora, canýe tsáshenëjana ibojtsaye, y nýe ndeolpe chë ángel Pédrëbentshana yojtsojuánañe.

¹¹Nýa chora Pedro tbojanosertá y tojánayana: “Mora tsábá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšëntšana y lempe ntšamo judiënga átšeftaca jamama imojuabnámnaca ca.”

¹²Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentše banga cánýiñe imojtsemna, Bëngbe Bëtsáftaca encuéntaye. ¹³Pedro chë tsashenoica bëshásoca tojanchembo ora, canýe oservená, Rode ca uabainá, tojánbocna jarrepárama. ¹⁴Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tsabe noticia jaúnayama, Pedro bëshoca yojtsemna ca. ¹⁵Chë tsoca imojtsemnëngna chora tmojaniana: “¿Opá chectsebocna ca?”

Pero chë oservená yojtsichamo ndegombre ca. Y chënga tmojaniana: “¡Chabe ángel ctsemna ca!”

¹⁶Chëntscuana Pedro cabá yojtsechembuana; tmojánëbiatëfjo y tmojáninýe ora, chënga puerte imojenjaná. ¹⁷Pero Pedro tojánëfjatsëmbo iyteca chamobiamama y tojanacuntá ntšamo Bëngbe Utabná utámenocana tbojánatsbocama. Chentshana tojanéyana: “Ntšamo tonjopasama Santiago y chë Jesucristbeñe inýe ošbuáchiyënga šmochjaúnaye ca.”

Chora Pedro chë yebnentšana tojtáisebocna y ínýoye yojáta.

¹⁸Tojanbinýna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa.

¹⁹As Herodes tojanmandá Pedro chamotsenguanguama; pero jtsinýenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentshana tojanmandá chë cha imojanbojanýa soldadënga jtsëbáyama. Chë soyënga tojanochnëngo chentshana, Herodes Judea luarentšana tojëftsanbocna y Cesarea luaroye tojtsanoñe, y choca tojtsanoquedañe.

Herodes tojanóbana

²⁰Herodes corente yojtsetšátjaye Tiro y Sidonoquëngaftaca; as chënga tmojanenoyeuná Heródesbioye jama. Canýe uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayánanënga chamondëtsemnama, er Tiro y Sidonoca entšanga vida innabomna Heródesbe luaroca sanángaca. ²¹Chcasna, rey Herodes inýe tescama tojánachembo. Chë tena,

jóyebuambayama Herodes uámana entšayaca vojtopórma y vojótbema chabe mándaye tbemanentše; chentsana tojanonguamé. ²² Chora entšanga tmojanontsé mēntšá uayebuáchana: “iChě entsoyebuambná cha entšá ndoñe quenátmēna! iChana canýe dios entsemna ca!” ²³ Cachora, Běngbe Bětsabe canýe ángel tojanma Herodes šocana chaboshachama, chabe cuenta Běngbe Bětsá chamuatschuama entšanga ndoñe yonjáuyana causa. Herodes tojanóbana mamángaca sasná.

²⁴ Pero chě tempo más bětsá entšanga Běngbe Bětsabe palabra imojtsuenana y Jesucrístbeñe imojtsošbuáchiye.

²⁵ Bernabé y Saulo chatbe trabajo tbojéftsanma ora, Jerusalenocana Antioquía luaroye tbojésanata y Juan, chě Marcos ca uabobuatmá, chátaftaca tmojéftsanbetše.

Bernabé y Saulo tbojanbojatsé Běngbe Bětsabe trabajo jamama

13 ¹ Antioquía luaroca Jesucrístbeñe ošbuáchiyěnguentše imojtsemna Běngbe Bětsabe juabna oyebuambnayěnga y ošbuachiyěngbioye abuátambayěnga. Chěnga imojanabaina Bernabé, Simón (chě Šibetá ca uabobuatmá), Lucio Cirenocá, Manaén (nda tojanoboché cánýiñe Herodes, chě Galileoca réyefteca) y Saulo. ² Canýe te, Běngbe Utabná imojtsatschuanaye y chama tondaye ntjascá imojtsemna ora, chě Uámana Espírítu tojánayana: “Mora šmochjaleséncia Bernabé y Saulo tšěngaftangbentsana chabuétsebocnama; chatna canýe trabajuama sěnjabacacá ca.”

³ Běngbe Bětsá jětschuayama tondaye ntjascá imojtsemněntscuana

y cháftaca imojtsencuěntantscuana, chěngbe cucuatšěnga chatbe bestšaše juatsboica tmojancjá, chatbe trabajuíñe chaujúabuachama Běngbe Bětsá jtseimpadánese. Y chentsana chátbioye tmojtanadiošoftá.

Bernabé y Saulo Chipre luaroca

⁴ As Bernabé y Saulo, chě Uámana Espírítbeyeca ichmónata, Seleucia ca uabáinoye tbojánata y chentsana bejaycá, Chipre luaroye. ⁵ Salamina běts puebløye tbojánashjango ora, tbojanontsé Běngbe Bětsabe palabrama entšanga jábuayenama, chentša judiěngbe enefjuana yebněnguenache. Juan Marcos mo chatbe uajabuachanacá ibojtsebomna.

⁶ Nýets chě luarějana tmojánachněngo orna, Pafos puebløye tmojánashjajna; y chentše tmojáninýena canýe judío tatšěmbuá, Barjesús ca uabainá. Cha yojánichamo cha canjamna canýe Běngbe Bětsabe juabna oyebuambnayá ca, pero ndoñe chca yonjamna. ⁷ Chě tatšěmbuá inatrabájaye chě Chipre luaroca mandadbiama, Sergio Paulo ca uabainá; y chě mandadna corente osertaná inamna. Cha yojtseboše Běngbe Bětsabe palabra jouenama; as tojanmandá Bernabé y Saulo jobiatšana. ⁸ Pero chě tatšěmbuá, grieguíñe Elimas ca uabainá, Saulo y Bernabebe contra yojtsemna y yojtsama chě mandado ndoñe chaondětsošbuáchemá, ntšamo chě Jesucrístbeñe ošbuáchiyěnga imojanošbuachecá. ⁹ Chora, Saulo chě Pablo ca imojanábobuatmabe ainaniñe chě Uámana Espírítu corente yojtsemándaye; as chě tatšěmbuábioye yejuana ibojonýinýiye, ¹⁰ y tbojanianya: “iAbuambnayá, puerte bacna entšá, Satanasbe uaqiñá y tšabe soyěnga ndoñe chaondětsebínýnama

trabajayá! Bèngbe Utabnabe nÿetsca ndegombre soyèngama aca contsichamo uayátsenaye soyènga yojtsemna ca. ¹¹ Mora, Bèngbe Bètsá cmochanjacastíga, jtaná cochanjoquéda y baseftayté jinÿama quecochatobenaye ca.”

Cachora Elimas mo ibetiñcá yojoquéda y ibojtsonguaye canÿa buacuetèntšnana chabuánatsama, jtaná yojtsemna causa. ¹² Chè mandado chca tojáninÿe ora, Jesucristbeñe yojtsošbuaché y yojenjaná Bèngbe Utabnabe soyènga tojanatsjínÿama.

Pablo y Bernabé Antioquía pueblentse, Pisidia luaroca

¹³ Pablo y chabe enutènga, Páfosocana, bejaycá Perge puebloye tmojátananga, Panfilia luaroca. Pero Juan tojésanashejuana y Jerusalenoye tojésanshècona.

¹⁴ Pergentšana Antioquía puebloye tbojátanata; chë pueblo inamna Pisidia luare béconana. Chentšna, ochnayté, chë judièngbe enefjuana yebnoye tbojánamashèngo y tbojanótbema.

¹⁵ Moisesbe leyine y Bèngbe Bètsabe juabna oyebuambnayèngbe uabemana librèšangañe tmojanalía orna, chë enefjuana yebnentša mándayènga canÿa tmojanichmó chènga jáuyanama: —Israeloquènga, bènga fsèntseboše entšanga chašmabuayená, nderado ndayá jayanama šmojtsebo mnèse, muentša entšanga añemo chamotsebo mnama ca.

¹⁶ As Pablo tojantsá y entšángbioye cucuatèca tojánefjatsèmba iytèca chamobiamama, y tojánayana: —Šmochjouena Israeloquènga y ndoñe judiènga Bèngbe Bètsá adórayènga. ¹⁷ Israeloca entšanga mondadorana Bètsá, Bèngbe Bètsá, bèngbe bèts taitanga tojanèbuáyana,

y tojanma chènga corente bètscanga chamotsemnama, chènga Egiptoaca inÿe luarocana ashhajnéngcá imojoyena ora. Y chentšana, cachabe obenánaca chë luarocana chènga tojésanébuacana. ¹⁸ Canta bnètsana uata nÿetsá, Bèngbe Bètsá entšanga ndoyena luaroca chènga yojanéuantana, ¹⁹ y cha tojanma chë Canaán luaroca canÿsèftentša entšanga chamopochocama y bèngbe bèts taitanga chèngbe fshantsènga nduiñènga tojánabiama. ²⁰ Chë tempo, chë Bèngbe Bètsá Abrahámioye quem fshantse jatšetayama tbojanšbuachená orscana, y chë tempo, chë bèngbe bèts taitanga chë fshantse tmojanóyèngacñèntscuana, canta patse y shachna bnètsana uata tojanochnéngo.

“Chentšana, Bèngbe Bètsá chèngbiama mandadènga tojánabiama, Bèngbe Bètsabe juabna oyebuambnayá Samuel chèngbe mandayá yojéftsemna tempèntscuana. ²¹ Chentšana, Israeloquènga Samuel tmojanimpadá canÿe rey chabojayé chaotsamèndama; as Bèngbe Bètsá Saúlbioye chèngbe rey tbojánbema, canta bnètsana uatèscama. Saúl inamna Cisbe uaquiñá y Benjaminbe bèts pamillanguentsá.

²² Más chcoyna, Bèngbe Bètsá Saúlbioye chë mándayentšana tbojtsanjuaná, y chentšana Davidbioye mo chèngbe reycá tbojánbema. Chabiamama Bèngbe Bètsá tojánayana: ‘Atše sèndétatsèmba, David, Isaíbe uaquiñá, canÿe tšabe entšá yomnama y chama atše sèndoyejuá, y cha sempre endèprontana ntšamo atše stsebošcá jtsamama ca.’ ²³ Davidbentsana canÿe entšá Jesús enjamna, nda Bèngbe Bètsá tbojanichmó Israeloca entšanga jabátsebacama, ntšamo cach Bèngbe Bètsá chèngbe bèts

taitunga tojanašebuachenacá. ²⁴ Cabá Jesús ndébozna ora, Juan nyetsca Israeloquenga tojanabuayená bacna soyenga amana chamotsajbanama y chamuenabayama. ²⁵ Juanbe trabajo jopochócama yojtsobeco ora, cha tojánayana: ‘¿Nda atše tsmēnama tšēngaftanga šmojuabná ca? Chē tšēngaftanga šmontsejuabná atše tsmēna ca cha, atše ndoñe quetsátsmēna. Pero átšbentšana echanjabo canya, y atše merecido taitatobuajoñe ni mo jotsejbiyama chabe shecohētjonēshentša corriēja jajafjonama ca.’

²⁶ “Chcase morna, Abrahám bentšana entšanga y ndoñe judiēnga Bēngbe Bētsá adórayēnga; bēngbiana entsemna quem buayenana soye, chē Bēngbe Bētsá entšanga játsebacana. ²⁷ Masque cada ochnayté, Bēngbe Bētsabe juabna oyebuambnayēngbe uabemana palabra monjanalía chēngbe enefjuana yebnentše, Jerusalenentša oyenēnga y chentša mándayēnga ndoñe quenjátanēsertana nda Jesús bētsemnama, y chē tmojtsalía soyēngama cach ndoñe. Y chca, chēnga Jesús chamóbama tmojánboshjona ora, chē chca amēnga tmojanma ntšamo Bēngbe Bētsabe juabna oyebuambnayēngbe librésangañe iuabemancá. ²⁸ Y masque ndocna bacna soye tmonjáninýena Jesús jóbanama chabotsemnama, Pilato tmojanimpadá chaomandá chábioye jóbama.

²⁹ Chentšana, lempe ntšamo Bēngbe Bētsabe uabemana palabrenguñe iuayancá Jesúseftaca tojanochñengo ora, chabe ústonēnga chē cruzocana tmojtánštjango y tmojanatbontsá.

³⁰ Pero Bēngbe Bētsá tojanma Jesús cháuatayenama. ³¹ Chē Galileocana Jerusalenoye cháftaca tmojánanga, baytentscuana Jesús yojánebuacana;

y morna, lempe ntšamo Jesusbiana tmojaninýca, chēnga entšangbeñe montsoyebuambná.

³² “Y chca, mora bēnga chē tšabe noticiēnga cbontsētšētná. Ntšamo Bēngbe Bētsá bēngbe bēts taitanga tojanašebuachenacá, ³³ cha tonjama, bēnga chē chēngbe entšanguentšēngbiana, chca chaotsemnama. Y Bēngbe Bētsá chca tojama, Jesús cháuatayenama cha jamēse. Rey David, Bēngbe Bētsabe uabemana palabrenguñe, segundo salmentše mēntšá tojanábema, ntšamo Bēngbe Bētsá Jesúsbioye tbojaniyanama:

Aca atšbe uaquiná condmēna.

Mēnté entšanga sēnjinyanyé aca atšbe Uaquiná comnama ca.

³⁴ Y tempo Bēngbe Bētsá chabe uabemana palabrenguñe tojaninýanyé cachá jamama Jesús cháuatayenama y ndoñe cachiñe chaondóbanama, mēntšá tojánayana ora:

Chē ndegombre soyēnga y chē tšabe bendicionēnga ntšamo

David sēnjanšbuachenacá,

tšēngaftanga cbochanjátataye ca.

³⁵ Inyoca Bēngbe Bētsabe uabemana palabrenguñe, Salmos librēsa uabiamnaya, mēntšá tojanábema ntšamo Jesús Bēngbe Bētsábioye tbojaniyanama:

Aca ndoñe quecochatslesencia

atšbe cuerpo,

chē acbe Uamana oservenabe

cuerpo chaotsopochocama ca.

³⁶ David, chabe tempo imojyenēngbiana tojanma, ndayá cha chaomama Bēngbe Bētsá tojanjuabocá. Cha tojanóbana y tmojanatbontsá chē chabe bēts taitangbioye tmojanētabuantsá luarentše, y chabe cuerpo tojanopochocá.

³⁷ Pero chē Bēngbe Bētsá tojanma

chautayenamabe cuerpna, ndoñe tonjanopochocá.

³⁸⁻³⁹“Asna, baconga y batanga, atše séntseboše tšéngaftanga quem soye chašmotsetátšëmbo: Ndayá Jesús tojanmama, entšanga chéngbe bacna soyéngama perdonánénga montsemna. Jesúsbe yeca, nyetsca chábeñe tmojtsošbuáchenga, bacna soyéngama perdonánénga mochántsemna. Ntšamo Moisesbe leyiñe iuayancá tmojanmama, chénga ndoñe tmonjanobená chca perdonánénga jtsemnana; nye Jesúsbeñe jtsošbuáchiyése chénga perdonánénga jtsemnana. ⁴⁰Cuedado šmochtsebomna, ntšamo Bèngbe Bètsabe juabna oyebuambnayénga tmojanayancá, tšéngaftangaftaca ndoñe chaondochnènguama. ⁴¹Bèngbe Bètsá mèntšá tojánayana:

Šmochjouena. Tšéngaftanga ché ntšamo atše tijayancá šmojtšábotenga, onanánénga šmochántsemna y šmochanjóbana. Tšéngaftanga cabá vida šmobomnèntscuana, atše bèts soyénga chanjéftsema, y masque ndánaca ché soyéngama chacmojtšacúnta, tšéngaftanga chiñe ndoñe quešmochatošbuáchiye ca”
—Pablo tojanoyebuambá.

⁴²Pablo y chabe enuténga ché judiéngbe enefjuana yebnentsana tmojtšansbocna ora, ché ndoñe judiénga chéngbiyoye tmojanaimpadá, ché inye ochnaytescama ché soyéngama más jábuayenama.

⁴³Chentše ché te jénéfjnama tempo tojanopochocá ora, ba judiénga y ndoñe judiénga, ché Bèngbe Bètsábioye imojánadorana mo ché judiéngcá, Pablo y Bernabé tmojanéseto. Y chatna chénga tmojanabuayená nyets tempo

chamotsejuabnama, Bèngbe Bètsá chéngbiama tšabe soyénga yojtšamama.

⁴⁴Ché inye semana, ché ochnaytena, nya mo nyetsca ché pueblentše oyenénga tmojanobeconá Bèngbe Bètsabe palabra jouenama. ⁴⁵Pero ba entšanga choye jouenama tmojánama ché judiénga tmojáninye ora, tmojanotjayaná, ba entšanga Pablo imojtseyeunanama; as chénga tmojanontsé mocá ichámuana ndayá cha yojtšoyebuambnama, y chábioye oyenguayana. ⁴⁶As Pablo y Bernabé más añemoca mèntšá tbojánayana: “Endánèyta, natsana tšéngaftanga, ché judiénga šmognénga, Bèngbe Bètsabe palabra jshabuayenana. Pero tšéngaftangna ché palabra šmotsaboté, y šmontsejuabná tšéngaftangbiama ndoñe tšabá yontsemna ché nyetsca tescama yomna tšabe vida jtsebomnana ca; ché causa, benga fchantsoñe ché ndoñe judiéngbeñe Bèngbe Bètsabe palabra jóyebuambayama. ⁴⁷Er Bèngbe Bètsá chama šjanichamó, mèntšá jauyanése: Aca tchonjuábuayana ché ndoñe judiéngbiyoye tšabe noticiénga jábuayenama, chaósertama. Y chca, aca chéngbiama cochántsemna mo canye binynayacá. Chca, ácbeyeca nyets luarénguenache entšanga atše chanjatsebacá ca.”

⁴⁸Ché ndoñe judiénga chca tmojanuena ora, puerte imojtšoyejuaye y tmojanontsé mèntšá ichámuana: “Bèngbe Utabnabe palabra tšabá bèngbiama entsemna ca.” Y chora, ché nyetsca tescama yomna tšabe vida jtsebomnana Bèngbe Bètsá tempo tojánabacacanga, tmojanontsé Jesúsbeñe jtsošbuáchiyana. ⁴⁹Y chca, nyets ché luariñe más entšanga Bèngbe

Bétsabe palabra imojtsuenana. ⁵⁰ Pero chë judiënga tmojanoyebuambá, shembásengaftaca Bëngbe Bétsá adórayënga y uámanënga, y chë pueblentsá uámana taitángaftaca, jamama Pablo y Bernabé chabosufrioma y chë luarentsana jtëbuacnama. ⁵¹ As, Pablo y Bernabé tbojésanshecstëtonata, judiënga jinÿanÿiyama chënga ndoñe tšabá tmojanmama; y chentšana, Iconio pueblöye tbojtsanoñe. ⁵² Pero Jesucristbeñe ošbuáchiyënga corente oyejuayënga imojtsemna, y chë Uámana Espíritu chëngbe ainaniñe corente yojtsemándaye.

Pablo y Bernabé Iconio puebloca

14 ¹ Iconioca, Pablo y Bernabé cánÿiñe tbojánamashëngo chë judiëngbe enefjuana yebnentše y corente obenánaca Bëngbe Bétsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché. ² Pero chë judiënga Jesucristbeñe ndošbuáchiyënga, chë ndoñe judiëngbiöye tmojanayëñjana, Pablo y Bernabebiama podesca chamotsejuabnama. ³ Chíyeca, Pablo y Bernabé bayté chentše tbojanototoná y ndauatjca Bëngbe Utabná Jesucristbiama tbojanoyebuambá. Bëngbe Utabná obenana chata tojanatšatá béts soyënga jtsamama, y chë soyëngaca Bëngbe Utabná entšanga tojaninÿanjé, ndayá chë ichmónata ibojtsoyebuambnacá ndegombre bëtsemnama, chë Bëngbe Bétsá nÿetscanga iuababuánÿeshanana. ⁴ Pero nÿetsca chë pueblentsá entšanga ndoñe cachá imontsejuabnaye; inÿyënga chë judiëngaftaca imojtsemna, y inÿyënga chë Jesucristbe ichmonátaftaca. ⁵ As, chë judiënga y ndoñe judiënga chentša

mandayëngaftaca tmojanenoyeuná chata jtsatsetšenama y ndëtšbéngaca jtsëbáyama. ⁶ Pero Pablo y Bernabé chama tbojántatšëmbona orna, tbojtsanëchañe Listra y Derbe pueblöye, Licaonia luaroca, y choca chábuañe luarëngoye; ⁷ y chë luarënguenáchnaca, chata Jesucristbe tšabe noticiënga entšanga tmojanabuayená.

Listra puebloca, ndëtšbéngaca Pablo tmojtsanatëchénganja jtsóbama

⁸ Listra puebloca inamna canÿe boyabása jama ndobéná. Ndocna te yondobena jana, chca cosheto inónÿna causa. Chë boyabásana yojtsetbemana ⁹ ouenana ntšamo Pablo yojtsichamcá. Y Pablo chábioye tbojanonÿinÿé ora, tojántatšëmbona chë šocá tša yojtsošbuáchemá, shnaná jtsatsmënama; ¹⁰ as Pablo, juayebuáchenëse tbojaniyana: “iMotsbaná y acbe shecuatšëngaca tšabá motsa ca!”

Chora chë boyabása, canÿe jontsënjëse tojantsá y yojóntša anana. ¹¹ As chë entšanga, ndayá Pablo tojanmca tmojáninÿé ora, tmojanontšé uayebuáchana chë Licaonia luarentša biyañe, mëntšá: “iBëngbe diosënga béngbiöye tbojátma mo entšatcá ca!” ¹² Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inÿe diosëngbiama oyebuambnayacá. Páblëbiöye chca imojtsábobuatma, er cha más yotsoyebuambná. ¹³ Zeusbiama chentša bachna inabomna canÿe yebna chë pueblo chaboca, chábioye jadórama. Chë bachna, uacnënga tojanënatse y uantšëfjushangá tojanëyamba chë Zeus jadórama yebntšá amashjuanoye; y cha y chë entšanga imojtseboše chë uacnënga jashebuáyana y jajuinÿiyana, chca, chë ichmonátbiöye jadórama.

¹⁴ Bernabé y Pablo chama tbojántatšëmbona ora, entšayá tbojtsanenántšajatanëca, entšanga jinŷanŷiyama, ntšamo chënga imojtsamcá chata tondaye yonjógusetama, y tbojéftsannotjajo entšangbe tsëntsajana y mëntšá ibojtsaychembumbuana: ¹⁵ “Baconga y batanga, ¿ndáyeca chca šmojtsama ca? Bëndata cach tsëngaftangcá entšata fsëndmëna. Muentše bëndata fsëntsemna nŷe jábuayenama Bëngbe Utabná Jesucristbe tšabe noticiënga, tsëngaftanga chë quem ndoservena soyënga, vida ndbomma soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nŷetsca béjayënga y lempe ntšamo chenache yobinŷncá. ¹⁶ Masque tempo, Bëngbe Bëtsá entšanga tojanalesenciá cada ona chaoma ntšamo tojtsejuabnacá, tšabá cachëngbiana yojtsémnayeca, ¹⁷ Bëngbe Bëtsá ndocna te ntjájbanana tsëngaftanga jtsinŷanŷnayana, cachá tojama tšabe soyëngaca, mocna Bëtsá cha yomnana. Cha endama tsëngaftangbiana chauaftema y chë matënga botamana chaoshájonama, y becá saná cmondatšatná; y cha endama tsëngaftangbe ainaniñe corente oyejuayana chašmotsebomma ca” —chata tbojánayana.

¹⁸ Masque chë soyënga tbojánayana, nŷe batšatema más bën y ya ndoñe matbëñjanobenata chë entšanga jtsëuyanana uacnënga jashebuáyama, chca, chátbioye jadórama.

¹⁹ Chca ora, básipta judiënga tmojánashjajna Pisidioca, Antioquiocana y Iconiocana, y chentšä entšángbioye tmojanayëñjaná, Jesucristbe ichmonatbe contra chamotsemnana. Chcasna, Pablo

ndëtšbëngaca imojtsënanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca. ²⁰ Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebløye tojtesaná; y chë yëfsana, Bernabéftaca Derbe puebløye tojánä.

²¹ Derbe puebløca Jesucristbe tšabe noticiënga entšanga tmojanabuayená, y chca, entšanga Jesucristbeñe imojtsošbuáchiye. Chentšana chata tbojësanshëcona Listra, Iconio y Pisidioca Antioquiøye. ²² Chë luarënguenache chata ibojánana chë Jesucristbe ustonëngbioye atañëmuaye, cada te chábeñe más chamotsošbuáchema. Y entšángbioye tmojanéyana: “Bëngbe Bëtsabe amëndayoye jamashënguanma, bënga šontsamna quem luarentše bëtscá jëftsepadecénana ca.” ²³ Nŷetsca ošbuachiyëngcá enefjuanenache, bëtsejemëngcá mándayënga tmojanabacacá, chentšä Jesucristbeñe ošbuáchiyëñtšana, cachënga chentšä ošbuachiyëngbioye jtsamëndayama. Bëngbe Bëtsá jëtšchuayama tondaye ntjascá imojtsemna y cháftaca imojtsencuénta ora, cha tmojanimpadá, chë ošbuáchiyënga Bëngbe Utabnabe cucuatšinë chamotsemnana, ndábeñe chënga imojtsošbuaché.

**Pablo y Bernabé, Sirioca
Antioquía puebløye tbojtanata**

²⁴ Pisidia luarëjana tbojánachnëngo ora, Panfilia luaroye tbojánashjango. ²⁵ Perge pueblëntše Jesucristbe tšabe noticiënga entšángbioye tmojanabuayená, y chentšana Atalia puebløye tbojánata. ²⁶ Chentšana,

Bernabé y Pablo, bejaycá tbojtanata Siroica Antioquía puebloye. Chentša entsānga Bēngbe Bētsá tmojanimpadá chata chabe cucuatšīñe chabotsemnama, chē trabajuīñe chaotsanñenama; y chorna, chē trabajo ya tbojanpochocá. ²⁷ Choye tbojtanashjango ora, nyetsca Jesucristbeñe ošbuachiyēngbioye tmojánachembo, y tmojanacuntá ntšamo Bēngbe Bētsá tšabe soyēnga chátaftaca tojanmama, y ntšamo Bēngbe Bētsá tojaninñanýé, chē ndoñe judiēngnaca chamotsobenama Jesucristbeñe jtsōšbuachiyama. ²⁸ Y Pablo y Bernabé bayté chentše tbojanototoná Jesucristbeñe ošbuachiyēngtaftaca.

**Ichmónēnga y bētsējemēngcá
māndayēnga Jerusalenoca
tmojánenefjna jencuéntama**

15 ¹ Chē tempo, báseftanga Judeocana áshjajnēnga tmojanontsé, Antioquía pueblentše, chentša Jesucristbeñe ošbuachiyēnga mēntšá jabuátambana: “Base bobachtema chē más delicadentše ndoñe šmonjenotētšēse, ntšamo Moisesbe leyīñe endayancá, ndoñe quenátopodena tšēngtaftanga atsebácanēnga jtsemnnama ca.” ² Chíyeca, Pablo y Bernabé jabuachana chca buatēmbayēngtaftaca imojánenatsētsnaye. Cabana, tmojanēbuáyana Pablo, Bernabé y ínñenga Jerusalenoye chamotsama, choca chē Jesucristbe ichmónēngtaftaca y chē chentše Jesucristbeñe ošbuachiyēngbeñe bētsējemēngcá māndayēngtaftaca chama chamencuentama.

³ Chcasna, chē Antioquioca imojánenefjuana Jesucristbeñe ošbuachiyēnga Jerusalenoye chēnga

tmojanichamó. Fenicia y Samaria luarējana imojtsachñējuana ora, chēnga tmojanacuntá ntšamo chē ndoñe judiēnga chēngbe tempsca soyēnguiñe ošbuáchiyana tmojtšanajbanama y chora Bēngbe Bētsábeñe imojtsošbuáchema. Jesucristbeñe chentša ošbuáchiyēnga chca tmojanuena ora, puerte oyejuayēnga imojtsemna.

⁴ Pablo y chē ínñenga Jerusalenoye tmojánashhajna ora, chentša Jesucristbeñe ošbuáchiyēnga, Jesucristbe ichmónēnga y bētsējemēngcá māndayēnga chēngbioye tmojanēbuaja. Chentšana, Pablo y Bernabé tbojanacuntá lempe ntšamo Bēngbe Bētsá chátaftaca yojamcá. ⁵ Pero básefta fariseunga, chora ya Jesucristbeñe ošbuáchiyēnga, tmojantsá y mēntšá tmojánayana: “Chē ndoñe judiēnga entsamna chē más delicadentše base bobachtema tētšēnēnga jtsemnana, bēnga judiēngcá; y tšēngtaftanga cmontsamna chēnga jáuyanana, ntšamo Moisesbe leyēnguiñe iuayancá chamotsamama ca.”

⁶ As, chē Jesucristbe ichmónēnga y bētsējemēngcá māndayēnga tmojánenefjna jencuéntama, chē ndoñe judiēnga aīñe o ndoñe yonjánamnama chē más delicadentše base bobachtema tētšēnēnga jtsemnana, ntšamo chē judiēnga imojanamancá. ⁷ Bēn y bētscá chēnga tmojanencuentá chentšana, Pedro tojantsbaná y mēntšá tojanéyana: “Jesucristbeyeca catšátanga, tšēngtaftanga šmondétatšēmbo, ya bayté entsemna Bēngbe Bētsá tšēngtaftangbentšana atše šonjanábuayana, Jesucristbe tšabe noticiēnga chē ndoñe judiēnga jábuayenama, chca, chēnga Bēngbe Utabnábeñe chamotsošbuáchema.

⁸ Bëngbe Bëtsá jtsetatšëmbuana lempe ntšamo entšanga tmojtsejuabnacá. Y cha šonjaninýanyé, chë ndoñe judiëngnaca imnobena chabe entšanga jtsemnana, chábeñe tmojtsošbuáchese, chë Uámana Espiritu chëngbe ainaniñe cháumashënguama cha tojanma ora, ntšamo cha bëngbe ainaniñe tojanmcá. ⁹ Y chca, Bëngbe Bëtsabiana nyetscanga cachcá monduámama, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnana y ainaniñe tšabe juabna chamotsebomnana, Bëngbe Bëtsabe palabriñe jtsošbuáchiyëse. ¹⁰ Y mora, ñndáyeca tsëngaftanga ndoñe šmontseboše ntšamo Bëngbe Bëtsá tojamcá? Pero tsëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsocumplínama, mo nda ínýabioye uauta uasmanésha cuaftsasmëmnacá; pero lempe chë mandënga, ni bëngbe bëts taitanga ni bënga ntsobenana jocúmpliana. ¹¹ Y chca ndoñe chaondëtsemna. Bënga mondošbuaché bënga atsebácanënga imomnana Bëngbe Utabná Jesús chabe tšabe juabna šojaninýanyéyeca, y Bëngbe Bëtsá cachcá chë ndoñe judiëngnaca tojatsebácá ca” —cha tojanéyana.

¹² Chorna, chentše imojtsemna entšanga nyetscanga iytëca tmojanobiana, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entšanga jinýanýiyama, y inýe soyëngama chabe obenánaca, ntšamo chë ndoñe judiëngbeñe Bëngbe Bëtsá cháaftaca tojanmcá.

¹³ Chë útata jóyebuambayama tbojanpochocá ora, Santiago mëntšá

tojanayana: “Jesucristbeyeca catšátanga, šmochjouena: ¹⁴ Simón šonjabuayená ntšamo Bëngbe Bëtsá natsana tojaninýanyé, chë ndoñe judiëngnaca cha iuanýenama, y chíyeca cha chënguentsana banga tojubuáyana chabe entšanga chamotsemnana. ¹⁵ Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyebuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrënguñe endayancá, mëntšá:

¹⁶ Chentsana atše chanjésabo y chë Rey Davidbe pamíllanga cachiñe uámanënga chantabiana; mo nda canýe uáshajayena yebna tojëtšjebcá, atše, Davidbe pamíllanga cachiñe uámanënga chantabiana;

¹⁷ chca, chë inýe entšanga chamonguango ndayá jamana atše, tsëngaftangbe Utabná, más chašmotsábuatmama, nyetsca ndoñe judiënga, chë atšbe entšanga chamotsemnana atše tijábacacanga.

¹⁸ Chca atše, tsëngaftangbe Utabná séntšichamo, nda ya bayté entsemna tonjanma entšanga chë soyënga chamotsetatšëmbuama ca —chiñe endayana.”

¹⁹ Chentsana Santiago mëntšá tojanéyana: “Chíyeca atše séntsejuabná, bënga ndoñe šontsamna chë ndoñe judiëngbiana jamana más totcá chaotsemnana Jesucristo jtséstonama. ²⁰ Chamna, šontsamna chënga juabuábiamana y jáuyanana ndoñe chamondëtšesá, sananga chë ndaye soyënga entšanga tmojuabná diosënga yomna ca jadórama tmojuiyëbana; bacna soyënga

shembásenga o boyabásengaftaca ndoñe chamondétsama y ndoñe chamondétsesá tsešana bayëngbe mëntšena, y buiñe cach ndoñe ca.

²¹ Er chë natsana tempënga orscana, nyetsca pueblënguenache mondmëna chë Moisés tojëftsananayana soyënga entsángbioye abuayinyayënga; y chabe leyënga, nyetsca ochnayté mondbetsaliaye chë bënga judiëngbe enefjuana yebnënguenache ca” —cha tojanéyana

**Chë Jerusalenoca ichmónënga
y bëtsëjemëngcá mándayënga
canÿe tsbuanácha tmojanichmó
chë ndoñe judiëngbiana**

²² Chentshana, chë Jesucristbe ichmónënga y bëtsëjemëngcá mándayënga, nyetsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyënguentše. ²³ Y chëngaftaca canÿe tsbuanácha tmojanichmó, y chiñe mëntšá yojëtsayana:

Bënga chë Jesucristbe ichmónënga y chë bëtsëjemëngcá mándayënga, cach tsëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca chacmotsábouamna, tsëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

²⁴ Bënga fsëntsetatšëmbo bëngbentshana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tsëngaftanga

ndoñe šmontsetatšëmbo ntšamo jtsejuabnayana ndayá jamama yomnana, Jesucristbe canÿe ndegombre ustóná jtsemnana.

²⁵ Chcasna, bënga fsënjenoyeuná y šonjúnÿnana tsábá yojtsemna báseftanga bënguentšana jabacacayana tsëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama. ²⁶ Chë útatna ba soye tbojotsbocá vida jáshbiana, Bëngbe Utabná Jesucristbiana oservëniñe. ²⁷ Chátaftaca Judas y Silas fsënjichamó; y chatna cach tsëngaftangaftaca bochanjóyebuambaye ntšamo quem tsbuanáchañe yojtšábemanama.

²⁸ Chë Uámana Espíritu y bënga cachcá fsëntsejuabná, bënga ndoñe šontsamna tsëngaftanga jamëndana bëtscá jabuache mandënga Moisesbe leyënguiñe chašmotsocumplínama. Nÿe quem uámana soyënga chiñe aíñe cmontsamna jtsobedecëmana: ²⁹ Ndoñe šmattsesaye mëntšena, chë ndaye soyënga entsãnga tmojuabná diosënga yomna ca jadórama tmojóba bayëngbiana; ndoñe šmatjofsiye buiñe, ni šmatjase tsešana bayëngbe mëntšena; y shembásenga y boyabásengaftaca bacna soyënga ndoñe šmattsama. Chë soyënga ntšamcá, tsábá šmochanjama.

Bëngbe Bëtsá salúdoca chacmotsábouamna ca —chiñe yojëtsayana.

³⁰ Chcasna, chë quem Jerusalenocana ichmónënga tmojésanodiošoftanentshana, Antioquía puebloye tmojána; y chocna, nyetsca chë Jesucristbeñe ošbuachiyëngbioye tmojanëbuaja y

chê tsbuanácha tmojanayentšbuaché
³¹Chê Antioquía pueblentša
 Jesucristbeñe ošbuáchiyënga ntšamo
 chê tsbuanáchañe yojtsabemancá
 tmojanalía ora, bëts añemo tmojtanca
 y corente imojtsóyejuaye. ³²Judas
 y Silas Bëngbe Bëtsabe juabna
 oyebuambnayata ibnamna; as,
 chátnaca chê chentša Jesucristbeñe
 ošbuachiyëngbiye ba soyënga
 tmojanéyana, chënga añemo
 chamotsatsbomnama y Jesucristbeñe
 corente chamotsošbuáchema.
³³Chentšana baseftaytese, chentša
 Jesucristbeñe ošbuáchiyënga
 chëngbiye tmojtanadiošoftá, chê
 ndëmuanyënga tmojanichamóngbiye
 jtama. ³⁴Pero Sílasna tšabá
 ibojtsinyana cachentše más
 jëftsajétanama. ³⁵Pablo y Bernabé
 baseftayshinye Antioquía pueblentše
 tbojanotoná y ba inyëngaftaca
 Bëngbe Utabná Jesucristbe tšabe
 noticiënga entšanga tmojanabuatambá
 y tmojanabuayená.

**Pablo cachiñe inye
 luarëngoye tojána, Bëngbe
 Bëtsabe trabajo jamama**

³⁶Chentšana baseftaytese, Pablo
 Bernabébiye tbojaniyana: “Bëngbe
 Utabnabe palabra tbonjanabuayená
 luarëngoye bochjésa, choca
 Jesucristbeñe ošbuáchiyënga
 jábuachama y jányama ntšamo
 imojtsemnama ca.”

³⁷Bernabé yojtseboše, Juan chê
 Marcos ca uabobuatmábibiye chátaftaca
 jëftsbetšama. ³⁸Pero Páblëna ndoñe
 tšabá ibontsinyana cha jëftsbetšana,
 er Juan chátbentšana tojtsanojuánañe
 Panfilia luarocana, y ndoñe
 tonjanatjëmbambá, Bëngbe Bëtsabe
 trabajo japochócantscuana. ³⁹Y chê
 palabrama tondaye tbonjanenóyeunata

causna, Pablo y Bernabé cachcá
 tbojesanenonyaye. Y chca, Bernabé,
 Marcos tbojëftsanbetše, y bejaycá
 Chipre luaroye tbojánata; ⁴⁰y Páblëna,
 Silas tbojanábuayana jëftsbetšama. Chê
 Antioquía pueblentša Jesucristbeñe
 ošbuáchiyënga Bëngbe Bëtsá
 tmojanimpadá Pablo y Silas Bëngbe
 Utabnabe cucuatšine chabotsemnama,
 chatbe trabajuine chaotsanyënama.
 Chentšana, Pablo Sílasestaca
 tbojánbocna y ⁴¹Siria, Cilicia
 luarënguëjana tojánachnëngo entšanga
 añemo atšatnaye, chê luarenache
 enefjuana ošbuáchiyënga Jesucristbeñe
 más chamotsošbuáchema.

Pablo Timotéobiye tbojáninyena

16 ¹Chentšana Pablo
 tojánashjango Derbe y Listra
 luaroye, y chentše tbojáninyena canye
 Jesucristbeñe ošbuachiyá, Timoteo
 ca uabainá; cha inamna canye judiá
 Jesucristbeñe ošbuachiyabe uaquiñá
 y chabe taitana griego entšá inamna.
²Chê Listra y Iconioca Jesucristbeñe
 ošbuáchiyënga Timoteobiana
 tšabá imojanoyebuambná. ³Pablo
 tojánbošena Timoteo jëftsbetšama;
 pero cabá ndetsbetše orna, Pablo
 base bobachtema chê más
 delicadentše tbojantëtše, ntšamo
 judiënga imojanamancá. Cha
 chca tojanma, jobenayama chê
 judiënga imojoyena luarëngoye
 cháftaca jama, er nyetsca judiënga
 imnatátšëmbo Timoteobe taitá griego
 inamnama. ⁴Chê ibojtsachnëjuana
 pueblënguenache chata ibojtsana
 Jesucristbeñe ošbuachiyëngbiye
 abuayinyaye, ntšamo Jerusalenoca
 Jesusbe ichmónënga y bëtsëjemëngcá
 mándayënga tmojanamëndacá, ndayá
 chê Jesucristbeñe ošbuáchiyënga ndoñe
 judiënga jamama yojtsamncá. ⁵Nyets

luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

**Pablo mo otjenayoquécá canye
Macedonioca entšábioye tbojáninýe**

⁶Chë Uámana Espíritu, Pablo y Sílasbioye tojaninýanýé, chata ndoñe yontsanamna Asia luaroca Bëngbe Bëtsabe palabra entšanga jábuayenana; asna, tbojánachnëngo Frigia y Galacia luarëjana. ⁷Y Misia luaroca enajëbanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondétsama. ⁸Misia luarëjana tmojánachnëngo ora, Troas luaroye chënga tmojána. ⁹Chë te ibeta, Pablo mo otjenayoquécá tojáninýe canye Macedonioca boyabása ibojtsebiatsana y mëntšá ibojtseimpadana: “Diosmanda Macedoniocoye mabo y šmabëjabuache ca.” ¹⁰Pablo chca tojáninýe y cachora lempe tmonjanprontá Macedoniocoye jama. Atšnaca, chë quem soyënga uabiamnayá, chënga sënjétsatjëmbambnaye. Bënga fsënjëtsejuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga choca entšanga jábuayenama.

Pablo y Silas Filipos puebloca

¹¹As, Troasentsana bejaycá fsënjána Samotracia luaroye, y yëfsana Neápolis puebloye, ¹²y chentsana Filíposoye. Filipos enjamna canye uámana bëts pueblo Macedonioca y bëtsca romanënga oyeniñe. Chë luarentše baseftayté fsënjanoquedanga. ¹³Canye ochnaytena, chë pueblentsana fsënjéftsanbocna y chë fshájaye tsachoye fsënjána. Fsënjanuena chentše canjamna canye luare Bëngbe Bëtsáftaca jencuéntama ca, y fsënjána

janguanguama. Fsënjáninýena ora, chentše fsënjanothiama y Bëngbe Bëtsabe palabra fsënjanoyeuambá chentše tmojanóoto shembásengbiama.

¹⁴Enjamna canye shembása, Lidia ca uabainá, Tiatira puebloca, y cha enjamna uámana uabuángana uafjatsenga entšayá uená. Cha inamna Bëngbe Bëtsábioye adoryá y chentše Páblëbioye ibotseyunana. Bëngbe Bëtsá tojanma cha chabosertá lempe ntšamo Pablo yojtsoyeuambnacá, Jesucristbeñe chaotsošbuáchemá.

¹⁵Cha y chabe yebntšë oyenënga tmonjánenabaye ora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre stsošbuaché ca; chcasna, mabënga yebnoye, átsbentšë chašmoquedama ca.”

Y šonjanëterié bënga chentše joquédama.

¹⁶Canye te, chë Bëngbe Bëtsáftaca encuëntaye luaroye fsënjétsajna orna, šonjanëbiatše canye tobiáše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiáše yojanmalísiaye soyëngama.

¹⁷Chë tobiáše tonjanontsé Pablo y bënga usetonana y mëntšá enjétsaychembumbuana: “¡Quem boyabásenga montsemna chë celoca Bëngbe Bëtsabe oservënga y tšëngaftanga cmontsabuayiná ntšamo Bëngbe Bëtsá yobena tšëngaftanga játsëbacama ca!”

¹⁸Y bayté chca enjanchembumbuana; chë causa, Pablo bonjëtsetana y cabana, tonjanobúertana y chë bacna bayëjbioye mëntšá tbonjaniyana: “¡Jesucristbe obenánaca y cha jótšëmbonëse, cbontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentsána tojésanbocna.

¹⁹Pero, chë bayëjbe juabna chábentsána tojésanbocnama y chëngbiama más crocénana jabemama chora chë tobiáše ndoñe yontsobenama, chë tobiáše nduiñënga tmojáninÿe ora, Pablo y Sílasbiøye tmojánishëche y tmojtsanasjojøye plazøye, mandayéngbiøye.

²⁰Chë mandayéngbiøye tmojanënatse ora, chënga mëntšá imojtsichamo: “Quem boyabásata judío entsata bondmëna, y muatbe causa bëngbe pueblentšá entsanga montsenbouenana, ²¹y bontsabatambá soyënga jamama ntšamo chë judiënga imuamancá y bëngbe leyënguiñe chë soyënga jamama ndoñe quenátlesenciana. Bënga ndoñe quešnátamna ni jouenana, ni jamana chë soyënga, romanënga bëtsemnayeca ca” —chënga imojtsichamo.

²²Chora chë entsanga tmojanontsé uayebuáchana; as, chë mándayënga tmojanamëndá chata entsáyá jtsëtsejquëcana y niñëfjéngaca jtsachebuánganjana. ²³Jabuache tmojanachebuánganjentsána, cárceløye tmojanautame y chë utámenënga shanÿá tmojanmandá yejuana chaotsabuajéñÿama. ²⁴Chca tmojanmandá ora, chë utamianá chata tojanënatse chë más tsoye utámenøye y shecuatšëntšana tsuanëšifne tojanatsebuá.

²⁵Pero tsëntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnétsuentaye; y chë inÿe utámenënga chca imojtsuenana.

²⁶Ndeolpe, corente jabuache yojtsëbánjua y chë utámena yebna fshantsocana yojtsábonjnaye. Cachora, nyetsca chë utámenentša bëšašangá

tojantëfjo y nyetsca utámenënga chë cadenëjuangá yojtsayentšjafjona.

²⁷Pero chë utámenënga shanÿá tojanofšená y chë utámenentša bëšašangá yojtsatëfjnama tojáninÿe ora, cha tojanjuabó nyetsca utámenënga tmojtsanacheta ca; chë çausa, chabe espadëja yojenosëngbotëntšena jtsenóitanama. ²⁸Pero Pablo tbojánbochembo: —iAcbe cuerpo ndocá matenábomana; nyetscanga camuentše fsëndëtsomñe ca!

²⁹Asna, chë utámenentša shanÿá canÿe uajuinÿanëšha tojanëyá y chë utámenøye ochamanana tojánamashëngo y auatja causa ngmëmnyáy Pablo y Sílasbe shecuatšëntše yojoshëntsamentšiyè. ³⁰Chentsána tojtanébuacna y tojanéyana: —Señórata, ¿ndayá šojtsemna jamama atše atsbocaná jtsemnama ca?

³¹Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëngnac ca.

³²Y cha y nyetscanga chë yebnentše imojtsemnënga, Bëngbe Utabnabe palabra tmojanabuayená. ³³Cach ora chë ibeta, chë utamianá chata tojanënatse chë lisianënguiñe jetsajabiama. Chentsána, cha y chabe pamíllanga tmojánenabayè. ³⁴Chentsána, chë utamianá chata tojanënatse chabe yebnoye y saná tojanacaredadó. Cha y nyetscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchema.

³⁵Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama. ³⁶Chë utamianá Páblëbiøye tbojaniyana: —Chë mándayënga šmonjamandá tsëndata

jtabáshejuanama. Chcasna, šontsobena natjémbana jtsatoñana ca.

³⁷Pero Pablo chë soldadënga tojanéyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entsangbe delante, bacna soyënga aíñe o ndoñe tatifjamama cabá ndinýanyiye ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

³⁸Chentšana, chë soldadënga chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja. ³⁹Chcasna, cach mándayënga tmojána chata perdón jatétejañama; chentšana tmojtanëbuacna y tmojanéyana: “Diosmanda, muentšana inýe luaroye motsoñata ca.” ⁴⁰As chata chë utámenentšana tbojéftsanbocna y Lídiëbe yebnoye tbojéftsanata. Chentšna, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbioye tmojanañemó. Y chentšana, chata ínýoye tbojtsanoñe.

**Tesalónica puebloca, Pablo
y Silasbioye ndoñe tšabá
tmonjanëbuaja**

17 ¹Pablo y Silas inýe luaroye ibojtsaye ora, Anfípolis y Apolonia bëts pueblënguëjana tbojánachnëngo y canýe bëts pueblo, Tesalónica ca uabáinoye tbojánashjango. Chentše, chë judiënga canýe yebna imnabomna chënga jénefnama. ²Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë

judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrenguinië iuayana soyëngaca, ³chënga yojanabuayiyiná y ndegombre yojaninýanýná, Bëngbe Bëtsabe Uámana Uabuayaná jóbanama y chentšana jtayenama ibojamnama. Y mëntšá yojanëtsëtsná: “Chë Cristo, Jesús endmëna, ndabiama atše cbontsabuayiyiná ca.”

⁴Judiënguentsana báseftanga chiñe imojtsošbuáchiye y Pablo y Silas tmojanéseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásengnaca. ⁵Pero chë judiënga ndošbuáchiyënga chca tmojáninýe ora, puerte envidia imojtsebomna. Asna, chënga tmojánachembo banga, tondaye amënga y bacna entsanga, y chënga tmojanenutaná jamama nyetsca chë pueblentša entsanga chamotsenbouénanama; y canýe entsá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entsangbe cucuatšinië jabáshejuanama. ⁶Pero chentše ndocná tmonjáninýena; as chë entsanga Jasón imojtsesjojoye y chentša mándayënga imojëtsemnoye tmojanánatse y Jesucristbeñe inýe ošbuachiyëngnaca choye tmojanënatse, y mëntšá imojtsáyebuache: “iChë boyabásata, chë ndëmuanýata ibojtsama nyetsca luarentša entsanga chamuenbouénanama, quem luaróynaca tbojabo, ⁷y Jasón chabe yebnentše chata tojúbuaja ca! iChënga montsana ntšamo chë Romoca bëts mandadbe mandënguinië ndoñe quenatslesenciancá, er chënga montsichamo inýe rey canmëna, Jesús ca, y cha, César chë Romoca mandadbe

cuenta nyetscángbeñe yojtsemánda ca!”
—chënga imojtsáyebuache.

⁸ Chë entšanga y chë pueblentsä mándayënga chca tmojanuena ora, corente imojenbouénana. ⁹ Pero Jasón y chë ínÿenga, cháftaca imojtsemnënga, crocénana tmojtanjájó, y as tmojtanabáshejuana.

Pablo y Silas Berea Puebloa

¹⁰ Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebløye chabuétsebocnama. Y chata chøye tbojánashjango ora, chë judiëngbe enefjuana luarøye tbojánata. ¹¹ Chentšä judiënga imojamna más tšabe ainana bomnënga chë Tesalonicoca judiëngbiamä; chcasna, øyejuayënga chë buayenana soye Jesucristbiamä tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsësnacá aíñe o ndoñe ndegombre yojtsemnana. ¹² Y chca, ba chentšä judiënga chatbe palábraca Jesucristbeñe imojtsošbuáchiye, y Grecia luarøca ba uámana shembásenga y boyabásengnaca. ¹³ Pero, Pablo Bereoca chë Bëngbe Bëtsabe buayenana soyama entšanga yojtsabuayiyinama chë Tesalonicoca judiënga tmojántatšëmbona ora, chënga chøye tmojána y tmojanma chentšä entšanga chamuenbouénanama. ¹⁴ Chcasna, banga Jesucristbeñe ošbuáchiyënga tmojanma cachora Pablo chentšana chauétsebocnama y bëjaye tsachøye chaotsoñama; chëntscuana, Silas y Timoteo Bereoca tbojanoquedá. ¹⁵ Pablo tmojantjëmbambá entšangna, Atenas ca uabaina bëts pueblóntscoñe cháftaca tmojána. Chentšana, Pablo chënga tojanabuayená

chamuaišshëconama Silas y Timoteo jaúnayama betscø jtsayana, Pábloftaca jateninÿenama.

Pablo Atenas puebloa

¹⁶ Pablo Atenas bëts puebloa Silas y Timoteo yojtsëbatmanëntscuana, puerte tbojanongmé, er cha tojáninÿe chentšä entšanga imojtsadorana bëtsca cachëngbe pormana soyënga, ndayama chënga imojanjuabná diosënga yojamna ca. ¹⁷ Chíyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentšä plazoca chë ndëmuanÿenga chentšë imojanashjajuanëngaftácnaca. ¹⁸ Y báseftanga, ntšamo jtsejuabnayama entšanga abuátambayënga, epicureunga y estoiqüënga ca uabainëngnaca Pábloftaca imojánenatsëtsnaye. Inÿenga imojtsichamo: “¿Ndayama quem bostero yojtsoyebuambná ca?” Y ínÿengna: “Chana inÿe luarëngoca entšangbe diosëngbiamä muentšë entsabøyebuambnaye ca.”

Chënga chca imojtsichamo, er Páblëna Jesusbiamä y chë obanënga jtayenama yojanøyebuambná. ¹⁹ Asna, chentšä entšanga cha tmojanánatse canÿe luarøye, entšanga jénefjnama y øyebuambnayënga joyaunayama luare, Areópago ca uabáinoye. Chentšë imojanamana uámanënga jénefjnana, nderado ndabiamä jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bëtsayanana bënga quefstsobena jtsetatšëmbuama ca? ²⁰ Aca tsëm soyënga šcontsëtsësná y bënga fsëntseboše jtsetatšëmbuana ndayá chë soyënga bëtsayanana.

²¹ Er nyetscanga Atenasentšä øyenënga y inÿe luarëngocana

áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuéntayana.

²² As Pablo tojantsá chëngbe tsëntsaca chë Areópago ca uabáinentse y tojánayana: —Atenasentša entsanga: ntšamo bominye sënjjajacá, atše séntsetatšëmbo tsëngaftanga ba diosënga puerte šmayaunana y šmadoránama. ²³ Atše sëndánrreparana tsëngaftangbe diosënga šmétsadorana luarënguenache y sënjjínjena canye altar y chentše mëntšá iuábemana: “Chë Bëtsá nduabuatmabiama ca”. Y morna, chë Bëtsá chë nda ntsabuatmcá šmadoránabiama, atše cbontsabuayiyiná.

²⁴ “Chë Bëtsá quem luare y lempe ntšamo chentše yomncá tojanma; cha endmëna quem luarentse y celoca Utabná, y cha ndoñe quenatiyena cha jadórama entsangbe jebna yebnënguine, ²⁵ ni quebnatájaboto ndocná chabiamatondaye chaondétsama, er cha endmëna nda inétsama bënga vida chamotsebomnama y jtseshachnayama chamotsobenama, y cha nyetsca soyënga šnetsatšatnaye.

²⁶ “Cha nyë canye boyabásabentsana nyets luarënguentša entsanga tojánabiama, nyets quem luarentse chamotsiyenama; y cha quem soyënga cabá ndëma ora, tojanjuabó mocna ora y ndayentše entsanga chamuetsiyenama; ²⁷ chca, Bëngbe Bëtsá chamonguanguama, masque chabiamatndoñe corentetmontsetatšëmbo, y chamuinyena y chábëne chamotsošbuáchema; pero ndegombre, Bëngbe Bëtsá béngbentše cada cánÿabentsana ndoñe bënoca quenátsmëna. ²⁸ Ntšamo canya tojanayancá: ‘Bënga Bëngbe Bëtsáftaca cánÿiñe mo canyáca

mondmëna; chábeyeca bënga vida mondbomna, jobónjuama mondobena y ainënga mondmeña ca’. Ntšamo tsëngaftanguentša báseftanga bëts soyëngama uabiamnayëngnaca tmojanayancá: ‘Bënga nyetscanga Bëngbe Bëtsabe básenga mondmeña ca’. ²⁹ Y chcasna, Bëngbe Bëtsabe pamíllanga bënga tmomnëse, ndoñe quešnátamna jtsejuabnayana Bëngbe Bëtsá yomna mo cach entsangbe castellano, midio o chë ndëtšbeca pormana soyëngcá ca, er chë soyëngna nyë ntšamo entsanga tmojajuabocá y tmojtsobencá japórmana. ³⁰ Pero Bëngbe Bëtsá tojanjuabó ndoñe ntjatonyayana chë entsangbe tempsca ndosertánana, y morna, nyetsca luarënguentša entsanga entsaménda, ndaye bacna soyënga tmojtsamama ngmëncaca chamuenojuabó, chca amama chamotsajbaná y Bëngbe Bëtsabe benache chamuatishache ca. ³¹ Bëngbe Bëtsá canye te tojuinyaná, y chë tena, ndocnábioye ínÿabiama más tsábá ntjatonyaycá, cha echanjayana entsanga tsábá o ndoñe tsábá tmonjamama; lempe chca cha echanjama canya cachá tbojabocacá entsáftaca, Jesús; y chca yochtsemnamna, Bëngbe Bëtsá entsanga tojinÿanyé, chë bocacaná Jesús cháuatayenama cachá tojánmayeca ca” —Pablo tojánayana.

³² Chë obanënga mochtayenama ichámuana chë entsanga tmojanuena ora, báseftanga Pablo imojtsáboyejuana, y ínÿengna mëntšá imojtsichamo: —Bënga fsëntseboše chë contsichamo soyënga más chcoye cachiñe jatuenama ca.

³³ As Pablo chëngbentšana tojésanbocna. ³⁴ Pero báseftanga añe Jesucristbeñe imojtsošbuáchiye y Pablo tmojanasto más jatuenama;

chënguentšë imojamna Dionisio, canÿa chë Areopagoca tbiamanënguentšá; canÿe shembásanaca, Dámaris ca uabaina, y ínÿenga.

Pablo Corinto puebloca

18 ¹Chë soyënga tojanochnëngüentšana, Pablo Aténasentšana Corinto bëts pueblöye tojána. ²Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsëtsayama, ³y ntšamo chata jamama Páblënaca jamama inatátšëmboyecna, chátaftaca yojtsoquedañe y cánÿiñe chënga imnatrabájaye; chënga imnatátšëmbo mo tambotemëngcá entšëjuaca japórmana. ⁴Y nÿetsca ochnayté, Pablo yojanamana chentša judío entšangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtšentšena judiënga y ndoñe judiënga chamotsošbuáchemama, ntšamo cha yojtšanëtsëtsnacá ndegombre bëtsemnama.

⁵Silas y Timoteo Macedonocana choye tbojánashjango ora, Pablo nÿets tempo Bëngbe Bëtsabe soyëngama entšanga yojtšabuayiyayey y puerte tšabá chë judiënga yojaniñanÿná, Jesús ndegombre Bëngbe Bëtsabe Uámana Uabuayaná bëtsemnama. ⁶Pero chë judiënga Páblëbe contra imojtsemna y tmojanontšë podesca chabiama ichámuana. Asna, Pablo chabe uchëtjoniyaná yojtšenantšasajjaye, chënga jinÿanÿiyama chënga ndoñe tšabá tmonjánchjanguama, y tojanéyana:

“Tšëngaftanga ndatšebácanënga chašmojóbanëse, cach tšëngaftanga šmochtsótatšëmbñe; atšna ndoñe. Mëntescana chë ndoñe judiënga jábuayenama chantsoñe ca.”

⁷Chorna, chë judiëngbe enefjuana yebnentšana tojéftsanböcna y canÿe boyabása, Ticio Justo ca uabainábioye tojtšanoñe. Cha Bëngbe Bëtsábioye ibojánadorana y chë enefjuana yebnentšá juachaca inoyena. ⁸Y Crispo, canÿe chë enefjuana yebnentšá mandayá, Bëngbe Utabná Jesucristbeñe yojtsošbuáchiye y nÿetsca chabe pamíllangnaca; y banga chë Corintentsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabayey. ⁹Canÿe ibeta, Bëngbe Bëtsá Páblëbioyey mo canÿe otjenayoquécá tbojaniyana: “Ndoñe matauatjana; nÿe cochtsana atšbe soyëngama oyebuambnayey y ndoñe iytëca cattsemama. ¹⁰Er atšë ácaftaca séntsemna y ndocná quecmochátsbojajoy ntšámncama jáborlama; atšë bëtscá entšanga quem pueblentšë sëndábamna ca.” ¹¹Chcasna, Pablo Corintentsë canÿe uata y chnénguana shinÿe tojanototoná, Bëngbe Bëtsabe palabra entšanga abuátambayey.

¹²Pero, Galión chë Acaya luarentšá mandado inamna orna, chë judiënga imojenóyeunayey Páblëbe contra; cha tmojánishache y chë tribunaloyey tmojanánatšey. ¹³Chocna, chë mandado tmojaniyana: —Mua entšanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguñe endayanacá ca.

¹⁴Pablo jóyebuambayama uatajanóntšá orna, Galión chë judiënga tojanéyana: —Quem entšá nderado

ínÿabioye matbënjóba o ndayánaca
 chca matënjobuachjanguá, as cocayé
 atše matijótbema tsëngaftanga
 judiënga yejuana joyaunayama;
¹⁵ pero ntšamo šmotsichamcá
 entsemna nÿe buatëmbana soyëngama,
 nÿe tsëngaftanga šmëbuatma
 entšangbiama y cach tsëngaftangbe
 leyëngama; chcasna, cach tsëngaftanga
 cmontsamna jenóyeunayana y
 jamana ntšamo chašmojenoyeunacá.
 Atše quem base soyëngama ndoñe
 quetsátsboše ngoberna jtsemnana ca.

¹⁶ As Galión tojanamëndá chë
 tribunal luarentšana chë judiënga
 jtëbuacnama. ¹⁷ Chorna, chë entšanga
 tmojánishache chë judiëngbe enefjuana
 yebnentša mandayá, Sóstenes
 ca uabainá, y Galionbe delante
 imojtsejantšetaye. Pero Galión chë soye
 tondayana ibontsentšamna.

**Pablo Antioquiye tojtaná
 y chentšana cachiñe inÿe
 luarëngoye tojána, Bëngbe
 Bëtsabe trabajo jamama**

¹⁸ Pablo cabá bayté Corintëntse
 tbojántotona. Chentšana, Jesucristbeñe
 ošbuachiyëngbentšana tojesanodiošoftá
 y bejaycá Siria luaroye tojána,
 Priscila y Aquílaftaca. Cabá Sirioye
 nda ora, Cencrea puebloca nÿets
 stjénashe yojtsenátsbotje, Bëngbe
 Bëtsábioye jinÿinÿiyama canÿe soye
 tbojanšbuáchenama. ¹⁹ Efeso puebloye
 tmojánashjajna ora, Páblëna Priscila y
 Aquila tojésanabashejuana. Chentšana,
 cha tojána chë chentša judiëngbe
 enefjuana yebnoye y chentše chë
 judiëngaftaca yojanoyebuambná y
 imojánenatsëtsnaye. ²⁰ Báseftanga
 Pablo tmojanimpadá inÿe baseftayté
 chentše chausomñama, pero chana
 ndoñe tonjanoyauná; ²¹ chentšana,
 chëngbentšana tojesanodiošoftá,

mëntšá jëftséyanëse: “Nderádose
 cachiñe chantésabo tsëngaftanga
 jabábuachama, Bëngbe Bëtsá
 šojalesenciase ca.”

Chora, Pablo bejaycá Efesocana
 tojéftsanbocna. ²² Cesarea
 puebloye tojánashjango ora, tojána
 jacheuayama Jesucristbeñe
 ošbuáchiyënga Jerusalemoca; y
 chentšana Antioquiye tojána.
²³ Chentše baseftayté yojéftsemna; y
 chentšana, Pablo tojesaná Galacia y
 Frigia luarënguenache, Jesucristbeñe
 ošbuáchiyënga añemo atšatnaye.

**Apolos, Efeso puebloca Bëngbe
 Bëtsabe soyëngama yojanabuayiyá**

²⁴ Cach tempo, Efesoye tojánashjango
 canÿe judío, Apolos ca uabainá,
 Alejandría bëts pueblócá; cha puerte
 obená inamna jonguamiyama y
 corente inatátšëmbo Bëngbe Bëtsabe
 uabemana palabréngama. ²⁵ Bëtscá
 tojánatsjinÿe chë Bëngbe Utabná
 tojaninÿanjé benachama; añémoca
 yojanoyebuambná y Jesusbe
 soyëngama botamana yojanabuambá,
 masque cha nÿe ntšamo Juan entšanga
 tojánabuambama y tojanëbáyama
 inatátšëmbo. ²⁶ Ndauatjcá Apolos
 tojanontsé jóyebuambayama chë
 judiëngbe enefjuana yebnentše. Pero
 Priscila y Aquila cha imojóyeunaye
 ora, barie tmojanchembo y más
 botamana tmojanbuayená, ntšamo
 Bëngbe Bëtsabe inÿinÿena benache
 bëtsemnama. ²⁷ Apolos Acaya
 luaroye jama yojtseboše orna,
 Jesucristbeñe ošbuáchiyënga bëtscá
 tmojanañémó y choca Jesucristbeñe
 ošbuáchiyëngbiana canÿe tsbanácha
 tmojanichmó, chca, Apolos choca
 tsábá chamofjama. Acaya luaroye
 tojánashjango ora, Jesucristbeñe
 ošbuáchiyënga bëtscá tojanéjabuache.

Bëngbe Bëtsá chëngbe tšabiamá
yojanjuabnáyeca, chënga Jesucristbeñe
corente imojtsošbuáchiye. ²⁸Entšangbe
delante chë judiëngaftaca
jabuachana imojánenatsëtsnaye y
nyëtscanga tojaninÿanÿé, ntšamo
ndoñe tšabá inamncá chë judiënga
imnatatšëmbuama; y Bëngbe Bëtsabe
uabemana palabréngaca chënga
tojaninÿanÿé, Jesús Bëngbe Bëtsabe
Uámana Uabuayaná bëtsemnama.

Pablo Efeso puebloca

19 ¹Apolos Corintoca
yojtsemnëtscuana, Páblëna
chë tjañe luarënguëjana tojánachnëngo
y Efesoye tojánashjango; chentšë
básefta ošbuáchiyënga tojánanÿena,
pero chëngna nyë ntšamo Juan
chë Ubayaná tojanabuatambacá
imnatatšëmbo. ²Pablo chënga
tojanatjá: —¿Uámana Espíritu
chenjánabo tšëngaftangbe ainaniñe
jtsemándayama, Jesucristbeñe
ošbuáchiyënga šmojanóbiamá ora ca?

Chora chënga tmojanjuá: —Ni
mo queftsátstatšëmbo chë Uámana
Espíritu yomnama ca.

³Y Pablo tojanéyana: —As, ¿ntšamo
šmojánenabaye ca?

Y chënga tmojanjuá:
—Fsënjánenabaye ntšamo Juan
entšanga yojanëbayancá ca.

⁴As Pablo tojanéyana: —Juan
tojanëbaye chë bacna soyënga amama
ngmënaca tmojanenojuabó, chca
amana tmojanajbaná y chë Bëngbe
Bëtsabe benache tmojánishachënga,
y entšanga yojanëtsëtsná chë
chábentšana yochjanashjanguábeñe
chamotsošbuaché ca; y cha Jesús
endmëna ca —Pablo tojánayana.

⁵Chca tmojanuena ora, chënga
tmojánenabaye Bëngbe Utabná
Jesús jótšëmbonëse, chábeñe

imojtsošbuáchemá. ⁶Pablo chëngbe
bestšašifne chabe cucuatšënga
tojanajó ora, Uámana Espíritu
chëngbe ainaniñe tojánamashëngo
jtsemándayama; tmojanontšë
inÿetšá biyangana, chënga tempo
ndmabiyañe, y Bëngbe Bëtsabe
juabna imojtsoyebuambná. ⁷Chentšë
imojtsemna bnëtsana uta entšanga.

⁸Unga shinÿëntscuana Pablo
yojánaye chë judiëngbe enefjuana
yebnoye y ndauatjácá Jesucristbe
soyëngama yojanoyebuambná;
entšángaftaca imojánenatsëtsnaye
y entšanga yojanëtsëtsná Bëngbe
Bëtsabe amëndayama, chënga chábeñe
chamotsošbuáchemá. ⁹Pero ba
nduauenanënga ndoñe imontsošbuaché
y Bëngbe Utabná tojaninÿanÿé
Benachama entšángbeñe bacna
soyënga imojtsichamo. Chcasna, Pablo
chëngbentšana tojtšanojuánañe y
nyë chë Jesucristbeñe ošbuáchiyënga
tojanébuaja canÿe scueloye, canÿe
entšá Tirano ca uabainabe yebnoye.
Chentšë cada te chë ouenanëngaftaca
yojanoyebuambná, ¹⁰y chca yojánama
uta uatëntscuana; y chca, nyëtscanga
Asia luaroca oyenënga Bëngbe
Utabnabe palabra tmojanuena,
judiënga y ndoñe judiëngnaca. ¹¹Y
Bëngbe Bëtsá puerte bëts soyënga
Pábloftaca yojtsama. ¹²Tša bëts
soyënga tojanma; chíyeca, nyëtsca
chë Pablo tojuabojajo entšayá y
pañuelëjuangá, entšanga imojanamana
šoquëngbioye juyambana, y chca
tmojama orna, chë šocanënga
juenatjëmbana y chë bacna bayëjënga
entšángbentšana jésebocanana.

¹³Pero básefta judiënga tsáshenañe
bacna bayëjënga entšángbentšana
imojtanëbuacana. Chë judiënga
imojtseboše chë bayëjënga jtëbuacnana,
Bëngbe Utabná Jesús jótšëmbonëse.

As, chë bacna bayëjéngbioye mëntśá imojtsétsnaye: “Bëngbe Utabná Jesús, Pablo bondbetsëbayaná jótšëmbonëse y chabe obenánaca cbontsaménda muabentsána chašmuaisebocnama ca.”

¹⁴ Chca imojánama chë judío Esceva ca uabainabe canýsëfta uaquinënga. Esceva inamna bachnangbe amëndayá.

¹⁵ Pero canýe, Escévëbe uaquinënga chca tmojánayana orna, chë bacna bayëja mëntśá tojanéjua: “Atše Jesús sënduábuatma y sëndétatsëmbo nda Pablo yomnana; pero tsëngaftanga, čndëmuanyënga šmonna ca?”

¹⁶ As, cachora chë bacna bayëjbe juabna uambayá chëngbioye tojanontsënja y tša añemo bomná bëtsemnayeca chënga tojtsanayëñaná, jabuache jtsajantšëtaýëse; chë causa, chënga chë yebnentsána tmojtsanacheta enašënga y lisiánënga.

¹⁷ Nýetscanga Efesoca oyenënga, judiënga y ndoñe judiënga, chca tmojántatsëmbona y corente imojtsanauatja. Y chca, Bëngbe Utabná Jesús entsànga más imojtsatschuanaye.

¹⁸ Jesucristëbe imojtsošbuachiyënguentšana, banga imojánashajuana y entsangbe delante imojtsecompšaye, tempo bacna soyënga tmojanmama; ¹⁹ banga, chë bocjuanana soyënga jamama imojanëntšénënga, chëngbe bocjuanana librëšangá tmojaniyëbo y entsànga imojtsantješna ora, chëšangá imojtsajuinýiye.

Tmojanjuabó ntsachetśá chë librëšangá bëtšamanama y tojanóbocna shachna bnëtšana uaranga crocénana nýetśá.

²⁰ Y chca, Bëngbe Utabnabe palabra más ba entsànga imojtsuenana y čiñë imojtsošbuáchiye y Bëngbe Bëtśá chabe obenana entsángbeñe yojtsinýinýnaye.

²¹ Chca tojanochnëngüentšana, Pablo tojanjuabó Macedonia y

Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentsána Romoye jama ca. ²² Asna, chabe uajabuachanënguentšana útata, Timoteo y Erasto, Macedonoye cha tojanichamó. Chëntscuana Pablo baseftayté más Asia luarentšë tbojanjëtana.

Efesoca entsànga tmojánenbouenana

²³ Chë tempo, Efesoca entsànga corente tmojánenbouenana, chë Bëngbe Utabná yojtsinýanýná Benache imojtsisháchichanëngbe causa. ²⁴ Chë entsànga chca tmojanma, er canýe entśá mídioca soyënga pormayá, Demetrio ca uabainá, chënga tojanayëñaná chca jamama. Cha yojanamana binche soyetëmënga japórmana y chëtëmënga yojáninýna mo chë Efeso puebloquëngbe diosá Artemisa jadórama bëtš yebncá. Demétrioftaca imojantrabájangna bëtscá crocénana imojanójacañe chë soyetëmënga eniñe. ²⁵ Demetrio tojanébuaja cháftaca imojantrabájanga y ínýenga cach mídioca soyënga pórmayënga, y mëntśá tojanéyana: “Baconga, tsëngaftanga šmondétatsëmbo, bënga bëtscá crocénana jtsebomnamna quem trabajuentšana chca jopódiana. ²⁶ Pero tsëngaftanga šmontsonýá y šmontsuenana ntšamo chë Pablo ca uabainá yojtsichamecá. Cha entsichamo, chë entsangbe pormana soyënga ndoñe yontsemna jtsadoránana ca; y chca ba entsànga tojabuayená y chënga aíñe montseyuana. Chë soyna ndoñe nýe muentšë Efesentšë chca quenátopasana; nýets Asia luaríñnaca chca entsopasana. ²⁷ Resjo entsemna; chca causa, entsànga

bëngbe trabajuama ndoñe tšabá quemochátichamo y chë uámana Artemisa jadórama bëts yebnama mochántichamo uámana yebna ndoñe yondmëna ca. Y chca, Artemisbe obenana entsanga mochantsábotena y Artemisa ndoñe bañe quemochátabatma, nda Asientše y nÿets luaríinaca mondadorana ca.”

²⁸ Chca tmojanuena ora, chca pórmayënga puerte tojánëtëna y tmojanáyebuachena: “iEfesoquëngbe Artemisa corente bëtsá endmëna ca!”

²⁹ Y chca, nÿetsca chë pueblentša entsanga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjojóana tmojanënatse chëngbe enefjuana yebnóntscoñe. ³⁰ Pablo tojánbošena choye jamashënguama chë entsángaftaca jóyebuambayama, pero Jesucristbeñe ošbuáchiyënga ndoñe tmonjanlesenciá. ³¹ Chë Asioca mándayëngbentše básiëftanga imnamna Páblëbe amiguënga, y chënga Páblëbioye palabra tmojanafja chë jénefjnama yebnoye ndoñe chaondámashënguama.

³² Chëntscuana, entsanga imojtsejotonocna, ínÿënga imojtsechembumbuana canÿe soye y ínÿëngna inÿe soye, chënga corente imojtsenbouenana causa, y banga chentše imojtsemnënga ndoñe imontsetátšëmbo ndayama choye tmojanobéconama. ³³ Pero básiëfta judiënga, canÿe entsá, Alejandro ca uabainá, chë entsangbe natsanoye tmojanajuatsëntše, y básiëftanga cha tmojanbuayená ntšamo yojtsopasánama. Asna, Alejandro tojánëfjatsšëmbo cucuátšëca iytëca chamobiamama, er cha yojtseboše entsangbe delante chë judiënga

jobuauyanama. ³⁴ Pero, Alejandro judío bemnama chë entsanga tmojánatšëmbona ora, nÿetscanga tmojanáyebuachena uta horëntscuana, mëntšá: “iEfesoquëngbe Artemisa corente bëtsá endmëna ca!”

³⁵ Chë pueblentša mándayëngbe uajabuachaná, entsanga iytëca jábiamama tojanobená ora, tojanéyana: “Efesoquënga, nÿets luariñe endótatšëmbo, quem pueblentše oyenënga iuamna jtsinÿenana chë Artemisa jadórama bëts yebna y chë cha jadórama celocana otsatšëna ndëtšbé. ³⁶ Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuabocá. ³⁷ Tšëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiama ndoñe podësca tmonjoyebuambá. ³⁸ Demetrio y cháftaca šmotrabájanga, nderado ndabiama ndaye demanda šmojtsebomnësna, cabildoca endatëfjna y chentše mándayënga montsemna chë demandënga joudenama, y chëngbentše cada ona šmojhjëftsendemánda. ³⁹ Y tšëngaftanga inÿe soye šmojtseguasna, cmontsamna ntšamo bëngbe leyënguñe yomandancá, nÿetsca quem pueblentše oyenëngaftaca jenóyeunayana. ⁴⁰ Ndayá mënté tojopasá causa, resjo entsemna bëngbiama chamuayana, ntšamo leyënguñe yomncá bënga ndoñe montsama ca; y bënga ndoñe quemuátobena ndayá jojuana, ndáyeca quem enbouenanana tojopasá ca šojátjayëse ca” —cha tojanéyana. ⁴¹ Y chca jayanëse, chë entsanga tojtanichamó.

Pablo, Macedonia y Grecia luaroye tojána

20 ¹ Chë enbouenanana tojanochnëngo ora, Pablo chë Jesucristbeñe ošbuachiyëngbioye

tojanébuaja jábuayenama, añemo chamotsatsbomnana; tojesanodiošoftá y Macedonioye tojéftsanbocna. ² Chë luarënguëjana cha tojánachnëngo Jesucristbeñe ošbuáchiyënga beca añemo atatšatnaye, ba chabe palabrëngaca; chentsana, Grecia luaroye tojánashjango, ³ y chentše unga ishinÿe tojanoquedá. Barquëshañe Sirioye játama Pablo yojtseprontana orna, tojántatsëmbona chë judiënga cha jtsóbama tmojanenóyeunama. Asna, tojanenojuabó jesshéconama, cach Macedonia luarëjana jésachnënguse. ⁴ Pablo quem boyabásenga tmojantjëmbambá: Sópater, chë Bereocá, Pirrbe uaqiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófimnaca, Asia luarocata. ⁵ Chënga tmonjanonatsé y šonjanëbatma Troasoca. ⁶ Chë levadúraca ndëpormana tandëse saye fiestentšana, Filíposentšana barquëshañe fsñjëftsanbocna y shachna tianoye, Troasoca chë tmonjanonatsenga fsëntanishëche, y chentše canÿe semana fsënjanoquedanga.

Ntšamo tojanopasá Troas puebloca

⁷ Chë inÿe semana jobojátšama te, fsënjánenefjna Jesucristbeñe ošbuachiyëngcá tandëse jájátayama, cánÿiñe jasama; y Pablo entšanga enjëtsëtsësnaye. Cha bonjamna yëfsana chentsana jéftsebocnana; chë causa, más bën chëngaftaca tonjanoyebuambá, tsëntsetëtscuana. ⁸ Fsënjamna canÿe tsoye tsbanana tsañoca y chentše ba uajuinÿanëshangá enjanamna; ⁹ y canÿe bobontse, Eutico ca uabainá, ventanentse enjántbemana. Pablo bën enjanoyebuambná causa, chë bobontse ocnayana tbojanábuache. Cabana, corente tojtsanomaná ora,

chë unga tsañocana tontsanótsatše y obaná chora tmontanatsbaná. ¹⁰ As, Pablo tonjánastjango, chë bobóntsbioye tbonjanotsbuajó y tbonjanotsejcuá. Y chë entšanga tonjanéyana: “Ndoñe nÿetšá matauatjëngana; ainá cha entsatsmëna ca.”

¹¹ Chentsana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbanëse tojanmama. Chora Pablo chë entšangaftaca tonjanse y tontëtanontsé oyeuambnayana, jabinÿnëntscuana. Chora Pablo chentsana tontsanoñe. ¹² Y chë otsatšëna bobontsana ainá imojtsatánatseñe, y chama chë entšanga corente oyejuayënga imojtsemna.

Pablo Troasentšana Mileto pueblöye tojána

¹³ Bëngna fsënjanonatsé y barquëshañe fsënjána Aso pueblóntscoñe, chentsana Pablo jtesbetšama, ntšamo fsënjanenoyeunacá, er Pablo tonjánbošena fshantscá choye jana. ¹⁴ Asoca Pábloftaca fsëntaneninÿena ora, bëngaftaca barquëshañe cha tonjána Mitilene pueblöye. ¹⁵ Chentsana fsënjëftsanbocna y yëfsana Quío luarëjana fsënjánachnëngo, y chë inÿe yëfsana Samos luaroye fsënjánashjajna. Chentsana fsënjána y yëfsana Mileto pueblöye fsënjánashjajna. ¹⁶ Chca tonjanochnëngo er Pablo ndoñe chenátanbošena Efesoye jama, Asia luarinë ndoñe yapa ndëtsemnama. Chca tojánbošena er cha enjëtebošë betsco Jerusalemoca jtsatsmënana, tojopodesna chë judiëngbe fiesta, Pentecostés ca uabaina fiestama.

Ntšamo Pablo chë Efesoca ošbuachiyëngbeñe bëtsëjemëngcá mándayënga tojanéyana

¹⁷ Miletocana Pablo tonjanmandá chë Efesoca ošbuachiyëngbeñe

bëtsëjemëngcá mándayënga jobiatšana. ¹⁸ Chënga tmonjánashajna ora, Pablo tonjanéyana: “Tšëngaftanga šmondétatšëmbo ntšamo atše quem Asia luaroye sënjabánashjango orscana tšëngaftangbeñe snetsamana. ¹⁹ Njÿets tempo Bëngbe Utabná sëndëservena y cach atše uamaná ndoñe quetsatenobiamná. Corente shëchbuiye tijÿtsoperdé y ba soyënguiñe tijasufrí, chë judiënga atše jóbama mondboše causa. ²⁰ Y lempe ntšamo tšëngaftangbe tšabiamna yomncá tconjabuayená; tondaye ntjatsbuetamencá. Njÿetscangbe delante sënjabuatambá y tšëngaftangbe yebnënguenáchnaca. ²¹ Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngménaca chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchemá. ²² Y mora Jerusalenoye chanjá; Uámana Espíritu chca šontsemánda y ndayá choca chjapásamna ndoñe quetsátstatšëmbo. ²³ Njÿe mëntšá aññe sëndétatšëmbo: Njÿetsca bëts publënguenache ndayëjana atše chandbëtsana, Uámana Espíritu šondbëtsebuayiyñaye entšanga cašmochjutame y puerte chaisufrima camochjama ca. ²⁴ Atšbe vida cach atšbiamna ndoñe yapa quenatámana, chaitsaina o chayóbana. Pero atšbiamna iuámanana endmëna ndayá atše jobenayana atšbe trabajo jÿtsepochócana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entšàngaftaca tšabiamna yomnana jábuayenama. ²⁵ “Y mora atše ndegombre séntsetatšëmbo, tšëngaftangbentšana, chë ndëmuanjÿengbentše Bëngbe Bëtsabe amëndayama sënjabuayená,

ndocná atše más quešmochátinÿe. ²⁶ Chíyeca, atše ndegombre mënté cbetséyana: Atše tondaye quetsátstatšëmbo nderado nda ndatsbocaná chaojóbanabiamna, ²⁷ er atše ntšamo Bëngbe Bëtsá jamama yojuabnacá lempe tconjabuayená, tondaye ntsebuetamencá. ²⁸ Chcasna, cach tšëngaftangbiamna šmochtsantješna y njÿetscanga muentše Jesucristbeñe ošbuachiyëngbiámncana. Chëngbeñe mo chëngbe abuajënyangcá Uámana Espíritu tconjajayé, Bëngbe Bëtsabe entšanga chašmotsanÿenama, chënga Bëngbe Bëtsá chánga tojábiamna, chabe Uaquiñabe buiñe juabuáshanëse y jóbánëse, mo bëtscá cuafjopagacá. ²⁹ Atše séntsetatšëmbo, atše chaitsoñe orna, banga mochanjabo y chënga mochántsemna mo corente tšátjaye tjañe quešëngcá, Jesucristbeñe ošbuáchiyënga chábeñe ošbuáchiyana chamotsajbanama chënga jamama. ³⁰ Y tšëngaftangbentšánëncana báseftanga mochanjábocana y entšàngbiöyey uayátsenaye soyënga mochanjabuatambá, chca, báseftanga Jesucristbeñe ošbuáchiyënga chë ínÿengbentšana chamotsoluarema y njÿe chë abuátambayëngbiöyey chamotsésetonama. ³¹ Chcasna, sempre šmochtsantješna; ndoñe chacmondëbnëtjomba, atše unga uatëntscuana, bnété y ibeta, tšëngaftanga cada ona cbondétsabuayiyñama y chama atše puerte tijasufrí. ³² “Y morna, Jesucristbeyeca catšátanga, Bëngbe Bëtsabe cucuatšñe cbëtsabashejuana y ntšamo tšëngaftangbiamna chabe tšabe juabna yomnana palabréngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchemá, y

endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entšángbioye, ndëmuanÿenga cha tojáchembo chabe entšanga chamotsemnama. ³³ Atše ndocnabe crocénana, o castellano o entšayá atšbiana quetsatántšaboše; ³⁴ más inÿetšá, y tšëngaftanga lempe šmondétatšëmbo, atše cach atšbe cucuátšeca tijéftsetrabajama, atšbiana y átšeftaca imojamnëngbiana opresido enjamna soyënga janguanguama. ³⁵ Atše nÿets tempo sëndinÿanÿná entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabrëngama sempre jtsejuabnayëse: ‘Canÿe entšá más oyejuayá jtsemnana ndayánaca inÿabioye tbojtsatšëtná ora, y inÿabioye tbojtseyëngacá ora ndoñe nÿa nÿetšá ca’ —Pablo tonjanoyebuambá.

³⁶ Pablo chë soyënga tonjánayanentšana, tonjanoshamentšé y nÿetscanga chentšë monjëtsemnëngaftaca Bëngbe Bëtsá tmonjanótšëmbona. ³⁷ Nÿetscanga tmonjánenobošachna y Pablo tmontanotsejcuá y tmontanámochó. ³⁸ Y entšanga corente ngménaca monjëtsemna, chënga ndocna te más cha mochántinÿe ca Pablo tojanéyana causa. Chentšana, chënga chë barquëshha enjetsamnëntscoñe cha tmonjantjëmbambá.

Pablo Jerusalenoye tojána

21 ¹ Chë Jesucristbeñe ošbuáchiyënga fsënjéftsanabashejuana ora, barquëshhañe fsënjanojoyayé y ndericho Cos luaroye fsënjána; chë yëfsana Rodasoye y chentšana

Pátara puebloye. ² Pátara pueblentšë canÿe barquëshha fsënjáninÿena, Fenicioye enjétsaye; asna, chëshhañe fsënjanojoyayé y chentšana fsënjéftsanbocna. ³ Fsëntsana chëñjuana ora, fsënjáninÿe Chipre luare; Chipre bëngbe uañicuayoica tonjanoquedá y bëngna Sirioye fsënjétsaye. Tiro pueblentšë chë barquëshentšá uasmanëshangá jëftsáboshjonama yojámnayeca, chë puebloye bënga fsënjéftsanamashjna. ⁴ Chentšana, Jesucristbeñe ošbuáchiyënga fsënjánanÿena y canÿsëfta te chëngaftaca fsënjanoquedá. Chënga Pablo tmonjanianyana cha ndoñe ibonjamna Jerusalenoye jtsayana ca, er chë Uámána Espíritu tojanabuayená ndayá choca cháftaca jopásama. ⁵ Chë canÿsëfta te tonjanochnëngo ora, chentšana fsënjéftsanbocna y nÿetscanga parejo chëngbe shëmangaftaca y básengaftaca šonjanatjëmbambá chë pueblo chabóntscoñe; y chentšë, chë chënyañe fsënjanošamentšé y Bëngbe Bëtsá fsënjanimpadá. ⁶ Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

⁷ Tirentšana fsënjéftsanbocna y Tolemaida puebloye fsënjánashajna; y chentšë tonjanopochocá bëngbiana bejaycá chë te ayana. Tolemaidentšë Jesucristbeñe ošbuáchiyënga fsënjanocheuá y chëngaftaca canÿe te fsënjanoquedanga. ⁸ Yëfsana, bënga chentšana fsënjéftsanbocna y Cesarea luaroye fsënjánashajna. Chocna, bënga fsënjána Felipe chë Jesucristbiana tšabe noticiënga abuayinayabe yebnoye y cháftaca fsënjanoquedanga. Felipe enjamna canÿa chë Jesucristbe ichmónëngbioye

ujabuachanënguentšá, Jerusalenoca ubuáyanënga. ⁹Felipe enjánabamna canta ndëbouamna bembalianga y chënga monjamna Bëngbe Bëtsabe juabna oyebuambnayënga. ¹⁰Ya bayté chentše fsënjëtsemna orna, Judeocana tonjánashjango canya Bëngbe Bëtsabe juabna oyebuambnayá, Agabo ca uabainá. ¹¹Agabo béngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espiritu entsichamo, Jerusalenoca quem uasnanëja nduínbioye chë judiënga mëntšá camochjama y ndoñe judiëngbe cucuatšinë camochjáboshjona ca.”

¹²Chca fsënjajuena ora, bënga y chentša entsanga Pablo fsënjanimpadá Jerusalenoye ndoñe chaondëtsama. ¹³Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngmënana chaotsemnama ca? Atše séntseprontana y ndoñe nje chašmobatsëcama; Jerusalenoca jobanámna séntseprontana, Bëngbe Utabná Jesusbiana ca —cha tonjánayana.

¹⁴Jáyënjana ndoñe chibiatanobená ora, ndoñe más chibiatanimpadá; nje mëntšá fsënjaniyana: —Ntšamo Bëngbe Utabná yojtsebošcá chaotsemna ca.

¹⁵Chë soyënga tonjanochnëngüentšana, fsënjano prontá y Jerusalenoye fsënjána. ¹⁶Cesareoca, báfesfta Jesucristbeñe ošbuáchiyënga choye šonjanatjëmbambá y chocna, chënga šonjanënatse canye Chipre luaroca entšabe yebnoye, Mnasón ca uabainá, ndábentše bënga joquédama. Mnasón tempscana inamna Jesucristbeñe ošbuachiyá.

Pablo tojána Santiago jauatsëtsayama

¹⁷Jerusalenoye fsënjánashjajna orna, chentša Jesucristbeñe ošbuáchiyënga oyejuayënga šonjanëbuaja. ¹⁸Yëfsana, Pablo béngaftaca tonjána Santiago jábuachama, y chentše, nÿetsca chë ošbuachiyëngbeñe bëtsëjemëngcá mandayëngnaca monjëtsemna.

¹⁹Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbe tojanmama.

²⁰Chca tmonjanuena ora, Bëngbe Bëtsá tmontanchuá y Pablo mëntšá tmonjaniyana: “Morna, Jesucristbeyeca bëngbe catšata, contsonyá ntšamo ba uaranga judiënga Jesucristbeñe imojtsošbuáchema, y chënga nÿetscanga montsantješna nÿetsca Jesucristbeñe ošbuáchiyënga chë Moisesbe leyentša nÿetsca mandënga chamotsocumplínama. ²¹Y entsanga chëngbioye noticia tmojatšatá, aca chë inÿe luarënguenache imoyena judiënga cojtsabatambá, Moisés tojanmandá soyënga ndoñe ntseyeunanama y basetëmënga base bobachtema chë más delicadentše ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatšëmbcá ndoñe chamondëtsamana ca. ²²Y morna, ¿ntšamo chë soyëngama cochtsemna? Ndegombre, chënga mochanjätatšëmbona aca moye tcojabama. ²³Chcasna, ntšamo cbochanjabuayenacá cochjama: Bëngbentše canta boyabásenga montsemna y chënga entsamna Bëngbe Bëtsabiana canye šbuachenana soye jamama. ²⁴Acaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábenga jtsatsmënama ntšamo

chamojtsama ora, y ntsachetšá jětsjájuama chaojtsamncá, aca cochjětsjáju, as chěnga chamobená nýets stjēnashe jtsenátsbotjijama, jinyanjyama, ntšamo Běngbe Bětsábioye tmojašbuachenacá ya tmojamama. Y chca, nýetsca judiēnga mochanjinýe ndoñe ndegombre yontsemna chě ntšamo chěngbioye acbiamá tmojacuntacá; masna, chěnga mochanjátatšēmbona aca ndegombre ntšamo Moisesbe leyíñe yomandancá icuamama. ²⁵Y chě ndoñe judiēnga Jesucrístbeñe imojtsošbuachengbiamna, bēnga ya fsěnjubúábiamá y fsěnjáuyana ndayá jtsocumplínama chěnga yojtsamnama, mēntšá: ‘Ndoñe chamondětsesá mēntšena, chě entšanga tmojtsejuabná diosēnga imomna soyēnga jadórana tmojijēbana; ni buiñe, ni tsešana bayēngbe mēntšena; y ndoñe chamondětsama bacna soyēnga shembásēnga y boyabásēngaftaca’ ” —chěnga tmojánayana.

**Běngbe Bětsabe bēts yebnentšē
judiēnga Pablo tmojánishache**

²⁶As Pablo, yěfsana chě cántanga tonjanēnatse y chěngaftaca tonjanma soyēnga Běngbe Bětsabe delante tšábēnga jtsatsmēnama. Chentšana, Pablo Běngbe Bětsabe bēts yebnoye tonjánamashēngo chě bachnanga júnayama, ndayténtscoñe yojamna chě cantangbiamá soyēnga jtsamama, Běngbe Bětsabe delante tšábēnga jtsatsmēnama, y jayanama ndayté chěngbiamá yojtsemna ndaye ora cada ona ibojtsemna ndayánaca Běngbe Bětsabe bēts yebnoye juambana, Běngbe Bětsabiamá juatšēmbonama.

²⁷Chěnga tmojanenoyeuná y tmojánayana canýsēfta tentscuana chca jamana ca. Chě canýsēfta te ya jochnēnguama yojtsemna

orna, básefta judiēnga Asioquēnga Pablo tmojáninýe Běngbe Bětsabe bēts yebnoca y tmojanma entšanga chamuenbouénanama. Y cha tmojánishache, ²⁸mēntšá jtsayebuáchēse: “Ísraeloca entšanga, šmabětsējabuache ca! Quem boyabása entsemna chě nýets luarēnguenache iuana abuátambaye soyēnga bēngbe entšangbe contra, y ntšamo bēngbe leyēnguiñe endayanama contra, y quem Běngbe Bětsabe bēts yebnama ndoñe tšabá yontsoyebuambná. Y cabana quem Běngbe Bětsabe bēts yebnoye grieguēnga tojúmashēngo, y chca cha tonjama chě Běngbe Bětsabe bēts yebna Běngbe Bětsabe bominýiñe ndoñe tšabá chaondětsemnama ca” —chěnga imojtsichamo.

²⁹Chca imojtsichamo, er entšanga Pablo tmojáninýe chě bēts pueblentšē Tróximo Efesocáftaca; y imojtsejuabnaye chábioye Běngbe Bětsabe bēts yebnoye Pablo tbojanánatse ca.

³⁰Nýetsca chě pueblentša entšanga tmojánēnbouenana, y ochamanana chě Pablo yojtsemnoye tmojánashajjna. Pablo tmojánishache y Běngbe Bětsabe bēts yebnentšana shjoye tmojtsansjojó, y cachora chentša bēšašangá tmojtanatame. ³¹Jtsóbama ya imojtsebuachéta ora, chě Romoca soldadēngbe mandayá tojántatšēmbona nýetsca chě bēts pueblentša entšanga imojtsenbouenanama. ³²Asna, chě mandayá chabe soldadēnga y inýe chentša amēndayēnga tojánachembo y cánýiñe chě entšanga imojtsemnoye tmojětsanótjajo. Entšanga, chě mandayá y chě soldadēngbioye tmojánayē ora, tmojtsanajbaná Pablo jantšetayana.

³³Chorna, chě soldadēngbe amēndayá tojanobeconá, Páblēbioye

tbojánishache y tojanmandá uta cadenéjuaca cha chamotsebátsécama y tojanatjá: “¿Nda mua yomna y ndayá tojama ca?” ³⁴ Pero chë entsángbeñe, ínÿenga canÿe soye imojtsáyebuache y ínÿengna inÿe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama. ³⁵ Chë soldadëngbe oyenoca grádasbengoye tmojánashajjna ora, chë soldadënga tojanotocá Pablo cutsnana juambama, chë entsánga tša rábiaca imojtsemna causa, ³⁶ er chënga ústonoye imojétsaye y “¡Chaóvana ca!” imojtsaiuáyebuache.

**Ntšamo Pablo entsángbe
delante tojanenëuyaná**

³⁷ Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tšačatjaleséncia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama! ³⁸ As, ¿aca ndoñe condmëna chë Egiptocá, chë ndoñe bayté quenátsmëna entsánga yojanëtsësná chë mándayëngbe contra chamotsemnana y chë canta uaranga podesca uamana entsánga puñálaca uajatëngaftaca, entsánga ndoyena luaroye tojanbochná ca?

³⁹ Chora Pablo tbojanjuá: —Atše judío sëndmëna, Tarso puebloca onÿnaná, canÿe uámana pueblentše Cilicia luaroca; Diosmanda šmolesenciá entsánga jáuyanama ca.

⁴⁰ As, chë soldadëngbe amëndayá chca tbojanlesenciá. Páblëna chë gradasbenguiñe tojantsá y cucuatše tojanatsbaná entsánga iytëca chamobiamama. Nÿetscanga iytëca

imojtsemna orna, Pablo hebreo biyañe mëntšá entsánga tojanéyana:

22 ¹ “Baconga y taitanga, mora šmochjouena atše jenéuyanama ntšamo chÿayancá ca.”

² Pablo cachëngbe biyañe, hebreo biyañe yojtsóyebuambnana entsánga tmojanuena ora, más iytëca tmojanobiana. As Pablo tojanéyana: ³ “Atše judío sëndmëna. Tarso pueblentše, Cilicia luaroca sënjanonÿná, pero muentše Jerusalemntše sënjanoboché y sëndétatšëmbo soyëngna Gamaliélbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nÿets atšbe ainánaca Bëngbe Bëtsá sëndëserveda, ntšamo nÿetsca tšëngaftanga mora šmontsamancá. ⁴ Atše sënjánama chë Jesucristo tojaninÿanÿé Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame. ⁵ Chë judío bachnangbe más uámana amëndayá, nÿetsca chë judiëngbeñe bëtsëjemëngcá mándayënga y inÿe muentša mándayënga mondobena jayanana ntšamo sëntsichamcá ndegombre yomnana. Chënga uabemana tsbuanachangá šmonjaninÿé, bëngbe catšátanga judiënga chamotsetatšëmbuama atše mando stsanbomnana, Jesucristbeñe ošbuáchiyënga jótabayama; y Damascoye sënjánana choca Jesucristbeñe ošbuáchiyënga jótabayama, moye Jerusalemoye junatsama jacastígayama.”

**Pablo tojanacuntá ntšamo
Jesucristbeñe ošbuachiyá
tojanóbema**

(Hechos 9.1-19; 26.12-18)

⁶ “Pero canÿe te benachiñe Damasco béconana sënjëtsaye orna, mo nÿetsto ora, nÿe ndeolpe

atšbe juachañe canye bëts tcuinÿe celocana tonjanbuashinÿínÿena. 7 Y fshantsoye sënjétseshajaye y canÿe oyebuambnayana sënjanuena mëntšá: ‘Saulo, Saulo, ¿ndáyeca šcojtsacmena ca?’ 8 Atše sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjuá: ‘Atše sëndmëna Jesús Nazaretocá, y aca condama atšbe entšanga chamotsesufrínama ca.’ 9 Chë átšeftaca monjánajnënga chë bëts tcuinÿe tmojáninÿe y tmojanouatjananga, pero chë oyebuambnayana ndoñe tmonjanuena. 10 Chora atše sënjantjá: ‘¿Bëngbe Utabná, ndayá jamama šojtsemna ca?’ Y cha šonjaniyana: ‘Matëtsbaná y mëtëtontšë Damascoye jama. Chentše canÿa cmochanjabuayená ndayá jamama cmojtsemnama ca.’ 11 Chë tcuinÿe yapa tonjanbuashinÿínÿena causa, atše jtaná sënjanoquedá. Chcasna, chë ínÿenga šmontanobuacuetëntšë y chca, Damascoye sënjánashjango.

12 “Chentše enjamna canÿe bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo bëngbe leyënguine iuayancá, y nÿetsca chentša judiënga monjanamana chabiamá tšabá jtsóyebuambnayana. 13 Cha tonjánabo atše jinÿama y tonjánashjango ora, šonjaniyana: ‘Jesucristbeyeca atšbe catšata, Saulo, chacotsatabinÿna ca.’ Cachora y cha sënjáninÿe.

14 “Chentšana cha tonjánayana: ‘Bëngbe bëts taitangbe Bëtsá aca tcmojuábuayana, ntšamo cha acbiamá yobošcá chacotsetatšëmbuama, chë nÿetsca soyënguine Tšabá Amá chacuinÿama y cachabe uayášentšana chacóyeunama. 15 Bëngbe Bëtsá chca tojama, aca chë chabe buayenana soyëngama entšángbeñe

chacóyebuambama, y chamna nÿets luarentša entšángbeñe cochjacuénta, ntšamo tcojinÿe y tcojouencá. 16 Y mora, indoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnama ca’ ” —cha šonjaniyana.

Pablo tojanacuntá ntšamo chë ndoñe judiëngbiøye tmojánichmoma

17 “Jerusalenoye sëntaná ora, Bëngbe Bëtsabe bëts yebnoye sënjáná cháftaca jencuéntama, y ndeolpe atše mo otjenayoquécá sënjanoquedá. 18 Chca orna, Bëngbe Utabná sënjáninÿe y cha mëntšá šonjaniyana: ‘Betsco motsa y cam ora Jerusalenentšana métsebozna; quemuentša entšanga ndoñe quecmochatóyeunaye ntšamo atšbiamá condétatšëmbo y contsëtsëtsnacá ca.’ 19 Atše sënjanjuá: ‘Bëngbe Utabná, chënga mondétatšëmbo atše sënjánana nÿetsca chëngbe enefjuana yebnënguenache y chë ácebeñe ošbuáchiyënga sënjanëtámiana y sënjánatsetšenaye; 20 y acbiamá ndegombre oyebuambnayá Esteban tmonjanóba ora, átšnaca chentše sënjamna y tšabá imojtsama ca chama sënjëtsejuabnaye, y cabá chë monjanóbanangbe entšayëjuangá atše chora sënjanabojanÿá ca’ —atše sënjanjuá. 21 Pero chca sënjánayana ora, Bëngbe Utabná šonjaniyana: ‘Motsa; atše bën luarëngoye, ndoñe judiëngbiøye cbochanjíchmuá ca.’ ”

Pablo y chë soldadëngbe amëndayá

22 Chë entšanga chëntscoñe tmojanuena; pero chë ndoñe judiëngbiamá tojanoyebuambá orna, chënga tmojanontšë uayebuáchana: “iNdoñe tšabá quenátsmëna cha vídaca chaotsemnama! iMotsóba ca!” 23 Y

chënga más imojtsáyebuache; puerte rábiaca chëngbe uichëtjonëjuangá tsbanánoye imojtsëbéntaye y tsbanánoye polvëshe imojtsëtšana; ²⁴ chë causa, chë mandayá tojánayana chë soldadëngbe oyenoye Pablo chamotsémashëngo ca, y tojanmandá chamotsetjanja chaobuambama ndáyeca entšanga chca chabe contra imojtsáyebuache. ²⁵ Pero jtssetjanjama ya tmojanbatsëca orna, chentšë imojtsemna soldadëngbe amëndayábioye Pablo tbojantjá: —¿Tšëngaftanga šmobena canýe entšá derecho bomná mo canýa Romoca onýnanacá jatjanjana, ndegombre tšabá o ndoñe tšabá tonjamama cabá ndayana ora ca?

²⁶ Chë básefta soldadëngbe mandayá chë soye tojanuena ora, tojána y nyetsca soldadëngbe amëndayábioye chama ibojuenaye, mëntšá: —¿Ndayá cochjama? Chë entšá derecho bomna mo canýa Romoca onýnanacá canmëna ca.

²⁷ As chë amëndayá tojána Pablo yojtsemnoye y tbojanianya: —Šmëyana, ¿aca derecho bomná mo canýa Romoca onýnanacá comna ca?

Y cha tbojanjuá: —Arseñor ca.

²⁸ Chora chë amëndayá tojánayana: —Atšë becá crocénana sënjëtšajájó mo canýa Romoca onýnanacá derecho jtsebomnama ca.

As Pablo tbojanjuá: —Y atšna derecho bomná mo canýa Romoca onýnanacá sëndmëna atšë tijanonýná orscana, er atšbe taitá chca derecho bomná inamna ca.

²⁹ Chcasna, chë jatjanjama imojtseprontanënga, Páblëbentšana tmojanjuaná; y chë mandayánaca tojanojuaná y yojtsauatja, Pablo derecho bomná mo canýa Romoca onýnanacá yojamnama

tojántatšëmbona ora, er cha tojanmandá Pablo chamotsebátsëcama.

Pablo, Jerusalemntša uamana mándayëngbe delante

³⁰ Chë soldadëngbe amëndayá yojtseboše ndegombre jtssetatšëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nyetsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

23 ¹ Chora Pablo, nyetsca chë mandayëngbioye tojanënyanyë y tojanéyana: —Taitanga, atšë mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

² As, Ananías, chë bachnangbe más uamana amëndayá, tojanmandá Páblëbe béconana imojtsemnënga cha chamotsáyejantšetama.

³ Pero chora Pablo Ananíasbioye tbojanjuá: —iBëngbe Bëtsá ácnaca cmochanjëtšjantšetá, bacna entšá, ntšamo ndegombre tcojuabnacá ndinýinýnayá! Aca chentšë contsetbemana tšabá o ndoñe tšabá tijamama jayanama, ntšamo Moisesbe leyinë yomandancá; as, ¿ndáyeca cojtsemánda chašmojantšetama? Chca chë leyinë ndoñe quenátšlesenciana ca.

⁴ As, chabe béconana imojtsemna entšanga tmojánayana: —¿Chca chë Bëngbe Bëtsabe bachnangbe más uamana amëndayábioye cochjójyenguango ca?

⁵ Chora Pablo tojánayana: —Taitanga, atšë ndoñe quetsátstatšëmbo cha chë bachnangbe más uamana amëndayá yomnama. Er Bëngbe Bëtsabe

uabemana palabrënguine mëntšá endayana: “Entšangbe mandayabe contra ndoñe catjayana ca.”

⁶Pablo tojáninÿe chë mándayënguentše báseftanga saduceunga y ínÿengna fariseunga imojtsemnama; as, mëntšá tojanáyebuachena: —Taitanga, atše fariseo sëndmëna; atšbe bëtsétsanga fariseunga mondmëna. Atše, jtsošbuáchiÿese chë obanënga mochtayenama tsobatmana causa, atše ndoñe tšabá séntsama ca tšëngaftanga šmochjayana ca.

⁷Pablo chca tojánayana ora, chë fariseunga y saduceunga tmojanontšë enatsëtsnayana, y chë causa nÿetsca entšanga ndoñe cachcá imontsejuabnaye. ⁸Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aíñe chë soyënguine jtsošbuáchiyana. ⁹Y nÿetscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntšá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canÿe ángel o espíritu muábioye ndegombre tbojayana ca.”

¹⁰Entšanga más imojtsáyebuache y chë soldadëngbe amëndayá yojtsauatja nderado entšanga Pablo muantsatcacaye; as, cha tojanmandá soldadënga chamua Pablo chë entšángbentšana jaisábocnama y chë soldadëngbe oyenoye cachiñe jesánatsama.

¹¹Yëfsana ibeta, Bëngbe Utabná Páblëbioye tbojánëbëbocna y tbojaniyana: “Pablo, ainaniñe añemo cochtsebmna. Ntšamo aca atšbiana condétatšëmbo y muentšë

Jerusalenentše condoyebuambnacá, cachcá cmontsemna Romoca jamama ca.”

Judiënga tmojanenoyeuná Pablo jtsóbama

¹²Chë inÿe yëfsana, judiënguentšana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofsiyana, cha jóbantscuana. ¹³Chca jamama tmojanjuabó entšanga imojamna canta brëtsanëngama más. ¹⁴Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntšá tmojánayana: “Bënga Bëngbe Bëtsá mëntšá fsënjašbuachená y bacna soyënga béngbeñe chaotsemna chca ndoñe fsënjocumplise: Tondaye ntjasana, ni ntjofsiyana, Pablo jóbantscuana. ¹⁵Morna, tšëngaftanga y chë inÿe muentšá mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjayana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

¹⁶Pero, Páblëbe uabenbe uaquiñá chë soye tojántatšëmbona; asna, tojána chë soldadëngbe oyenoye, chama Pablo jauenayama. ¹⁷Chorna, Pablo canÿe básefta soldadëngbe mandayábioye tbojanchembo y tbojaniyana: “Diosmanda quem basa mánatse chë nÿetsca soldadëngbe amëndayábioye; canÿe soye entsebmna chábioye juenayama ca.”

¹⁸As, cha chë bobontse tbojëftsantbetše, chë nÿetsca soldadëngbe amëndayábioye tbojanánatse y tbojaniyana: “Chë

utamená Pablo šonjachembo y šonjaimpadá quem bobontse ácbioye juanatsana; mua caojtsebomna canÿe soye aca jauyanama ca.”

¹⁹ Chë soldadëngbe amëndayá chë bobóntsbiöye tbojëftsanobuácuëtëntsiye, luaroye tbojanánatse y tbojantjá: —¿Ndayá cojtsebomna atše jauyanama ca?

²⁰ As chë bobontse tbojanianana: —Judiënga tmojenoyeuná taitá jaimpádama, yëfse chëngbe amëndayëngbiöye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. ²¹ Pero ndoñe catjóyaunaye; chënguentshana canta bnëtsanëngama más entsanga iytëmenënga Pablëbiana montsanýá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofsiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojanianana.

²² Chentšana, chë soldadëngbe amëndayá chë bobóntsbiöye tbojanmandá, ndayá ibojuenayama ndocnábeñe ntsecuëntayana, y chentšana tbojtanichmó.

Pablo tmojanánatse Félix, chë Cesareoca mandádbioye

²³ Chentšana, chë soldadëngbe amëndayá tojánachembo útata chë inÿe soldadëngbiöye mándayënguentshana, y tojanamëndá chamoprontama uta patse soldadënga, inÿe canÿsëfta bnëtsanënga couayënguine y inÿe uta patse lanzëšangaca, Cesarea puebloye ibeta, las nueve ora jabocanama; ²⁴ y tojanamëndá couayënga chamoprontá

Pablo chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye. ²⁵ Y canÿe tsbuanácha chëngaftaca tojanichmó y chëchañe mëntšá yojtsábemana:

²⁶ Claudio Lisias, chë bëts uámana mandado Felixbiana: Salud bomná chacotsomñe.

²⁷ Judiënga quem boyabása tmojishache y montseboše jtsóbama; pero cha mo canÿa Romoca onÿnanacá derecho bomná yomnama sënjáatšëmbona ora, atšbe soldadëngaftaca sënjá y chëngbe cucuatšentshana cha sënjatsbocá.

²⁸ Atše sëntseboše jtsetatšëmbuana ndaye soyama chënga chabe contra imojtsichámuama; as, cha sënjuánatse nÿetsca chë judiëngbe amëndayënga montsemnoye; ²⁹ y chentšana, atše sënjáatšëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárceloye jutámiamana. ³⁰ Pero atše sënjáatšëmbona chë judiënga tmojenoyeuná cha jtsóbama; chíyeca, cam ora cha ácbioye sëntsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

³¹ Chentšana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatris puebloye tmojanánatse.

³² Yëfsana, chë shecuátšeca tmojána soldadëngna cach soldadëngbe oyenoye tmojésanshëcuana, y chë couayëne enjaquenënga Pábloftaca tmojána.

³³ Cesareoye chënga tmojánashjajna ora, chë tsbuanácha chë mandádbioye tmojanantšabuaché, y Pablënaca

chabe cucuatšiñe tmojánboshjona.

³⁴ As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnana, y Cilicia luarocá cha inamnana cha tojántatsëmbona ora, ³⁵ tbojanianyana: “Acbe contra ichámënga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanýama.

**Ntšamo Pablo chë mandado
Félixbe delante tojanenëuyaná**

24 ¹ Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentsana y canýa entsanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

² Pablo tmojanábocna ora, Tértulo tojanontšë chabe contra jayanama y Félixbioye tbojanianyana: “Aslëpaye, taita mandado, ácbeyeca bënga natjëmbana fsëndoyena y aca puerte obiaishjáchá cómnayeca ba tšabe soyënga quem luarentša entsangbiana yojtsebinýna.

³ Nýets tempo y nýetsquénache chë soyënga fsëndoyëngacañe, bëts uámana mandado, y bënga chama corente cbondetsechuaná. ⁴ Pero ndoñe yapa bën jatenbiamnyamna, Diosmanda ratotema šmotsoyauná.

⁵ Bënga fsëntsetatšëmbo quem boyabása entsanguentše entsemna mo bacna shacuancá, nýets luarënguenache yojtsana y yojtsama chë judiënga nýetscanga cachca soye ndoñe chamondëtsejuabnama, y cha yojtsemna chë Nazaretocabe ustonëngbe uanatsaná. ⁶ Y tonjábošena jamama Bëngbe Bëtsabe bëts

yebna, Bëngbe Bëtsabe bominyiñe ndoñe tšabá chaondëtsemnama; chíyeca bënga cha fsënjotbá. Bënga fsënjábošena chabiana jayanana tšabá o ndoñe tšabá tonjamama, ntšamo bëngbe leyënguiñe endayancá; ⁷ pero chë soldadëngbe amëndayá Lisias tonjontremetë y jabuachana bëngbe cucuatšëntšana tbojtsánatseñe, ⁸ y tonjayana chë chabe contra ichámëngna caojtsamna ácbioye chama jabana ca. Cach taitá chacojatjá ora, ndegombre soyënga cochántsetatšëmbo ndáyeca bënga muabe contra fstsichámuama ca” —cha tojánayana.

⁹ Y chë judiënga chentše imojëtsemnënga imojtsanichamo aññe chca tojanopasá y lempe ndegombre yojtsemna ca.

¹⁰ Chentšana, chë mandado Páblëbioye tbojánëfjatsëmbo chaóyebuambama; as Pablo tojánayana: “Atše sëndétatšëmbo aca ba uatama comna muentša entsangbiana tšabá o ndoñe tšabá tmonjamama ichamuá; chcasna, tondayama ntsuatjácá y puerte oyejuayá acbe delante šcuenëuyaná.

¹¹ Ntšamo cach aca jtsëtatšëmbuama contsobencá, cabá bnëtsana uta te entsemna atše Jerusalenoye sënjá, Bëngbe Bëtsá jadórama. ¹² Y quemënga ndoñe chešmátinýena nderado ndáftaca jabuachana enatsëtsnayıñe, ni entsanga chamuenbouéñanama amiñe, Bëngbe Bëtsabe bëts yebnoca, ni chëngbe enefjuana yebnënguenache, ni inýe luarënguenache chë bëts pueblentše. ¹³ Quem entsanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca. ¹⁴ Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse

ntšamo Bëngbe Bëtsá šonjaninÿanyé benache yomncá; y quem entšanga montsichamo, básefta soyënga ntšamo bënga quem Tsëm Benache ústonënga fstsošbuachecá, ndoñe ndegombre yondmëna ca. Pero atšna nÿetsca chë Moisesbe leyinë y Bëngbe Bëtsabe juabna oyebuambnayëngbe uabemana librëšanguentša soyënguinë sëndošbuaché; ¹⁵ y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nÿetsca entšanga, lempe tšabá amënga y chë ndoñe tšabá améngnaca. ¹⁶ Chíyeca, atše nÿets tempo puerte tšabá sëndama, tondayama ntjatenócochinÿenama y atšbe ainana natjémbana chaotsomñama, Bëngbe Bëtsabe delante y entšangbe delántnaca.

¹⁷ “Básefta uatama inÿe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnjémënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama. ¹⁸ Atše sënjama soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentše šmonjínÿena, pero ndoñe chešmátinÿena ni ba entšángaftaca, ni enbouenaniñe. ¹⁹ Chë šmonjinÿenënga entsamna ácbioye jabana y acbe delante atšbe contra chamuayana, nderado ndayá tmojtsebomnëse. ²⁰ O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tijbuáchjanguama chešmënjínÿena, atše castiganá jtsemnama šojtsemna ca chënga chamuayanama; ²¹ o

nderado nántsemna chë atše chëngbentše sëntsemna ora, mëntšá tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.’ ”

²² Félix bëtscá inatátšëmbo Bëngbe Utabná tojaninÿinÿé Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entšanga tojanéyana: “Chë soldadëngbe amëndayá Lisias chaojášhjangora, chanjayana ntšamo quem tšëngaftangbe sóyeca jamama ca.”

²³ Y chentša soldadëngbe amëndayábioye tbojanmandá Pablo jtsebojanÿama, pero nÿe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošca cha chamuauájabuachama.

²⁴ Chentšana baseftaytese, chë mandado Félix Cesareoye tojtashjango, chabe shema Druslaftaca, canÿe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canÿa nanjobenaye Jesucristbeñe ošbuachiyá jtsemnama. ²⁵ Pero, nÿetsca soyënguinë tšabá jtsamama, cachá jenomándama jtsobenama y ntšamo tmojamama nÿetsca entšangbiana Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanianana: “Mora, mata; luare quëtstsebomna ora, cbochjachembo ca.”

²⁶ Jëtsboshjonama Pablo crocénana chabuatabuenámncaca Félix inobátmana; y chca, ba soye ibojanófjajana cháftaca jencuëntama.

²⁷Y chca uta uata tojanochñengo; chentšana, Félix ya ndoñe más chë mandado yontsemna y chabe cuenta Porcio Festo mandadca tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsanboshjona.

Pablo Festbe delante

25 ¹Festo chë luaroye tojánashjango y unga tianoye, Cesarea pueblentšana Jerusalenoye cha tojána. ²Chocna, chë bachnangbe amëndayënga y chë más uamana judiënga Féstbioye tmojána Páblëbe contra jayanama. ³Y tmojanimpadá, mo chëngbiam canyë bëts pavor cuenta, cha chaomandá Pablo Jerusalenoye chamuánatsama. Chëngna imojétsejuabnaye Pablo benachiñe chamotsóbama. ⁴Pero Festo tojanéyana, Páblëna Cesareoca utamená yojtsemna y baseftaytese cha choye jtama ca. ⁵Y tojanéyana: “Chamna, tšëngaftangbe amëndayënga átšeftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

⁶Festo Jerusalenentše posufta o bnétsana te más chëngaftaca tbojëftsanjétana y chentšana Cesareoye tojtaná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama. ⁷Pablo choye tojánashjango ora, Jerusalenocana tmojánashjajna judiënga tmojanobobeconá y ba uabouana soyënga chabe contra imojtsichamo, pero ni canyë chë soyëngama tmonjanobená jinyanýiyana chca ndegombre bétsemnama.

⁸Y Pablo, cachá jenéuyanama mëntšá yojtsichamo: —Atše tondaye

chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

⁹Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

¹⁰As Pablo tojánayana: —Atše séntsemna chë Romoca bëts mandado tojichamó amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre condsetatsëmbcá, judiëngbe contra atše ndocna bacna soye chiyatsma. ¹¹Nderado atše ndaye bëts soye tijobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšinë atše jaboshjonana. Chíyeca, Diosmanda chë Romoca bëts mandado cháuyana tšabá o ndoñe tšabá sënjama ca —Pablo tojánayana.

¹²As Festo, chë soyama chabe buayinyayënga tojanantjá y chentšana tojánayana: —Chë Romoca bëts mandado quem soyama cháuyanama tcojábosenëсна, chábioye cochjá ca.

Festo, Rey Agrípaftaca tbojanencuentá ntšamo Pábloftaca jamama

¹³Chentšana baseftayté tojanochñengo ora, Rey Agrípa y Berenice Cesareoye tojána, Festo jauatsétsayama. ¹⁴Bayté chata chentše tojanajétana; y chca, Festo chë réybioye tbojanencuentá Páblëbe soyama. Cha mëntšá tbojanayana: —Muentše endmëna canyë entšá, Pablo ca uabainá;

Félix utamená tbonjëftseboşhona, atşe mandadcá sënjontsé ora. ¹⁵Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y şmonjaimpadá cha jóbanama ibojtsemna ca atşe jayanama. ¹⁶Y atşe sënjáuyana: “Chë romanënga ndoñe quematamana ndocnabiama jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenéuyanama cha chaobenama ca.” ¹⁷Chíyeca, chënga moye tmonjabo ora, ndoñe yapa bën ntjatenobiamnaycá cach yëfsana atşbe puestentşe tribunaloca sëntótbema y sënjamandá chë boyabása jobetsana. ¹⁸Pero chabe contra ichámënga, ntşamo atşe sëndanjuabnacá chënga mochjayanamna ni mo canye bëts soye chabe contra chemátayana, chënga jóyebuambayama tonjóyentşbuache ora. ¹⁹Chënga chabe contra montsichamo, nye cachëngbe Dios ntşamo jadórama yomnana y canya Jesús ca uabainábiamna; cha tojanóbana, pero Pablo entsichamo cha ainá yotsomñe ca. ²⁰“Chora atşe ndoñe quetstëtsetatşëmbo ntşamo chë soyiñe jamana; asna, Pablo sënjantjá Jerusalenoye jama tayojetseboşe ca, choca atşe jayanama tşabá o ndoñe tşabá cha tonjanmama. ²¹Pero cha şonjaimpadá camuentşe jaboshjonana, cach Romoca bëts uámana mandado chë soyama tojayanëntscuana ca. Chcasna, atşe sënjamandá cha chamotsebojanýama, chë mandádbioye jíchmuama atşe jobenayëntscuana ca” —Festo tbojanuentá.

²²Chca tbojanuentá ora, Agripa Féstbioye tbojaniana: —Atşnaca sëntseboşe chë boyabása joyeunayama ca.

Y Festo tbojanjuá: —Cach yëfse oído chábioye cochanjabuájua ca.

²³Chë yëfsana, Agripa y Berenice corente uachuanentşe chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblentşa uámana taitanga. Chentşana Festo tojanmandá Pablo jobetsana; ²⁴y chora cha tojánayana: “Rey Agripa y nyetsca taitanga bëngaftaca şmojtsemnënga: Chentşe entsemna chë boyabása. Nyetsca judiënga chabe contra átşbentşe montsabíchamo, Jerusalenoca y quem Cesarea pueblëntşnaca, y nya jtsayebuáchëse tşa şmontseimpadana cha chaóbanama; ²⁵pero atşe sëntsejuabná quem boyabása tondaye tonjama, jóbanama chabotsemnama ca. Y más, cachá şonjaimpadá chë Romoca bëts uámana mandado César chabe soyama cháuyanama; chcasna, chca chanjama, chábioye cha chanjíchmu. ²⁶Pero atşe, atşbe bëts uámana mandádbioye quem boyabásabiamna juábobemama ndocna serto soye quetsátsbomna causa, tşëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentşana, ndayá juabemama atşe chaitseboznama. ²⁷Er atşe sëntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtşichámuama ndoñe lempe ntjuabemana ca” —cha tojánayana.

Pablo tojanontsé rey Agripbe delante jóyebuambayama

26 ¹Chentşana, Agripa Páblëbioye tbojaniana: —Jóyebuambayama conselesenciana, cach aca chacuenéuyanama ca. As Pablo, chë réybioye jachuayama cucuatşe tojanatsbaná y jenéuyanama

tojanontsé mentsá jayanama:
 2—Atše ndegombre sentsoyejuá
 mora chjobenaye acbe delante
 jóyebuambayama, uamana rey Agripa,
 chca, atše jenéuyanama nyetsca
 soyengama ntšamo judienga atšbe
 contra montsichámuama; 3 y más
 sentsoyejuá, taitá conduábuatmama
 lempe ntšamo judienga monduamancá
 y condétatšëmbo chë judienga
 ndayama imuenoboyebuambnana.
 Chcasna, Diosmanda uantádoca
 šmotsoyeuná.

**Pablo tojanacuntá ntšamo
 cha tempo inamnana**

4 “Nyetsca judienga mondétatšëmbo
 ntšamo atše tempscana chéngbeñe
 tsiyenama, bobontse sënjamna
 orscana, atše sënjanonýna luarentše
 y Jerusalemntše. 5 Chéngnaca
 mondétatšëmbo y montsobena
 jayanana, chénga tmojtsebošese, chca
 ndegombre yomnana; atše nyets
 tempo fariseucá vida sëndbomna, y chë
 fariseunga mondoyena más soyenga
 jtsamése chë judiengbe leyéngaca chë
 inýe judiengbiana. 6 Y mora, ntšamo
 Bëngbe Bëtsá bëngbe bëts taitanga
 tojanašebuachenacá, chë obanënga
 jtayanama cha yochjamama puerte
 jtsošbuáchiyëse atše obatmana causa,
 šmojuánatse atšbe contra jayanama.
 7 Bëngbe bnétsana uta Israeloca
 bëts pamíllanga mondobátmana
 chë šbuachenana soye chéngbiana
 chaóshjanguama y chíyeca, cada te
 bnëté y ibeta chénga Bëngbe Bëtsá
 mondadorana y mondëservenana. Y
 atše cach soyama obatmana causa,
 bëts rey Agripa, judienga mora atšbe
 contra montsabíchamo. 8 ¿Ndáyeca
 tšëngaftanga judienga šmojtsichamo,
 chë obanënga chámuatayenama
 Bëngbe Bëtsá yochjamama

jtsošbuáchiyama ndoñe šmontsobena
 ca?

**Pablo tojanacuntá, ntšamo
 tempo cha Jesucristbeñe
 ošbuáchiyënga yojanaborlánama**

9 “Y cach átšnaca sënjanjuabná atše
 šojamna lempe ntšamo stjobenacá
 jamana, Jesús chë Nazaretocábeñe
 ošbuáchiyënga corente chamosufrima,
 10 y chca Jerusalemntše atše sënjanma.
 Chë bachnangbe améndayënga
 mando šmonjanatšeta, y chca,
 banga Jesucristbeñe ošbuáchiyënga
 cárceloye sënjanëtame; y jtsébáyama
 ca chéngbiana montsanichamo
 ora, átšnaca aíñe chca chamoma
 ca sënjánichamo. 11 Y ba soye, chë
 judiengbe enefjuana yebnënguenache
 jabuache chénga sënjanatsetšená,
 chénga Jesucristo ústonana
 chamotsajbanama, y chéngaftaca tša
 etonaná sënjëtsemna causa, chë inýe
 luarëngoca bëts pueblënguenáchnaca
 chénga sënjanécamena.”

**Pablo tojanacuntá ntšamo
 cha Jesucristbeñe ošbuachiyá
 tojanóbema**

(Hechos 9.1-19; 22.6-16)

12 “Y cachcá jamama canýe te
 Damascoye sënjétsaye; chë bachnangbe
 améndayënga uabemanëchangá
 šmonjanëntšabuaché chca jamama
 y, cachënga choye šmonjanichmó.
 13 Pero, uamana rey, chë benachëjana
 mo nyetsto ora, sënjáninýe canýe bëts
 tcuinýe celocana, shinýama corente
 más enjëtsebinýnaye, y atše y chë
 átšeftaca ajnëngbe shéconana corente
 enjëtsebuashinýinýana. 14 Nyetscanga
 fsënjánshajaye y atše sënjanuena canýe
 oyeubuambayana, hebreo biyañe,
 mentsá šonjétsatsaye: ‘Saulo, Saulo,
 ¿ndáyeca chca šcojtsacmena ca? Cach

aca bacá contsenabomá, atšbe entšanga chamosufrima tcojtsama ora, mo uacná ngmëche niñëfjiñe cha tojtsosacunjá orcá, cachá jenótsetšenana ca.’¹⁵ As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca.’¹⁶ Pero matëtsbaná y matëtsá. Atše cbonjëbëbocna jinÿinÿiyama aca tcojuábuayanama atše šcochjaserviama, y chacotsetatšëmbuama y entšanga chacuacuntama, mora tconjinÿe soyama y más hcoye atšbiam a cbochanjinÿinÿiye soyëngámna.¹⁷ Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná,¹⁸ chënga atšbe soyëngama josértama aca chacomama. Chca, chënga bacna juabnënga ndoñe chamondëtsebomna, mo ibetiñe cuaftsemnëngcá, sinó mo binÿiniñcá chamotsemna átšëftaca, atše chë entšangbe juabnënga binÿinayá. Satanasbe cucuatšiniñe ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebomnama canÿe luare entšángaftaca, chë ndëmuanÿengbioye Bëngbe Bëtsá tšabe entšanga y chabe entšanga tojábiam, chënga átšbeñe betsošbuáchiyama ca’ ” —cha šonjaniyana.

Pablo tojanma ntšamo chë mo otjenayoquëcá tojaninÿcá

¹⁹“Chcasna, bëts rey Agripa, atše sënjanma chë mo otjenayoquëcá sënjáninÿe ora ntšamo Cristo šonjaniyancá; ²⁰y natsana, Damascoca

entšanga chë tšabe noticiëngama sënjanabuayená; chentšana, Jerusalenoquënga y nÿetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngmënaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinÿinÿiyama chca ndegombre tmojanmama.²¹ Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošena atše jtsóbana.²² Pero Bëngbe Bëtsá sempre šonduájabuachana, y chca, cada te méntscoñama, nÿetscanga Bëngbe Bëtsabiam sëndabuayiná, uámanëngbioye y nduámanëngbioynaca; nÿe ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inÿetšá ndoñe.²³ Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nÿetscanga chábeñe tmojtsošbuáchenga atsebácanënga mochtsemnama ca.’ ”

Pablo tojanma rey Agrípbioye jáyëñjanama, Jesucristbeñe ošbuachiyá chaóbemama

²⁴Pablo, cachá jenëuyanama chë soyënga tojánayana ora, Festo mëntšá tojánáyebuchena: —iPablo, opá cojtsóbema! Yapa ualíaye causa, opá tcojtsóbema ca.

²⁵Pero Pablo tbojanjuá: —Opá ndoñe quetsátsmëna, bëts uámana

Festo; inÿetsá entsemna; atše sêntsoyebuambná nÿets juábna, y ndegombre soyënga. ²⁶Chentše rey Agripa entsuenana, y cha puerte tsábá chë soyëngama endétatšëmbo, chíyeca, tondayama ntjatauatjca, atše chabe delante sêntsoyebuambná; atše corente sêndétatšëmbo chánaca chë soyëngama yotatšëmbuama, er ndayá Jesús tojanmcá, ndoñe tonjopasá ndaye iytémëna chaboye. ²⁷Bëts rey Agripa, ¿Bëngbe Bëtsabe juabna oyeambuambnayënga tmojánayana soyënguinë aca quecošbuaché? Atše sêntsetatšëmbo aïne chiñe cošbuáchema ca —Pablo tbojanianyana.

²⁸Chora Agripa tbojanjuá:
—Batšatema más y mašcjayënjana
Jesucristbe ustoná atše jóbemama ca.

²⁹As Pablo tojánayana: —Nÿe batšatema más o bëts cama más, atše Bëngbe Bëtsá sêntseimpadana, ndoñe nÿe bëndatbe barie, sinó nÿetscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondétsemna, ntšamo mora atše sêntsemná ca.

³⁰Chorna, chë rey, chë mandado, Berenice y chë chëngaftaca imojantbiámanënga tmojantsbaná, ³¹y luaroye tmojána chë soyama jencuéntama. Mëntsá imojtsichamo: —Quem boyabása ndocna bacna soye tonjama jóbanama chabotsemnama, ni mo utamená jtsemnama ndoñe quebnátsmëna ca.

³²Y Agripa Féstbioye tbojanianyana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

**Roma bëts puebloye
Pablo tmojanichmó**

27 ¹Italia ca uabaina
luaroye Pablo jíchmuama

tmojanenoyeuná ora, atše, quem librëša uabiamayá, cháftaca sënjána. Chora Pablo y chë inÿe utámenënga Julio ca uabainabe cucuatšinë tmonjánabashejuana. Julio enjamna canÿa chë Romoca bëts mandadbe soldadënguentša mandayá. ²Asna, fsënjánasëngo canÿe Adramitio pueblaca barcuinë; ya chë Asioca bëts pueblëngoye juama enjëtsamna. Cesarea pueblentšana fsënjánabocna y Aristárcnaca bëngaftaca enjëtsamna; cha enjamna Tesalónica bëts pueblócá, Macedonia luaroca.

³Chë inÿe yëfsana, Sidón puebloye fsënjánashjajna. Chentše Julio, tsábá mandbomná Pábloftaca enjëtsamna; tbojanlesenciá chabe amiguëngbioye chauabuáchama, chënga chamofjama y chamóbocuedama. ⁴Sidonocana fsënjëftsanbocnentshana, bëngbe contra corente enjëtsëbinÿiaye. Chíyeca, Chipre fshantsënga catšbioicajana, ndoñe yapa quentëtsebinÿiayëjana bënga fsënjána. ⁵Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

⁶Chë soldadëngbe amëndayá, canÿe Alejandría pueblaca barco chentše tonjáninÿëna, Italia luaroye yojétsaye; asna, šonjanamëndá chë barcuinë jenójayiyana. ⁷Baseftaytentscuana uenana fsënjánana y pordonto fsënjanobená Gnido pueblentsha ndirichiñe jashjanguana. Cabá bëngbe contra enjëtsëbinÿiaye causa, Salmón luarëjana fsënjánachnëjna, Creta fshantsënga béconana, ndoñe yapa quentëtsebinÿiayëjana. ⁸Y chca, pordonto bejaycá fsënjánana, fshantsënga béconana; chentshana, canÿe pueblo, Tsabe Puertënga ca uabáinentše fsënjánashjajna, Lasea ca uabaina pueblo béconana.

⁹Chca, bayté tonjanochnëngo y chora chë bejaycá jama puerte resjo enjésemna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjétsobeco.

¹⁰Chíyeca Pablo chë entsãnga mëntšá tonjanabuayená: “Baconga, atše šontsinýana mora puerte resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiamá cach ndoñe, mo nderado muanjanóbana ca.”

¹¹Pero chë soldadëngbe amëndayá Páblëbioye ndoñe ntjoyeunayana; más, chë barcuentsã mandayá y chë barco nduíñbioye añe. ¹²Ndoñe tšabá yonjamna, chë barco chora enjétsenmentšë chë uaftena tempëntscuana jëftsemnana; chë causa, nýa mo nýetscanga tmonjanenoyeuná cachiñe bejaycá chentsãna játama, nderado cuanjobenaye Fenice puebloye jashjanguama y chentšë jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashëngumna enjamna shinýe endbetsenatjëmbambana juachoica tsjuanoicajana y tsmanoicajana.

Mar béjayiñe puerte uaftena y binýia tojanóshjango

¹³Chentsãna tonjanontšë tsmanoicana batšá binýiayana, chíyeca chë entsãnga tmonjanjuabó ya yojtsanopodena jtëtóntsãna jama ca. As, chentsãna fsënjëftsbanocna y bejaycá fsënjána, Creta fshantsënga beconanëjana. ¹⁴Pero baseftayté chentsãna, chë fshantsëngocana tonjanontšë corente jabuache

binýiayana y chë barquëshoye enjétsoshjajuana. Chë binýia yojanabaina Nordeste binýia ca.

¹⁵Chë barcna nýe chë bínýiëbe ponto tonjanontšë uayana; chë binýia enjétsobayëjana jama ndoñe quentétsopodena causa, šonjanotocá nýe ntšamo tojtsebinýiacá chašúyambama. ¹⁶Chentsãna fsënjánachnëjna Cauda ca uabaina stëtšoiçajana, base fshantsënga mar béjayoca; chiñe ya ndoñe tša jabuache quentétsëbinýiaye y pordonto fsënjanošená buyeshoicana jtabocnana chë barco enjanasjá canouše, ndoñe chaondëtsóndbemama.

¹⁷Ya chë barquëshoye fsëntanëšëngo orna, chë entsãnga lazëjãngaca chë barquëshã tmontsanabatsécaca, más uamorochëshã chaotsamnama. Pero chënga monjétsauatja nderado chë barco chë Sirte ca uabaina cascajuntšë nanjetsánjua; asna, chë barcuentsã ancla tmonjanashëbëútsëna, chë barco ndoñe betsco chaondëtsábõnjnama, y ntšamo enjetsanbinýiaycá fsënjána.

¹⁸Chë inýe yëfsana y chë binýiayana cabá jabuache enjétsëna causa, chënga tmonjanontšë chë barcuentsã uasmanëshangá jtsëshbuëtsetšãna; ¹⁹y unga tianoye béngnaca šonjanotocá, cach bëngbe cucuátšëca, chë barcuentsã soyënga buyeshoye jtsëtsãnana. ²⁰Baytentscuana bënga ndoñe chibiatanobená jinýana ni shinýe, ni estrellatëmënga, tša tonjétsëibetata causa; y tša jabuache enjétsëbinýiaye causa, bënga ya ndoñe quefstëtsanobatmana chentsãna jótsbocana.

²¹Ya bayté enjétsëna y chëntscuana tondaye saná ntjascá fsënjétsëna. Chentsãna, Pablo bëngbe tsëntsaca tonjantsá y tonjánayana: “Baconga, tšabá manjamna atše

mašmēnjanojeuná y Creta luarocana ndoñe matmēnjéftsanbocna; chca mora ndoñe mal mamojtsepasá y ndoñe n̄ya n̄yetsá matmēnjobuetše.

²² Pero mora ngménaca ndoñe matmēnēngana; masque chē barco echantsenatjēmba, tšēngaftanguentsá ndocná queochatóbana. ²³ Ibeta can̄ye ángel šonjébēbocna; Bēngbe Bētsá, ndabia atše sēndmēna y nda sēndēservena, cha tbojichmó; ²⁴ y chē ángel mēntšá šonjauyana: ‘Pablo, ndoñe matauatjiana; entseyta aca chē Romoca bēts mandádbioye chacotsama, y aca Bēngbe Bētsábia cónyayeca, n̄yetsca quem barcuñe ajnēnga jobanámentšana cha echanjatsebacá ca.’ ²⁵ Chcasna, baconga, ndoñe matauatjēngana, er atše Bēngbe Bētsábeñe corente sēntsošbuaché y lempe ntšamo chē ángel šonjauyancá echanjóbocna. ²⁶ Pero mora entseyta can̄ye fshantse mar bējaiñe chašúshejanguama ca” —cha tonjanéyana.

²⁷ Can̄ye ibeta, uta semana fsēnjánana chentšana chē Adriático ca uabaina mar bējaiñe fsēnjētsemna, y n̄ye ín̄yoye y ín̄yoye chē bin̄yia šonjétsēyambaye. Y mo tsēntseto yojētsemna orna, chē barcuentsá trabájayēnga tmojanjuabó ya fshantse béconana imojētsemna ca. ²⁸ As chēnga tmonjanmedidá ntsachetšá chē búyeshe buatjoye inamnama y tonjanóbocna unga bnétsana y chnénguana metro; más chcoye cachiñe tmonjanmedidá y uta bnétsana can̄yēsēfta metro tonjanóbocna.

²⁹ Chēnga monjétsauatja nderado bēts ndētsbēngaca nanjētsántšētjiama; asna, chē barco stētšoiacijana canta ancla buyeshoye tmonjanashēbēútsēna, chē barco ndoñe más chaondētsábonjnama, y tša monjētseboše betscó

chaobín̄ynama. ³⁰ Chēntscuana, chē barcuentsá trabájayēnga tmojánbošēna chentšana jtsachetana; chamna, chēnga tmojanontšé chē canouše buyeshoye justjanguana, pero chca imojétsama, mo chē anlēnga chē barco natsanoica cuaftsēstjajuancá.

³¹ Pero Pablo chē soye tojánin̄ye, y chē soldadēngbe amēndayábioye y chē soldadēngbioye tonjanēná y mēntšá tonjanéyana: “Chē barcuentsá trabájayēnga cach quem barcuentsē ndoñe chamonjoquedase, tšēngaftanga ndoñe quešmochatobenaye muentšana jótsbocama ca.”

³² As, chē soldadēnga tmonjána y chē canoušēntša lazējēnga tmontsantētsetše y buyeshoye chēše tmontsantsatše.

³³ Enjētsebin̄yana ora, Pablo n̄yetscanga tonjanaimpadá ndayánaca chamosēngama, mēntšá jáuyanēse: “Ya uta semana entsemna y tšēngaftanga ni mo batšatema chešmatamaná, y tondaye chešmatsbmuananga.

³⁴ Diosmanda, masque n̄ye mo batšatēmnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

³⁵ Pablo, chca tonjánayanentšana, can̄ye tandēše tonjanca y n̄yetscangbe delante Bēngbe Bētsábioye tbontanchuá. Chorna, tonjanjatá y tonjanontšé jasama. ³⁶ Chentšana n̄yetscanga tmonjanenñemó y chēngnaca tmonjanse. ³⁷ (Chē barcuentsē n̄yetscanga fsēnjamna uta patse y can̄yēsēfta bnétsana y chnénguanēnga.) ³⁸ Ntšamo imnabošcá tmonjansentšana, buyeshoye trigo tmontsanashaná, chca, chē barco ndoñe yapa chaondētsautama.

Chē barco tojtsanenatjēmba

³⁹ Ya tonjanbin̄yana ora, chē barcuentsá trabájayēnga ndoñe

quemëntétsetatšëmbo ndaye fshantse chentše bétsemnama, pero tmonjáninÿe chë fshantsentše canÿe luare jachañe, chë béjaye chë luaroye omashjuanentše, y chiñe canÿe chënÿañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana. ⁴⁰Asna, chë anclentša lazëjenga tmonsantëtsetše y chë anclënga buyeshoye tmonsanboshjuana, y chë timón, chë barco juyambama oservena soyentša uabatsëcnëjëngnaca tmonsanjañoná. Chorna, chë barcuentša natsanoica niñëšiñe entšëjua tshanánoye tmontanéšëngo, y chë binÿia tonjanma chë barco chaontsé chë chënÿoye juabéconama. ⁴¹Pero chë barco canÿe luaroye tonjánashjango, y chentše chë béjaye catatoicajana enjetsobuá y chë barco cãñentše, bëtscá cascajo buyeshiñe binÿnentše tontsananjó. Chë barcuentša natsanoica lado chë cascajuñe entsanajuena, ndócnoye juabónjuama ntsopodencá, y chë stëtsoica lado puerte entsanashatiyinyá y lempe entsanandbiamná, yapa binÿia causa y búyeshë chentše enjëtsojantšëtaye causa.

⁴²Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama. ⁴³Pero chë soldadëngbe amëndayá inaboše Pablo jatsbocama, y chíyeca chë soldadëngbiyoye ndoñe chenatanalesenciá chca jamana; y tojanmandá nÿetscanga chë jachbabama obenëngna natsana chë buyeshoye joshbuetšana tsachoye chamuashjanguama, ⁴⁴y chë ínÿengna tablëshënguñe o chë barcuentša pedazënguñe chamoshbuetšama. Y chca, nÿetscanga fsënjanobená

tšabá y ndocá ntjapasacá fshantsoye jashjanguama.

Pablo Malta luaroca

28 ¹Ya nÿetscanga fshantsoca tšabá fsënjëtsemna ora; fsënjántatšëmbona chë luare Malta ca yojanabaina. ²Chë luarentša entšanga béngaftaca corente tšabá mándbomnënga monjëtsemna; canÿe ñeshe tmonjanangbotjó y šonjanëbuaja choca bënga jatóšboniyama, er tša enjëtsoftena y yapa enjëtseesëna. ³Pablo tojanatbaná básefta buashana chamesëfjënga y chë ñeshoye enjëtsešhacñaye ora, canÿe mëtšcuaye tojánbocna y enjëtsechaye, chentše yapa obonÿaye causa, y Páblëbe cucuatšinë tontsanonjyá. ⁴Chë luarentša entšanga, chë mëtšcuaye Páblëbe cucuatšinë yojtsajonÿanama tmonjáninÿe ora, monjëtseñatsëtšnaye: “Quem boyabása ndegombre inÿa obanayá cuanmëna; mar béjayoca jobanámentšana tojotsbocá, pero chca uamana causa, diosá Justicia ndoñe quebnatsleséncia cha vida chaotsebomnama ca.”

⁵Pero Pablo tontsanenacuestëtoná y ñeshoye chë mëtšcuaye tbontsantsatše y Pablo ndocá chenatanpasá.

⁶Chë entšanga imojëtsejuabnaye chábioye bochtsacuefshachá y nÿe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninÿe ora, ya ndoñe cachcá quemëntëtšanjuabnaye y tmonjanontsé ichámuana Pablo canÿe dios inamna ca.

⁷Chentša béconana inamna chë luarentša mandayabe fshantsënga. Cha šonjanëbuaja y corente tšabá šonjanacuedá, unga tentscuana. Chë taitana Publio ca inauabaina. ⁸Chë tempo, Públëbe taitá šocá jutsnéshañe inajájona, calentóraca y buñëca

buamachnëjuanánaca. Pablo tonjána cha jinýama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanajó, y chca, cha shnaná enjétsatmëna. ⁹ Chca tonjanopasá chentšana, chë luarentša inýe šoquënga Páblëbioye monjánajna y cha enjánashnaye. ¹⁰ Bëtsáca tšabe soyënga chentše bëngbiana tmonjanma, y cachíñe játama ya chë barcuíñe fsëntanenojayenga orna, lempe ntšamo bejaycá jama šonjanëjbotcá chënga šonjanatšatá.

Pablo Romoye tojánashjango

¹¹ Chë fshantsentše mar béjayoca unga ishinýe fsënjéftsemna, y chentšana canýe Alejandriocana yojanabá barcuíñe fsënjanenoyajé; chë barco nyets uaftena tempo chë luarentše yojéftsamna y enjanabaina Cástor y Pólux ca, mo chë romanëngbe uta diosata catšatcá. ¹² Chentšana, Siracusa bëts puebloye fsënjánashjajna y chentše unga te fsënjéftsemna; ¹³ y chentšana fshantse béconana bejaycá fsënjána, Regio puebloye jashjanguëntscuana. Yëfsana, tsmanoicana tsjuanoye enjétsëbinýiaye, y chca, chë inýe yëfsana Puteoli puebloye fsënjánashjajna. ¹⁴ Chentše básefta Jesucristbeñe ošbuáchiyënga fsënjánanyëna, y šonjanëbuaja chëngaftaca canýe semana chentše jéftšajétanama; y chentšana Romoye fsënjéftsanbocna. ¹⁵ Romoca Jesucristbeñe ošbuáchiyënga ya imojétsetatšëmbo bënga choye fchjanashjajnama; chcasna, chënga tmonjánbocna bënga jajëbenguama canýe luare Foro del Apio y Unga Tabernënga ca uabainóntsoñe. Pablo chënga tonjánanyë ora, Bëngbe Bëtsá tfontanchuá y puerte añémoca enjétssemna. ¹⁶ Romoye fsënjánashjajna

ora, soldadëngbe amëndayá Páblëbioye tbonjalesenciá canýabe yebnentše chaotsiyenama, y tonjanmandá canýe soldado chabotsebojanýama.

Ndayá Pablo Romoca tojanma

¹⁷ Choye fsënjánashjajnentšana unga tianoye, Pablo tonjanmandá chentše inmoyena judiënga más uámanënga chamobéconama; y nyetscanga ya tmojánenefjna ora, cha tojanéyana: —Catšátanga judiënga, masque atše tondaye chiyatsma bënga judiënga mondbëtsama soyëngama contra, ni bëngbe bëts taitanga imojanamana soyëngama contra, judiënga Jerusalemoca šmonjanishache y romanëngbe cucuatšíñe šmonjánboshjona. ¹⁸ Chë romanënga lempe šmonjantjá chentšana, monjétsëboše atše jëtsboshjonana, er ndocna bacna soye chemátaninyëna atše jóbanama chašotsemnama. ¹⁹ Pero chë judiënga ndoñe quemtétseboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entšanga, judiëngbe contra jayanama. ²⁰ Chíyeca, atše tcbonjúbuaja jányama y jáuyanama, er ndayama chë Israeloca entšanga puerte jtsošbuáchiyëse mondobátmanama, chë obanënga mochtayenama, atše mora utamená séntsemna ca —tojanéyana.

²¹ Chora chënga tmojanianyana: —Bënga ni mo canýe tsbuanácha Judeocana fchiyatáyëngaca acbiana noticiëngaca, y ni canýe catšata judío, chocana moye ashjajñënguentšá, ndocna bacna soye acbiana chešnatacuntá. ²² Bënga fséntseboše jouenana ntšamo aca cojuabnama, er ntšamo Jesucristbe ustonëngbiana

fstsëtatšëmbcá, entsemna ana nÿets luarenache chëngbe contra entsànga imojtsichamo ca.

²³ Asna, canÿe tescama Pablo tmojaniyana chca chaotsemnana; y chë tena, ba entsànga chë Pablo posada inabomnoye tmojanobeconá. Y cachëscana tojanjéτανέντscuana, Pablo entsànga yojanëtsëtsná Bëngbe Bëtsabe améndayama, ndayama cha ininÿe y inatátšëmbo; y yojtsentsëna chënga jáyëñjana Jesúsbëne chamotsošbuáchema, Moisesbe leyënguentsá soyéngaca y Bëngbe Bëtsabe juabna oyebuambnayëngbe uabemana librëšàngañe soyéngaca.

²⁴ Báseftanga aíne imojtsošbuáchiye ntšamo Pablo yojtsanëtsëtsnacá ndegombre bëtsemnana, pero ínÿengna ndoñe. ²⁵ Nÿetscanga ndoñe cachcá montsanjuabnaye causa, tmojanontsé chentsana jésebocanana. As Pablo tojanéyana: “Nÿets razónaca chë Uámana Espíritu tšëngaftangbe taitanga tojanéyana, Bëngbe Bëtsabe juabna oyebuambnayá Isaíasbiajana, mëntšá:

²⁶ Motsa chë entsànga jauyanama: ‘Bëtscá šmochantsuenana, pero tondaye quecmochátësertana; tša šmochantsafšna, pero tondaye quešmochátinÿe.

²⁷ Muentša entsànga ainánaca josértama ndoñe quemátsboše causa,

chënga nduauenanënga montsemna y nduabinÿnéngnaca; chënga bomínÿeca ndoñe chamondobená jinÿama, ni chëngbe matscuašeca jouenama, ni chëngbe ainánaca josértama ndoñe chamondobená, chca, atšbe benache ndoñe chamondishachama, atše ndoñe ntjátsebacama ca.’ ”

²⁸ Pablo chora mëntšá tojanéyana: “Ndegombre šmochtsetátšëmbo, cach quem Bëngbe Bëtsabe buayenana soyënga entsànga bacna soyënguentsána játsebacama, chë ndoñe judiëngbioye mochanjábuayenaye, y ndegombre chënga cocayé aíne mochanjóyeunaye ca.” ²⁹ (Pablo chca tojánayana ora, chë judiënga chentsana imojésebocana y tša imojtsenatsëtsnaye.)

³⁰ Pablo uta uata chentšë tonjanoquedá canÿe uántšamena yebnentšë; y nÿetscanga cha jauatsëtsayama monjánajnënga cha enjanëbuájajana. ³¹ Nÿetscangbe delante puerte añémoca entsànga enjanabuayiyná Bëngbe Bëtsabe améndayama, y enjanabuatambá soyënga Bëngbe Utabná Jesucristbiama, y ndocna Romoca mandayá quebënjatanauyá chca jtsamama.